

(民国) 李 详 著

药裹慵谈



江苏古籍出版社



（民国）李详 著

药裹慵谈



江苏古籍出版社

图书在版编目(CIP)数据

药裹慵谈/李详著;李稚甫点校. - 南京:江苏古籍出版社,2000.1

ISBN 7 - 80643 - 273 - 6

I . 药… II . ①李…②李… III . 笔记 - 中国 - 民国 - 选集 IV . Z429.6

中国版本图书馆 CIP 数据核字(1999)第 56041 号



编 著 者 (民国)李详著

责任编辑 周 骋

出版发行 江苏古籍出版社

发行部电话 025—3223462

社 址 南京市中央路 165 号 邮编:210009

经 销 江苏省新华书店

照 排 南京理工排版校对公司

印 刷 者 盐城市印刷厂 邮编:224001

开 本 大 32

印 张 4

字 数 100 千字

版 次 2000 年 1 月第 1 版第 1 次印刷

标准书号 ISBN 7 - 80643 - 273 - 6/Z·19

定 价 6.50 元

(江苏古籍版图书凡印、装错误可随时向承印厂调换)

出版说明

《药裹慵谈》为审言先生记述当代轶闻掌故之作，内容丰赡。初名《胜语》，后又称《拭觚》、《窳记》。年事日增，闻见益富。凡学术风会之升沉，朝野俊逸之轶事，俱可于此得之。因体弱多病，后以百药生自号，乃废前名，括称《药裹慵谈》，取“药裹关心”之意。晚年定稿为六卷，今依原次付梓。书中所述，语必有征，非出之臆造。其学术参考价值，时人拟之为薛庸庵之笔记云。

李稚甫

脞语前言

余少接长老，好问轶事。四十年来，胸中所储，森然磊砢，又如杂贿纷纭，度藏无所，因出其良售之。既论前古，又采当世，不必如赵岐之《决录》，聊附于裴启之《语林》，亦杂家小说类也。

李 详



载《国粹学报》七十九期

目 录

卷一(脞语)

谢先生轶事·····	1
顾秋碧之孙·····	2
雷副都杀钱江·····	2
魏默深先生·····	3
赵抡叔遗事·····	3
朱竹垞风怀诗·····	4
阮芸台太傅引接后进·····	4
潘四农先生·····	4
汪瑟庵先生遗事·····	5
孔东塘桃花扇·····	5
莫子偲先生歿于兴化·····	5
李芋仙·····	6
李龙川先生·····	6
许石华兄弟·····	7
方植之汉学商兑与夏仲子乾隆以后诸君学术论·····	7
顾文子黄仲则结婚逸事·····	8
刘壮肃克江阴·····	9
沈文肃张文襄喜诵自撰联语·····	10
裕靖节死事状·····	10

朱伯韩先生保张忠武	11
西南莫郑之学	11
张文襄回鄂督任谢恩表	11
王永清笔	12
庄子王氏注	12
汪浮溪为孟太后告天下手书	13
鹿文端生日谢客	13
海州王家佐泰山堕泪图	14
钱竹汀先生称李南涧	14
计甫草论处士	15
潘孺初先生	15
严鹿谿	16
朝天宫顾亭林祠	16
江慎修先生后人	17
王篆友教童子法	17
亭林先生与友人论学书	17
何子贞先生不满包安吴	18

卷二(拭觚上)

王漱岩南洋劝业会杂咏	19
王子常屈逸珊夫人	19
跋吴野人诗	20
钱东生文献征存录	21
潘云阁河帅	21
王菽原方伯	22
王文敏	22
许仙屏河帅遗事	23
刘葆真遗事	23

蒋叔起遗事	24
与金蘅意论悲溧阳诗	24
记张子虞观察语	25
徐季和劾张文襄	25
白练裙剧本	26
谢子受先生	26
周左麾	27
王西溪诗	28
丙戌戊子文字之交	28
黄仲弢学士	29
施均父爱士	30
庚戌九月大观亭之集	30
汪梅村先生	31
任子田先生身后厄运	32
李爱伯张文襄诗	32
诗学将衰	33
二研堂缘起	34
惠定宇称小门生	35
谭复堂先生	35
唐尉迟乙僧天王像	36
杨果勇侯	36
张文襄金陵杂诗	36
刘霞仙中丞	37
杨仁山居士	37
谢麟伯编修	38
卞忠贞墓	38
顾亭林诗笺注	38
吹网录鸥波渔话	39

黄子寿先生	39
陈惕庵	39

卷三(拭觚下)

缣病	41
成容若龚定庵	41
莫子偁先生纳妾	42
大学士验人才	42
玉峰志校勘语	42
俞曲园先生遗命	43
吴枚庵与稽斋丛稿	44
立年	45
张幼樵学士	45
见一楼	46
翁叔平相国喜骂监生	46
晋东海彦璋墓砖	46
记震在廷	47
叶润臣遗事	48
戴文节告病归里	48
孙琴西内转太仆缘起	48
书完颜恽夫人	49
蒯礼卿	50
杨惺吾先生	50
胡稚威	51
朱鼎甫侍御	51
蒋果敏公	52
吴僧觉阿	52
吴梅村立幀山水	53

郑板桥	53
顾亭林先生肇域志手稿	53
牛腹血治金创	53
论扬州学派	54
曾国藩古文派别	55
论先正事略	55
徐星伯先生	56
湘绮楼缘起	56
刘张侯	57
父附子集之例	57
渊雅堂文	58
卢雅雨先生提引事	58
晚翠轩诗	59

卷四

吊端忠敏二诗	60
李莼客	62
郑成功忠于明室	63
曾文正靖港之败	63
蒋心馥以袁子才比陈眉公	64
冯竹儒观察	64
阎丹初相国	65
徐进之先生	66
刘金门侍郎获谴	67
董文敏送王侍御按黔诗卷	67
洪武户牒	68
郑板桥先生轶事	69
王阮亭先生私谥	70

吴渔山入耶稣教	71
袁爽秋太常	71
官文坐享大功	72
祁文端忌曾文正	73
罗提督思举轶事	74
记关忠节公死难补先正事略	74
孙渊如先生	75
俞曲园获谴始末	76
陆存斋与丁雨生买书构衅	77
喀尔喀赤陵姐琵琶	78
邯郸县龙祠铁牌	79
陈总兵庆云之女	80
周保绪先生文武全才	80
张文襄轶事	81
龚定庵赵飞燕印	82

卷五

朱文定扑责士子	84
刘融斋中允	84
汪仲伊进士	85
左文襄不礼唐镜海	86
段懋堂先生避横逆	87
王幼霞给谏	87
狗曲成讖	88
己酉愚园之集	88
哀溧阳	89
汪本楹	89
记东台之游	89

南浔富绅善刻书	90
张文襄喜打诗钟	90
梁星海赠诗扇	91
沈乙庵述李若农善相	91
书袁爽秋事	91
曹君直定交之始	92
仪栈联语	92
王句生诗文集	93
俞德渊惩改扬俗	93
李晴峰之仆	94
张啬庵赠梅郎诗	94
上海刘公会	95
丹徒成林奇遇	95
钱牧斋贡豫王礼单	96
蔗菩萨	97
鸡汁淪龙井茶	97

卷六

郁华阁集	98
谈艺琐录	98
闾韵联句	98
黄仲弢蓼綏阁集编辑始末	99
鲁通甫先生入国史文苑专传	100
陈兰甫先生赏识于晦若	100
康南海公羊之学	100
李爱伯先生	101
南京鸡鸣寺豁蒙楼	101
吴子修先生悔馀生诗	102

扫叶楼联语·····	102
赵秋谷比苏子美·····	102
曾国藩言论不合·····	103
吴穀人垂老集稿·····	103
近代诗人四家·····	103
两野狐·····	104
吴挚父文·····	104
汪容甫文笈·····	105
三国演义·····	105
邬友仁·····	106
云南曲靖府汉李膺碑·····	107
招帖古名零丁·····	107
李竹懒记奎基法师事考·····	108
龚定庵葛裙词·····	109
阮梅叔·····	110
黄漱兰先生·····	110
吴山尊录汪容甫诗·····	111
全唐文版·····	112
张子开书桃花源记·····	112
舒铁云王仲瞿·····	113
陈散原评樊易两君·····	113
鲁通甫自定文稿·····	113
高鉴之·····	114
陈兰甫先生冒籍弟子·····	114
黄仲则诗·····	115
黄小松摹赠武虚谷像·····	115
江艮庭先生不习楷书·····	116
七品官归田故事·····	116

卷一(胙语)

谢先生轶事

丹徒谢先生庭兰字湘谷，临川李小湖先生督学江苏所取士。避乱至江阴，受古文义法于承受夏培元，读书植节，至老不衰。幼与魁若时将军，同受业于老诸生李某，忘其名。魁父时官京口也。后数十年，魁官江宁将军，谢先生亦馆江宁，所主桐城张姓为江苏候补县丞，赁居江西会馆，先生住楼上。值马、端敏被刺，魁署江督。江宁教授赵某，先生同里也。衙参日，泄言于魁曰：“大人尚有旧同学谢某在此。”魁曰：“吾久忆之，意其死乱久矣。君能为我致之否？”赵曰：“敬诺。”登即访先生，先生曰：“吾不欲谒贵人。”赵固请，则以“无衣冠”对；赵具衣，又嫌其华美；乃以葛袍进，先生曰：“得之矣。”侵晨徒步往，具一刺，署曰“丹徒附监生谢庭兰”。文巡捕睨而微笑，有老而伛者戒之曰：“此老先生不可侮，须上报。”入少顷，内传呼文武巡捕跟班开中门，趋迎入，魁端立厅事门外，先生进揖之。魁操丹徒乡音曰：“渴想！渴想！”问先生近状，具告之。魁曰：“君太自苦，余在行间，粗立战功，姓名稍著人口，君宜闻之，若屈己相就，吾将待以故旧之礼，纵不敢以章绂浼君，其必能溉君，不至如今犹困童子师也。君太自爱，太自爱！”先生曰：“吾乐居此，每年束脩六十千，尚有馀，刻所著书。”魁曰：“此间有江南书局，有采访忠义局，请君择一，当为谋之。”先生曰：“书局有同乡韩叔起在内，不便与争；至采访忠义局，则分鬼之血食，又不忍为。吾老无子，愿甘寂寞，感公雅意，谨臧于心可也。”魁曰：“吾访李先生后，先后冒认者数辈，吾终欲得一真。”先生曰：“李先生子死于乱，有寡妇及孤子居通州。”

魁曰：“吾有四百金，请君致李，买田数十亩，可以供朝夕。”先生曰：“当招李来亲领，余贫士，骤见巨金，安知我不干没邪？”因大笑。魁留饮署中，至二更许，先生告别，魁顾从者：“请谢老爷轿。”先生赧然曰：“非轿。”曰：“然则骑马来乎？请坐骑。”曰：“生平喜徒步，特走来。”曰：“速备轿。”曰：“不可。”因命从者持灯送出。次日来答拜，再属赵教授道意，请入书局，又命中军某坚请，皆辞之。魁始叹曰：“吾乃终不可屈故人邪。吾望之愈远矣。”谢先生述魁之母夫人敬师轶事：每日入厨视膳夫治饌；暑日供西瓜，红瓢瓜则承以绿磁碟，黄瓢则白磁碟，必以颜色相配云。

顾秋碧之孙

江宁顾秋碧怀三以词赋擅名。其子死于乱，孤孙更生，与母逃出，匿江滩芦苇中，展转渡江至淮安，投秋碧故交鲁通甫先生所。通甫馆其母子别室，亲授更生书，取《史记精华录》，命更生尽读之。更生由是文藻翩然，以寄籍清河入学，为余老友徐遁庵先生弟子。更生居山阳北乡，一日回家，饮锡壶酒，中铅毒感病卒，盖此酒置壶中已十馀日也。更生，《清河县志》、《淮安府志》俱有传。秋碧为无支祈后身，通甫有诗言此事。

雷副都杀钱江

雷副都以诚之杀钱江，实以江为画厘金奇策，骄蹇不逊，每被酒辄言：“若非我，焉有今日？”雷积不能平，设计杀之。时又因之部卒哄斗于泰州城门中，江白雷：“必参泰州牧某。”雷不应，江大骂不已，雷谨谢。次日治食招江，江踞高坐，复陈前事，雷俯首唯唯，预伏勇士张某屏门后，开门持刀猛斫，江首堕阶前作数转，目犹左右视。雷即以江摇惑军心入告，奉旨“雷以诚奏，讯明狂妄悖逆之已革监

生，即行正法”等语。又“军营用人，不拘一格，如有才能出众者，原不妨舍短取长，藉收指臂之效。若造作谣言，情同叛逆，岂可稍示宽容？据奏已革监生钱江，以发遣赦回之犯，辄敢妄陈图讖，摇惑人心，实属狂妄悖逆。雷以诚将该犯讯明，立即斩首梟示，自应如此办理，以肃军律而靖人心”。案：设卡抽厘，计虽出江，折稿实为孔宥函继镡代办。雷倚二人为左右手。江既不保首领，孔亦三世死于非命，亦可畏哉！宥函殉难天长；子死浙江；孙昭采从张勤果巡河舟覆溺死，刘伯山先生婿也，妻刘不食殉。

魏默深先生

默深先生官余乡日，在道光二十九年。时运河东七州县屡被水，先生至高邮保坝。运河水涨，越堤上且数寸，先生着草履立水中，募夫挑土筑子堰，以手书券向钱店贷钱，堰成，坝以无害。江督沔阳陆立夫制军，与先生有旧，先生力请陆以令箭饬工员，可保则保，毋许擅开，能成先生志者，陆也。盐城人感先生之德，举人葛振之等，撰匾联至兴化恭上，先生宴葛于署中，各赠《圣武记》一部，匾为“保障淮扬”四字，至今犹在。光绪初，某县令匿灾不报，百姓聚数百人，捣毁大堂上匾对无算。有一挑水夫指魏匾示人曰：“此魏大老爷匾，不可毁也！”水夫不识字，不知何以如此？

赵抃叔遗事

赵抃叔之谦与李爱伯慈铭为中表兄弟，咸丰时，避乱同赴京师，徒步重茧，展转乞食始达。既而名稍起，互相诋毁，遂不通往来。赵多譎，善出其技眩人，私造北碑以售于世，为所给者甚众。抃叔书有润格，如敬亲友之作，于首一字必用淡墨书之，使之有别。其续《寰宇访碑录》初成，携稿至京师，过宜都杨先生守敬，属觅刻工，杨荐

汇文堂书坊代刻。刻成印十数部，潜身出京，不付一钱，杨不知也。已而，汇文堂书坊向杨索值，杨不得已曰：“我荐人不偿汝银，汝欲卖板于我，当稍减原价乃可。”某曰：“愿之。”杨乃买回。复转售于京师懿文堂，携印本数十部至江南，沪上诸坊据之重刻，即是本也。

朱竹垞风怀诗

朱竹垞先生《风怀诗》，杨谦注隐约未指其人。吴槎客《拜经楼诗话》云：“杨本欲显其姓氏，既而言不如其已。”桐城萧敬孚先生藏有《风怀诗注》，不下万馀言，蒯礼卿观察曾见之。萧死后，藏书荡然，此稿不知落于何处。

阮芸台太傅引接后进

芸台相国予告归里，喜接后进，于书院所取高材生，尤为留意。每次弟招饮于家，菜不过数簋，命其孙陪食，公略一举箸而已。问以所长，无论经义词章，听其纵言，公徐核之；再问以家世，乃馆谷几何，书院膏火几何。公略为致思曰：“每年尚不敷。”因出编书条例示之，属以每日交数则为日课。淮商时有公谷以应往来宾客，公具一纸告之，列名其中，每年或得百馀金，至少亦数十金，必使小有饶馀，得以专力向学。扬郡人才，咸成由公手，不似后人专以乡里为溺攢也。

潘四农先生

四农先生屡应解试不第。道光戊子科，首题“视其所以”三句，先生通篇不敢用人字，虑犯上也。小讲以物字代人。出闱后，以稿质江宁某公，某曰：“今科君可得解元，然不敢用人字，何畏蒞也？”

先生曰：“诚如尊言。”

汪瑟庵先生遗事

吾乡任子田先生，主讲淮安丽正书院。汪瑟庵幼孤好学，留止院中读书，先生言于德定圃漕帅，稍给膏火，俾养其母。先生官京师，汪举丙午乡试，入都谒之。先生有女欲妻汪，言之夫人，夫人于屏后窃窥，见汪饮啖兼人，身躯雄伟，曰：“奈何以吾女予武夫？”后此女嫁草堰场袁氏，贫不能自存，病歿于草荐上，亲友醵钱敛之。汪官协揆，谥文端。袁以一穷诸生，年九十馀始卒。

孔东塘桃花扇

孔东塘尚任随孙司空在丰勘里下河浚河工程，住先映碧枣园中。时谱《桃花扇》传奇未毕，更阑按拍，歌声呜呜，每一出成，辄邀映碧共赏。后入都，映碧之子楠，官总宪，以授金斗班演之，名噪都下。每王公借演此班，伶人得缠头费甚巨。值东塘生日，诸伶演此为寿，纳东塘上座。唱至佳处，东塘为点一筹；或有小误，则亲加指授，合拍乃已，自是金斗班超跃群班之上。

莫子偁先生歿于兴化

子偁先生奉曾文正公札，访文宗、文汇遗书。先生由泰州北下，至吾乡，驻东门外时思寺。先生感秋邪，晚发患，虚阳上越，额汗沾濡。赵小湖先生来诊脉，命速备参、附，先生不可。少顷，即眩晕不能言，旋卒于寺。县令甘君绍盘亲为治丧，送柩归江宁，停莫愁湖寺中。文正来吊，后其弟祥芝请假送先生柩归贵州。其后人犹住扬州，先生藏书尽出。唐写本《说文》，后归丰润端制军。所刻陶诗，先生

题为宋本，实明刻也，吾友丁君秉衡有原刻本。

李 芋 仙

李芋仙^士，官江西南丰县，为刘仲良中丞劾罢。初芋仙虽客曾文正所，使酒嫚言，文正以方外畜之，不甚重也，然时怜其才。文正官江南日，芋仙屡有干请，文正戒门者勿通。芋仙以诗四首，用稟封达，文正读之称善。次日，梅小严方伯入见，文正曰：“李芋仙终是才人，务为之地，勿使失所。”芋仙得以温饱数年。文正卒后，乃流落上海，教一二女伶度曲自给。所藏书有“忠州李芋仙随身书卷”一印，余得数种。芋仙上文正诗，有云“怜才始信得公难”，文正为之动心者，此也。

李龙川先生

扬子李晴峰先生，自张先生积中黄崖山被祸后，先生遁居泰州，讲学谈艺，弟子著录者数百人。先生之学，无所不包，有来问者，大叩大鸣，人人得其意以去。每日至泰州北门外，储文懿公坊左右茶肆小集，以两桌接坐，先生居上，弟子分别两旁，气象肃穆，有东汉师弟之风。一日使弟子言志，戒勿矫饰，有某言“弟子不好色”，先生呵之曰：“非人情，曾狗彘之不若耶。”先生有仆，后为庖人，精治饌。此仆乃咸丰初由江宁贼中逃出，甫十馀岁，先生收之，终身依先生。有暇则听先生讲学，渐能识字读书作文。昔知其姓名，今忘之矣。先生歿后，仆有一长联挽之，余仅记其上下末语云：“徐甲发肤非己有，刘安鸡犬尚人间。”隶事工切，使文人操翰，不过如此。先生之学，世名为泰州教，人多不知其详。余友高星仲、袁淡生，皆李门弟子，每为余言之，故余能举其大略云。

许石华兄弟

海州许石华桂林、月南乔林兄弟竞爽，有名东海间，能承凌次仲之学者。石华早孤，家有积赀，其父病革时，召老仆命之曰：“吾两子皆幼，汝能佐主母，延师教之成立，吾瞑目矣。”仆泣诺，后延某君为师，仆终日侍左右。值盛暑，师为二许讲某经，挥汗不已，为时甚久，仆进曰：“请先生暂停讲。”某呵曰：“吾为若家敬余，至不憚教之，何请止也？”仆曰：“主母值先生开讲，必盛服跪庭中。先生已乃已，今不稍停，主母则中暑矣！”某后访之，果然。仆侍两许，动止必戒，如严师焉。仆有子能归养矣，迄不去。石华分数千金赀产与其子以报，闻尚有后。石华家青口，藏书甚夥，余姻丈周香坪先生入都会试，时王家营道梗，由盐城海船至青口上岸，曾主石华后人家，尚见书篋累累，叩以其中有何佳书，主人多不能举其名云。

方植之汉学商兑与夏仲子 乾隆以后诸君学术论

诸子竞起，百家争鸣，自周末以来，至于今二千餘年，迭为胜负。两汉大儒，传经皆有师法，稍有立异，摈之不齿。至东汉末逮于三国，始有取辨口舌学术之一种。王何之罪，浮于桀纣，前人已论之矣。大抵其源远者其流长，潢污之盈，转瞬易竭，盖一蹈空，一征实也。本朝之学，开于昆山顾氏、太原阎氏、元和惠氏、婺源江氏，此四大宗，犹江淮河汉之四渎。渎者独也，谓能独自赴海也。乾隆诸君，益承其绪而扩张之，其体益尊，其例益严，虽有聪颖后生，亦只入于其囿而受其范围，不容稍鼓狂喙，以为众矢之的。乃有于此稍窥藩篱，知不能求胜，因倒戈而出之，冀收鲁阳之功。其心术之黠，弥不可问，而空疏无识之士，至揭其帜，以为道在于此，亦洪水猛兽之害

也。桐城方植之诗文俱有门径，称心而言，其学亦自名家，忽为《汉学商兑》一书，毛举细故，弹射诸老，至无完肤。而其书盛传于时，翻刻者至有数本，虚舟飘瓦，贤者不咎，其与诸老固无损也。以世多有其书，不复论之。复有当涂夏炯《仲子集》，拾植之已弃之丸，转之不已，天壤间固有无独有偶者。《仲子集》第三卷，起自《读四库提要》，止《书经韵楼丛书后》，此一卷中，无非以微词肆讥。其尤缪者，在卷一《乾隆以后诸君学术论》，其言曰：“乾隆以后，近百餘年来，专为一节一句，一字一文，盈千累百，刺刺不休，不特丝毫不适于用，且破坏碎裂，转为贼经。今就其著者论之：穿凿性理，故为难深；句股割圜，改宣城之面目；六书音韵，窃江氏之绪馀，是休宁戴氏之学也。据此校彼，改异为同，明知无用之辨，好为小慧之行，是抱经卢氏之学也。生今反古，以篆代真，说《尧典》不让三万言之烦，论《禹贡》独无一二端之得，是艮庭江氏之学也。炫博矜奇，以多为富；读史不镜得失，仅详某本或作某；《养新》萃为一编，令人味之无可味，是嘉定钱氏之学也。妄诞已邀宽典，著述仍窃虚名；汉魏之音，掇拾前人所唾弃；传志诸作，不明体要而立言，是稚存洪氏之学也。考工何补匠氏，辨谷止算老农；资稟既愚，不能贯通经注；傅会不合，因而转驳郑君，是新安程氏之学也。割裂本经之句读，变易传注之原解；《广疋》一字，疏至千言；语助之词，积成巨帙，是高邮王氏一门之学也。自知浅陋，依傍他人；原注：谓依傍东原。著书亦觉其多多，鸣虫终消其唧唧，是金坛段氏之学也。”案，夏氏之言如此，颇如马融之厚诬李固，路粹之枉奏孔融，其文独作偶语，有似乡俗盲词，余亦不复缕辨，录传于世，以俟后之平心亭决者处断焉。其或有鼓夏氏之焰，而并诋余之左袒者，则又愿与诸君子分谤也。

顾文子黄仲则结婚逸事

高邮沈既堂先生业富官太平府十餘年，幕中诸友，并为时彦。

吾邑顾文子为沈子枫墀授读，洪稚存、黄仲则皆书记也。一日顾、黄得家书，顾生一男，黄生一女。仲则谓文子曰：“吾愿与君结儿女姻。”稚存在旁怂臿之。后顾、黄各别去。顾举乾隆辛丑进士，道出津门，疽发于颈，卒于逆旅。黄客死山西解州。两家久不相闻。吾邑水灾频年，顾氏虽贫，诸子皆秀出，文子长子超宗，固有声当世；次子麟瑞，亦崭然见头角，即仲则婿也。稚存自伊犁释回，语人曰：“吾当为仲则了婚嫁愿，顾氏吾媒也。”驰书就徐礼华访顾家息耗。徐复书言：“顾有子皆贤。超宗虽死，麟瑞足继之，特患贫耳。”洪即请徐属顾涓吉完娶，奁具皆稚存主办。黄孺人能诗，陪奁有《通鉴》及《陈检讨集》。余与顾氏为姻家，犹得见残本。麟瑞，字仲嘉，嘉庆辛酉拔贡。妻仲则先生女，字仲仙，有《仲仙诗钞》，见县府志艺文。余亲家名硕字石孙者，即黄孺人曾孙也。

刘壮肃克江阴

江都陈某，咸丰初客余家，先考主簿君资之。旋去投营，隶刘壮肃麾下，积功至游击。乱平至吾家，携亲兵二人，皆十八九壮男子，行走如飞。主簿君历问其战状，陈云：“攻江阴日，贼城守严，昼夜不懈。我军肉薄仰攻，死者踵接。贼每二人保一城墙垛，独有一人保城墙垛十数，持刀如门扇，驰突往来，我军乘云梯上，贼一挥刀，头纷纷落。壮肃曰：‘能击杀此一贼，则可乘此隙上矣。’并力攻之。下令曰：‘有能杀此一贼，官保守备，赏二千金。’攻正酣，忽此贼中踉跄，众乘之上，遂克江阴。访之则一棚中火夫，携枪于壕外，注目拟贼。此贼但御乘城之兵，不及虑远。火夫觑定，发枪中贼而殒。克城后，屠贼一日，令封刃。”此亲兵二人，皆贼童子军也。贼日令杀人，初犹不敢；久则以杀人为快，每出阵，冲锋莫当。陈欲留一赠先君为仆，先君谢不敢收。陈后官至副将，同治戊庚间，犹与余家通书，未几即死。

沈文肃张文襄喜诵自撰联语

沈文肃于同治十三年，值日本与生番构衅，奉诏渡台。奏建延平王庙，公自撰联悬之。官江督日，与僚属宴集，饮酒数巡，即朗诵此联，以手拍案为节。江宁府孙海岑太守，屡闻公诵此，后向人道之。联云：“开千古特未曾有之奇，洪荒留此山川，作顽民世界；际一生无可奈何之运，缺憾归诸天地，是破格完人。”诚佳联也。又张文襄官粤督，承张靖达之后，时张被深劾待勘，死后，文襄挽之云：“继公惭武库之才，岷首哀思，片石人传羊太傅；据鞍示矍铄可用，壶头瘴疠，明珠天鉴马将军。”亦喜向人道之。二公措词极圆，“破格完人”，“明珠天鉴”，皆函有事实在内，非二公不能作也。

裕靖节死事状

道光辛丑，西人薄镇海，裕靖节公谦以钦差大臣死国难，读鲁通甫记靖节临死处分之语，叹其勇决。冯景亭官允《显志堂集·陈君若木家传》言：“裕公镇海兵溃，僚属将拥之走。君曰：时若木为幕府上客。‘吾无官守，可不死。公不死，则万矢集公。终一死，死西市死此孰愈？百代瞻仰，在瞬息间，愿勿悔。’靖节以为然。则酬酒生奠伏地哭曰：‘公从此千古矣！’靖节意遂决。”又《为陈若木文学跋裕靖节公督师研图》云：“余往在京师，颇闻裕靖节死事，决于先生一言，而先生讳之莫能明也。余因思忠义本天性，非他人所能强。自英夷入寇以来，大小官吏禽走豕窜者，不可胜数。先生试以死事语之，其应之否？然则先生有是言邪，亦靖节素所树立，有以致之？靖节之能死，于靖节信之也。既无是言邪，以先生之侃侃正直，守道不阿，其能为是言，又于先生信之也？窃思靖节不歼贼，固志在必死，先生为之揆时势，审先后，因事所宜，有靖节之杀身成仁，先生之爱

人以德，其咸可敬也已！”案景亭此跋推勘靖节死志早决，不待陈言，而于陈传又不忍没其慷慨区画以报知己，亦史家别见互勘之法。通甫言：“吴人陈时《上诚勇公书》，论裕靖公死节事，陈故靖节客，亲见公死状甚核。”时即若木名。又云：“公既死，颇有异论。”则亲见陈、裕之事者，胥动浮言，若木迄不以自多也。

朱伯韩先生保张忠武

张忠武国樑就抚于广西巡抚劳文毅崇光，文毅为改今名，纳之门下。初文毅犹豫未决，朱伯韩先生时在籍团练，愿以全家保之，浮议始息。忠武死丹阳，常、苏瓦解。杭州既陷，伯韩先生亦徇焉。伯韩时以候补道经王公有龄调赴浙。伯韩《怡志堂诗集·黄少兰司马自江南来席间话张殿臣镇军战事诗以纪之》，有云：“我亦旷举类敬仲，乡曲百口解谤伤。笑言太白无豈敢，但冀渠作郭汾阳。”纪此事也。

西南莫郑之学

余前有《怀人诗》，内王益吾先生一首云：“投劾湘江老病身，远貽书尺媿文鳞。汝南小学传校长，毋敛惭非尹道真。”余友山阳段笏林感余言尹道真事，因忆西南莫郑之学，欲作诗表章两君。余乃赋一诗为致师之先驱，诗云：“牂牁名士起盛览，道真经纬擅西南。浸淫莫郑辟门户，屈强巫黔如靳黡。琼枝人表方竞秀，谏果清文自回甘。只今耆旧委黄壤，嶢蔚时复资游谈。”

张文襄回鄂督任谢恩表

文襄于光绪甲辰回鄂任，其谢恩表云：“伏念臣自惭衰朽，获望清光，屡陪禁近之班联，稍慰江湖之梦寐。聆禹汤之自责，感激

涕零；企周汉之中兴，忘其老至。迺者强邻构难，东土震惊，虽暂时中立之从权，恐此后外交之益棘。臣惟有勉殚弩钝，仰稟宸谟，统善邻治内以兼筹，以兴学练兵为首务。储木屑竹头之用，敢抛寸晷于江城；续笠檐蓑袂之诗，犹忆恩波于禁苑。”此表极似宋人佳作，段笏翁及殷君孟乔问余“笠檐蓑袂”所出，余答云：“似为查初白《纪恩诗》。”检之果然。文襄屡召见于南海，隶事自切。初白诗云：“笠檐蓑袂平生梦，臣本烟波一钓徒。”遂宣旨呼“烟波钓徒查翰林”。此四字又出于放翁诗。文襄此表，余于报中见之，录置日记。后回兴化，表侄杨曾纶出其日记，亦录此表，两人不觉相视而笑云。

王永清笔

包安吴《艺舟双楫》，论笔工王永清善为笔。安吴以永清笔大小五支，赠合肥弟子沈用熙，时道光乙巳岁也。余友刘泽源得其最巨者于沈之孙，以饼金八枚易之。其管径七分，豪长三寸许。泽源字访渠，沈之弟子。访渠重为两先生物，宝若球璧，其实已颖挫不用矣。

庄子王氏注

王壬秋先生有《庄子王氏注》。或谓不得以氏称，余案《左传》首卷“杜氏”下《正义》云：“注述之人，义在谦退，不欲自言其名。刘炫云不言名而言氏者，汉承焚书之后，诸儒各载学名，不敢布于天下，但欲传之私族，自题其氏，为谦之词。”壬秋先生之意，亦犹是也。

汪浮溪为孟太后告天下手书

《浮溪文粹》十五卷，前有赐进士出身庐州府知府、前刑科都给事中周瑛识语。白绵纸印，每半页十行，行二十三字，有“古盐马氏”、“笏斋珍藏之印”两印，首诏策类第一篇《为皇太后告天下手书》，目下刻有评语云：“悲伤痛悼，真足感动人心，此书盛为当时所称，比之陆宣公兴元一诏。今特录之，俾读者感激。”书云：“比以敌国兴师，都城失守。侵缠宫阙，既二帝之蒙尘；诬及宗祫，谓三灵之改卜。众恐中原之无统，姑令旧弼以临朝；虽义形于色，而以死为辞。然事迫于危，而非权莫济。内以拯黔首将亡之命，外以纾邻国见逼之威。遂成九庙之安，坐免一城之酷。乃以衰羸之质，进于闲废之中，迎置宫闱，进加位号。举钦圣已还之典，成靖康欲复之心。永言历数之屯，坐视邦家之覆。抚躬独在，流涕何从？缅惟艺祖之开基，实自高穹之眷命。历年二百，人不知兵，传序九君，世无失德。虽举族有北轅之衅，而敷天同左袒之心。乃眷贤主，越居近服。已徇群情之请，俾膺神器之归。繇康邸之旧藩，嗣宋朝之大统。汉家之厄十世，宜光武之中兴；献公之子九人，惟重耳之尚在。兹为天意，夫岂人谋？尚期中外之协心，同定安危之至计。庶臻小憩，同底丕平，用敷告于多方，其深明于吾意。”

鹿文端生日谢客

鹿文端傳鹿官陕抚日，余同邑姻丈顾耳山先生驛以丁忧知县，馆其署中。文端于生日前，召中军某语之曰：“君知我某生日乎？”答曰：“唯唯。”曰：“烦君传语僚属，至期不得来署拜贺，一切寿礼，不准送入。”中军勉诺而出。文端于是日素服致祭先人，署中宾友，概不接见。至数日后，始治数簋宴幕友。后其亲戚向人道之，谓文

端之父壮节公，即于是日殉难，故鹿氏讳之，文端尤为终身不忘云。

海州王家佐泰山堕泪图

咸丰辛酉捻众东掠海州，王君家佐字翼臣，年尚少，被掳。展转至山东泰安府，与同辈十八人逸出，叩城求庇，逆者以为奇货，缚献诸官。时泰安训导为济阳艾君绍洵，独怜王似书生，请于县令释之，其余十七人皆斩矣。艾为王栉沐，爱护备至，遣仆送回里。王父母惊喜，以为再生。王旋补附学生。同治癸酉艾君六十生日，王往祝寿，留一月馀，恸哭别去。艾勉以学，期再见。光绪乙卯艾君卒，王设位而哭，心丧三年。绘《泰山堕泪图》记此事。广征诗文，以纾报艾之痛。王君自记言：“游九原者流连随会，过大梁者仁想夷门。案：此傅季友《为宋公修张良庙教》语。缅怀古谊，尚且无端感泣，而况夺生命于土伯，追游魂于墟墓，戴邱山之恩，而未竭涓埃之报者乎？”又云：“进不能荣取禄养，如张苍之于王陵；退不能庐墓独居，如端木之于仲尼。谨为图记之，将以叩天阊，排日观，神游目想，追随于苍崖碧嶂中也。”武引贺刑部濬此图书后，述艾君之侄观亭言：“捻众将及泰安，时城无备。其守令素不悦于民，乡民不集，人情大恐。吾伯父说守令谢过于民，而躬亲谕之，晓以利害。民大悦，誓以死守，贼不敢逼。守令皆以功迁，而吾伯父独不得与。”据此，艾君不唯能拯人于危，且能保全一城，其功大矣。王君感恩知报，其亦古人与！

钱竹汀先生称李南涧

竹汀先生，乾隆己卯山东试，得益都李南涧文藻。南涧官桂林同知卒。刊有《贷园丛书》，其中《九经古义》、《古韵标准》，惠江两君，皆素未相识，访其遗书刊之者也。竹汀尝戏论南涧有三反：“长身多髯，赳赳如千夫长，而胸有万卷书，一也。生长于北海，官于南

海，二也。湛思著书，欲以文学显，而世称其政事，三也。”又云：“使其得志，必能使古之文士有以永其传，今之文士不致失其所。”古之文士，指南涧所刻书。今之文士，则指罗台山辈也。竹汀之痛南涧，岂止师弟已耶！南涧同时山东人有名者，曲阜孔广森、桂馥，历城周永年。

计甫草论处士

甫草《改亭集·吴野人诗序》：“今天下何处士之多也？以余所见，今富贵利达之家，多世俗之称处士者焉。彼富贵利达者，视其家，玩好珍异之物无不具，独不能具古今载籍之语，乃挟其势利，思笼罩钩致一二贫贱失志、稍知诗与文、又自骄语为高士者，以充其家玩好之一物。而彼骄语高士者，汲汲然欲以其诗与文求知于人，遂俯首甘心，永为富贵利达者之玩好而不辞。”案：甫草此论，隐有所指，盖清初人沿明季山人旧习，要津阔扁，希旨承颜，不免供人玩好，如甫草所云者，亦处士之羞也。龚定庵记金德辉事，中有“摹富家坐客敝衣冠”云云一段，极有致，皆不免为玩好之一种。士而不安于贫贱也，其亦慎所投哉！

潘孺初先生

余识宜都杨星吾先生，问潘孺初先生遗事。杨曰：“潘先生名存，琼州文昌人，以咸丰辛亥举人官户部，湛冥不与俗接。得一艺者，皆足名家。余与邓铁香承修、关季卿棠，为其入室弟子。先生读书，能看透数层。每日作书，随手涂抹，弃之纸篓，余幸拾得数纸。柯逊庵处，有所临《九成宫》，直逼真迹。先生热肠冷面。有好事从游，教导如恐不及，且周其乏。与贵人达官遇，则避之若浼。阎文介掌户部，屡往拜不见。铁香疏稿，半出先生改定。先生写小楷，亦悬腕

以三指撮笔端。先生年五十馀无子，同人为置一妾，生一子。晚归文昌，主讲乡中书院。没后，其弟择书院隙地祠之。先生年七十五卒，余屡欲为先生墓志，以文不工，未敢辄为。间以先生事语陈伯严，请其缀次为传，伯严亦谢不敢。”详曰：“先生老矣。若不为文传潘君，恐无以见故人。”先生曰：“然。”详又曰：“曷不效马永卿撰《元城语录》，记潘先生绪论轶事？”先生曰：“即当为之。”先生又谓详曰：“潘先生粤人，吴人罕知之。君问之独审，信为佳士。我顽固党，君亦顽固党耶？”因相与大笑。杨先生与余问答甚多，将具录之，今特举其一云。

严 鹿 谿

杨子严鹿谿玉森为许海秋先生弟子，官部曹日，从潘文勤游。王廉生忌之，撰出本借诋谿，因请假游陕。屡主书院讲席，晚年丧明，后卒于陕，葬同州。鹿谿父官陕，亦葬于此。鹿谿为人清介有守。余姻丈顾耳山先生官白河县，交卸至省，闻鹿谿甚贫，居逆旅中，往拜，赠以三十金；次日鹿谿答拜，赠顾书一捆，云答赠金，否则不受，顾无以难也。余亲家石孙至同州，往见君，犹力疾导之游隋清娱墓，且为言故事。严卒后，石孙甚念之。先后客葬于陕有名者，前有谢麟伯，后即鹿谿也。

朝天宫顾亭林祠

江宁朝天宫顾亭林祠，在飞霞阁之南。余偕友人谒之，先于亭林先生神主前三揖。东一龛祔祀有顾与治、程绵庄、严冬友，又有刘伯山、戴子高、唐端甫、刘恭甫，则飞霞阁内校书者，又有毛生甫、黄汝成、张石洲，毛、黄为撰《日知录集释》者，石州撰“顾谱”，故得祀之。但《日知录集释》为李申耆先生及毛生甫、吴山子三人为之，刻

赏出黄氏，独尸其名，生甫从祀，而李、吴闕如，考古者所当知也。

江慎修先生后人

余有友人为婺源教官，告余江慎修先生居处名江湾，地极秀异，今其后业豆腐店；余告吾郡焦里堂先生后人，亦卖饼为生。友人笑云：“此公羊卖饼家也。”不觉叹息。

王策友教童子法

王策友先生《教童子法》，寥寥数番，其中有云：“功名、学问、德行，本三事也。今人以功名为学问，几几并以为德行。教童子者当别出手眼，应对进退，事事教之；孝弟忠信，时时教之。讲书时，常为之提倡正史中此等事，使之确证，且兼资博洽矣。学问既深，坐待功名，进固可战，退有可守。不可痴想功名，时文排律之外一切不学。设命中无功名，则所学者无可以自娱，无可以教子，不能使乡里称善人，士友称学，当此时而回想数十年之功，何学不就，何德不成，今虽悔恨而无及矣。不已晚乎？”案，世之悔恨失学者甚少，时文排律，既不逢时，不免怨天尤人，潦倒以终。父兄既不肯以此法教童子，童子又不安于命，此所以老而无成者多也。

亭林先生与友人论学书

《亭林文集》卷三，有《与友人论学书》，此与张稷若先生书也。附见《蒿庵文集》卷一内。亭林之言曰：“圣人之道如之何？曰博学于文，曰行己有耻。”稷若先生答书云：“论学书，粹然儒者之言，特拈博学行己以为学鹄，确当不易，真足砭好高无实之病。行己有耻一语，更觉切至。至学之真伪，只以行己为断，行己果有耻也，博学

固以考辨得失，即博学亦未免玩物丧志之失。”案，番禺陈兰甫先生爱此二语，特篆为联以赠同学，余往乞罗君叔韞书，亦篆此联见赠。通人翰墨，偶尔寄兴，其亦不苟如此。亭林之言，固立后世儒者之防，蒿庵引申之语，尤思之有味也。

何子贞先生不满包安吴

子贞先生书名继包安吴，遂极意倾之以为己地。子贞晚游扬州，时定远方子箴为运使。方书宗平原，与贞老意合。何有议论，方辄左右之。安吴高弟吴让之老矣，栖于佛寺，求书者踵接，吴赖以贍家。贞老闻之极不平，谓方曰：“吴某其师尚不懂笔法。况吴邪？”方抚掌称善。渐传于诸鹾贾之耳，吴之声价顿减。恶其人者，憎其绪馀，殆何之谓矣。何《跋张黑女志》云：“包慎翁习北碑，先于我二十年，书名甚重于江南，从学者相矜以包派。余以横平竖直四字绳之，知其于北碑未为得髓也。”又云：“《英义夫人墓志》及《仙女祠祝版文》，慎翁果曾见邪？近年北碑出著录，未闻此两种也。”

卷二(拭觚上)

王漱岩南洋劝业会杂咏

王漱岩葆楨为子常先生族弟，工书能诗。南洋劝业会开，漱岩幙被来游。操弱翰，赉油素，周览各馆。详其位置物产瑰奇名迹，注之于槩。凡历数旬，眩精洞观，体为之敝。每事纪以七言绝句，条疏其下，综括无遗。先已印行，赠余一册。余以张伯松语告之曰：“此悬诸日月不刊之作也。”漱岩复有改定，乞余题词。余记以小文云：“南洋劝业会，权輿江宁，经始不日，广场奥区，列队杂肆。铺陈侈于吴都，奇崛轶于王会。解署棋布，穷般尔之伎态；蛊媚玉映，竞士女之昌丰。诚千载之胜集，大吴之巨丽也。虽其弹指即见，转瞬易墟，辽东城郭，人民遽非，新丰粉榆，鸡犬岂识？不有纪载，曷推嬗迁？漱岩王君，子长爱奇，文考观艺，厕身其间，积日累月，摘铅注槩，画地成图，比缀联吟，略逾百首。意主纪事，兼工修词，子注自疏，一览即得。昔道元注经，善状名物，炫之伽蓝，旁及傀伟。传于后世，漱岩此咏，并堪不朽，毋谓比迹古人，辄黜黑而谢也。”余撰此文，在辛亥五月，逆知有八月事者。由今思之，作“梦华”“梦梁”之余观可也。

王子常屈逸珊夫人

黄岩王子常咏霓，丁卯副榜贡生，以对策用本朝著述人名被黜，副考南皮张香涛太史力争不得。后以庚午举人、庚辰进士，由部曹随许笈星使游于欧西。未几差归国，改官安徽知府，补授太平府知府。辛亥六月后，甫摄郡符，旋值世变，脱屣归矣。先生年七十馀，

余在皖，颇与往还。配屈逸珊夫人，能诗。一门酬唱，当世争羨。先生赠余《雅希集》及夫人诗，计高尺许，罹于皖劫。南北相望，自谓此生与先生恐不能再见也。先生篆岢台铭字篆联见赠云：“其人好古有奇作，从君望道乐无涯。”余谦不敢当，然亦可见先生于余倾倒甚至。余自先妻赵孺人逝后，广征名辈诗文表章之。以孺人事述奉夫人，乞为题诗。副以小启云：“伏维夫人，高阳苗裔，灵均远孙。阆风縹马，佩解高邱；邃闺扬娥，衽敷灵琐。诗传十索，夫人有《十索诗》。玉台然脂之遗；美求九洲，彤管归蕤之俪。同心并结，比翼联吟。艳若神仙，遥通河汉。比之墨琴之侣惕甫，照圆之配兰皋。远溯乾嘉，更传韵事。详自吟蒙楚，永忆稠桑。复甄埋云，曙星替月。政苦食淡，誓欲报以平生；握兰折麻，愿广征夫篇什。纾哀九逝，贲宠三泉。企注瑶华，饰为冠冕，林下清风，勿嫌唐突。”夫人题诗云：

廿载持家耐甘辛，萧然长伴仲卿贫。牛衣自写凄凉绪，读到情深语最真。

白华手洁奉羹汤，曲意承欢侍北堂。明日还愁缺甘旨，開箱私典嫁衣裳。

霜露晨兴夜睡迟，人前讳病强支持。可堪添叠栖雏日，未及栽松调鹤时。

上计秦嘉悔远游，虚帷凉月一痕秋。灵修倦解长开眼，定慰深思未答愁。

四诗皆絮事述之要，俨然诗人之旨，余读之不禁陨涕。夫人年约五十，余曾见其照像，丰容静逸，绰然有大家之风范。余誉为林下清风，不虚也。

跋吴野人诗

吴野人嘉纪，泰州东洵人。生于丧乱，穷老以没。为诗直抒胸臆，不假雕饰，乱头粗服皆佳，直可闯入少陵之室。遗民诗能规模大

家者，嘉纪与高淳邢昉，屹为二宗，他非所预也。野人友汪舟次楫，言之周栎园先生，大加称赏。盖明季乘华亭虞山之派，体近酝缊。野人诗出，如孤云荫喝，清风疏襟，宜知之者懣然心服也。渔洋官扬州五年，一时如杜茶村、孙豹人、邵潜夫、费此度，皆被赏遇。野人不为之下，其诗派亦与渔洋异辙。渔洋云：“一个冰冷的野人，被人吹得稀热的。”未尝不深忌之。卒之，渔洋、野人，各张一帜，毋庸是丹而非素也。杜茶村貌为学杜，而不免有犷气，今所传《变雅堂集》与《陋轩诗》并观之，读者自可识真矣。

钱东生文献征存录

东生先生讳林，仁和人。诗学王渔洋，其集收入《粤雅堂丛书》。先生初亦阮文达诂经精舍弟子。通籍以后，沈冥不与世竞。所著《文献征存录》，以王渔洋、袁子才、江郑堂三家之书为本。旁征曲引，以人存诗，或以诗文存人，为谭艺者必不可少之书。惜只有南通州王氏刊本，版本漫漶。海上书贾，但重李次青《先正事略》，不知印此，是贵近而贱远也。此书函有子史集三部之长，虽有遗漏，然大略可睹。余尝题诗云：“清斋绝俗太常妻，秉烛修书目电低。三部体裁丁丙乙，惜无写副负天扉。”盖甚爱其书也。“天扉”，见韩公《送区宏南归》诗。

潘云阁河帅

潘云阁河帅锡恩，为江督李文恭公星劾罢。相传云阁奏补南河诸厅，皆择年少俊美者。红巾之乱，云阁家乡荡然。子身至盐城西乡之丁马港，访旧门生毕道远，借资入都。毕适至邻乡收租，云阁踵门呼毕，门者出，曰：“毕道远在家否？”门者以衣冠甚伟，不敢轻之，延入厅事，请村人凌君举贤陪谈，急促毕归。毕于屏风窃窥，大惊，

即肃衣冠拜谒。云阁掖之曰：“世乱毋行此礼。”留宴数日，谓毕：“吾从君贷百金赴都，就诸儿曹，以毕余年。”毕亲送至王家营，视其上车而去。后潘卒于京师。凌君告余，潘须髯如银，议论澜翻不绝。毕湖北人，官阜宁知县，以罍误投陈总兵庆云营效力。陈鏖战困极，毕导以服食鸦片，陈日久为瘾所累。毕假归，陈遣材官逮毕，将加楚辱，毕惧，吞金死。

王菽原方伯

王菽原方伯藻，南通州人，分校礼闱，得俞理初为门生，时誉归之。红巾乱起，奉旨在籍团练。江北团练奉旨者，扬州晏彤甫副宪、淮安丁俭卿中翰及藻也。晏从循故事，丁专揽大权，勒捐富户。王恃何根云制军为门生，以故恣自逞，丁雅善经学，所交通人遍海内，且有保障淮安之功，毁誉参半。惟王所部，练勇暴等群盗，搜牢虏掠，以其上者献王。江南逃难渡江者，率诬以匪，杀之没其资，妻其妇女。根云被逮后，凶焰稍戢，然怨者衔之入骨。晚年中风不语，群妾宣淫于前，或批其颊为乐，报极惨酷。丁为陈某控列罪状，奉旨逮捕，拘于邵伯雷副都以减营。经祁春浦相国面奏文宗，贷其一死。后得优游林下，著书自娱。晏晚为扬州书院院长，皆享大年以终。

王 文 敏

福山王文敏公懿荣，前清光绪庚辰进士。王素负博雅名，居京师久，士子公车入都，咸得以一识面为荣。王答拜刺用三种：平平工制墓文者，用楷书；稍知古今学，不名一体者，用隶书；转精汉学，旁通金石，用小篆。此歙县汪仲伊先生为余言。汪与王为同年。余问曰：“王与先生何如？”答曰：“用隶书，尚是看同年面子。”因大笑。庚子之变，文敏竟以身殉。流传翰墨，声价愈重。礼臣议谥，得谥“文

敏”，雅称其为人。虞山钱氏僮，宏光补谥，董玄宰以风流人物，继迹承旨，得谥文敏。是时恤典杂乱无章，独仅玄宰之谥，庶无虚美。余谓清德宗末年，谥典颇亦杂乱无章，惟文敏之谥，而无虚美。华亭张照、武进钱维城皆视福山为逊云。

许仙屏河帅遗事

许仙屏河帅官宁藩日，一切循承故事。委任处分，先行后咨。制府垂拱，仰成而已。侍制府曾忠襄为吉安旧府主，且世叔也。忠襄初亦忍之，谗人交构其间，猜嫌日生。忠襄将于年终考语，少示贬抑，循例转京卿去矣。许微知之，旁皇无计。六合知县姚允平，忘其名。素号智囊，许心腹也。召与计议，姚请建文正书院，可以解结。许曰：“无资奈何？”姚云：“官有养耕牛费，可以借用。”许从之。落成之日，请忠襄主祭。许陪祭，伏地恸哭不起。忠襄心动，捐除前事。荐章上，许升擢河东总督。姚以此权大县，获资数万。余识许幕府旧友，告余如此。

刘葆真遗事

葆真名毓麟，壬辰会试，改名可毅。冠南宫，里巷炫卖题名小录，误刊为“可毅”。果于庚子拳勇焰炽时，乘车往通州，半途为贼所害，并夷其尸。其从弟树屏字葆良者，使人持相片遍觅不得。盖葆真在大学堂昌言拳匪祸将败国，彼党仇葆真甚，因肆毒刃焉。余于癸巳夏晤葆真于清江浦，略同饮燕，赠余乡会试朱卷一册。别后，葆真往河南，谒许仙屏河帅，此后遂未见也。戊申己酉间，与葆良相识，以葆贞事实册属余题诗。余作七律一首，其稿失去，记用晋闾邱冲事，与葆真事相仿佛。今检《世说·品藻篇》刘注引《兖州记》，以示知葆真者抒痛也。记云：“闾邱冲字宾卿，高平人。博学有文义。

闻义不惑，当世莅事，务于平允。操持文案，必引经诂，饰以文采，未尝有滞。清名令望，为光禄勋。京邑未溃，乘车出，为贼所害，时人皆痛惜之。”京邑谓西洛京。

蒋叔起遗事

江都蒋叔起起伯，道光乙巳会元。官广东潮州府时，引疾归。诗学苏长公，律体短钉酷摹樊榭而失其真。叔起幼慧，与兄继伯齐名。家世甚微，县试齟齬。诸城李方赤先生璋煜，廉其状，奖而掖之，群小屏迹。方赤引至衙署，教以作文之法。叔起每晨必到教场吃茶，方赤阻之。叔起避至下街，方赤乘舆出北门，至茶寮命从者呼蒋出，责其无状。叔起自搏悔过，由是闭门读书，擢高第。叔起罢官后，但与方子箴运使日以斗韵为事，诗益不工。没后无子，扬州士大夫无肯吊者，足为休官归田不礼乡党之戒。其官京师，尚知风雅为事，诗文自有源流。后之扬，人不如叔起者层累而下，几不可方物。以今视叔起，则又若天际真人矣。

与金蘅意论悲溁阳诗

余著《拭觚》，仿晋裴启之《语林》，兼论同时人物。泰论金蘅意名弑，余石交也，阅报见余《悲溁阳》诗，谓如睹异宝。在渠视之，即宝华庵中物也。移书来质所疑，余答书云：“详《悲溁阳》一诗，自诡为异日诗史，此公泛骛风雅，胸无所主，潦尽潭清，本质自现。详以王涯、贾师宪相况，特以其巧攫豪夺，同归一劫。断章取义，古人本有此例，非竟以师比渠也。‘指挥狎客承下风’，‘出山富贵甘为奴’，固自有人，足下可揣摩得之，亦非专指某君。盖我辈议论，不可稍示假借，一有低昂，即为后世丛诟之端。昔杜老《悲陈陶》，不肯为房公掩过。韩公《永贞行》，至诋刘柳为私党，王厚斋推为公论。详援杜、

韩两公自解，足下幸无见责为幸。又承问庐陵、鄱阳及卞、宋两中丞事，庐陵谓欧公《集古录》，鄱阳指洪氏《隶释》，皆金石著录家；兼用东坡‘他年刘郎忆贺监，还道同时须伏膺’诗意。朱竹垞《论画和宋中丞》第十二首：‘妙鉴谁能别苗发，一时难得两中丞。’自注谓：‘宋公暨闽抚卞公也。’案卞名永誉，著《书画汇考》六十卷。夫以牧仲令之比浚阳，是谓举其所长。至‘泰山鸿毛’以下，哀音促节，自谓不减梅村《鸳湖曲》。足下虞入，故贡其狂言，恃惠子之知我耳。”余此诗出，颇有病余昔籍浚阳馀荫，议论甚苦，似不为浚阳地者。故于复金君书，发其旨云。

记张子虞观察语

张子虞观察管理苏州学堂时，余曾见之。后为江苏通志局总办，间偶谈云：“鹿文端官陕抚，赏识两人，一柯逊庵，一樊云门也。余官湖南学政，巡抚张煦蓄怒于余。初见，问：‘与张南皮有旧否？’答曰：‘是丁卯座师。’又问：‘贵乡王石夔相识否？’答云：‘不仅相识，兼有连。’自是来往公事，日形齟齬。诸生不率者，理应学政主政与巡抚会衔，张必挠之。张去后，继任吴清卿，旧好也，相待亦异。故事，学政出棚，夫役多至四百人，余核减至二百人。州县有诬揭诸生，余斥不允；州县衔之，禀余多用夫役，不堪供给。吴以函告余，有云，‘若能于仆从经行之处，不过需索，则州县受福矣。’余大怒，到省封学政关防，诣吴请具折揭参，听候查办。吴称荒唐再四，复经同人劝阻乃已。由此观之，柯、樊之得鹿者，幸也。”

徐季和劾张文襄

张文襄以“中庸之为德也”一节文擢解。至庚申会试题“大学之道”四字，徐季和致祥，直钐张文冠南宫，但改“中庸”为“大学”耳。

文襄是科被黜。徐通籍后，与张文襄如尹邢之避。一日，卒遇诸涂，季和以袖翳面，而文襄遽前挽其腕戏之。京师喧传其事，徐由是衔张。后张官鄂督，季和劾张，至举其寿李文忠文中“舞袖回旋”，为丧心病狂之语，阴示报复。相传徐疏稿出会稽李爱伯手，李与张亦情好不终者。徐折上，奉旨交李瀚章、刘坤一查复。李勤恪复折有“世每有文字渊源，昧心反嗤”云云，亦不直徐以前事相及也。徐长躯耸立，状如北人，简放浙江学政，过清江浦时，余曾见之。此事人多不得其详。余之录此，以为文学中之雅闻，非轻诋也。

白练裙剧本

《白练裙》杂剧，休宁吴非熊、新城郑应尼合撰，以嘲马湘兰者。吴名兆，喜为传奇词曲，一时游冶少年，推渠为帅。此剧既出，青楼人皆指目，有樊川薄幸之名。《板桥杂记》言：“郑应尼公车下第，游金陵。时南曲中马湘兰负盛名，与王伯穀为文字饮，遇应尼不以礼。应尼作《白练裙》杂剧，极其谐谑，召湘兰观之，微笑而已。应尼轻薄儿，思欲染指禁脔，宜不值湘兰一哂。”王渔洋《秦淮杂诗》：“新月高高夜漏分，枣花帘子水沈熏。石桥巷口诸年少，解唱当年《白练裙》。”即记此事。此剧传本甚少，缪艺风先生云：“钱塘罗矩字千秋者，曾在江西睹此曲本，后未再见。”应尼名豹先，江西南城人，与钱牧斋为同年，万历庚戌进士。不审彼中藏书家尚有此书否？又案，应尼书出，李九我署南礼部，追书肆刻本，毁其版。则在明时，此书亦罕见。语见沈景倩《顾曲杂言》。

谢子受先生

子受先生名元福，广西临桂人，同治辛未翰林。光绪己丑，补授淮扬海道，观风两府一州。余以《拟阮籍咏怀》、杜老《咏怀古迹》及

《竹枝词》受知。辛卯往谒先生，留为书记。时诸幕宾，皆衣服丽都，余笼东朴野，蒙加礼异。性好购书，有书贾至，必委余决择。藏书四百篋，属余司其钥，分别部居，始有条理。先生好谈医。一日，衙参漕帅松椿，松病甫愈，先生劝服琼玉膏。松问出何书？以《洪氏集验方》对。先生回署，即遣铃下取书。先生甫卸外褂，惶急不知书隶何部。亟召余往，告以在《士礼居丛书》内，先生大喜，付铃下复漕帅，谓解其窘也。先生官淮海久，性懦弱，小人夤缘为奸，先生不免假借之，为其受过。刚毅奉使下江南，劾先生滥刑，罢去。后再起，复以请开海州矿，为张文襄劾罢，恐于其中影射洋股也，时先生已老贫，不能回籍，仍居清江浦，抑郁以终。余寄一诗挽之云：“淮水东流感逝波，北游日复叹蹉跎。异乡客死唯蝇吊，穷巷门深有雀罗。白首敬通赍恨没，素交到溉负恩多。升堂虽晚居宾右，昔日西园忍重过。”丹徒陈君祺寿，赏余此诗，谓有古人不忘府主之谊。所谓到溉者，由先生卵而翼之，历典大州，拥资十馀万，捐升道员，先生存日，既无凉秋及时之酬，又无西华葛屦之恤，易姓以后，嗒然若丧。思所以负先生者，应视余诗为刘峻《广绝交论》矣。

周 左 麾

周左麾，上元人，由癸巳举人官河南南阳府知府。履任才三月，为陈小石中丞劾罢，非其罪也。余与左麾定交于淮扬海道署，升堂拜母，亲若昆弟。左麾罢归，皮书满楼六楹，其下会宾客。所居在燕脂巷，自署门联云：“呼龙耕烟种瑶草，驻马衔杯问谪居。”以寄其无聊不平之意。左麾举戊子科优贡生，同年中朴学如江建赓、陈惕庵、谢锺英皆早世，左麾亦被严劾，于戊申十二月病没。藏书俱归洪幼琴，虽无宋元本，皆佳槧也。左麾好书，由余一言导之。自是每有所得，远隔千里，亦函书相告。左麾有《孤鹜赋》，后求之不获。左麾所奉府主为谢子受观察、刘景韩中丞、张香涛制军。左麾于壬寅随南

皮来宁，余赠诗有：“累欬请为陈前事，压雪严更剔灯穗。检书才罢歌吴诗，邱嫂闻声撼不睡。”又云：“栖鸦流水萼子妹，可怜亦署霜砧纈。”盖左麾在清江浦，与余深夜倾谈，检书互举其概。诵梅村《永和宫词》抑扬宛转，闻之凄咽，其孺人隔房微咳，促其就寝，左麾阳若不闻。又左麾妹，端慧善读书，能背诵蒋苕生九种曲，早寡，依兄为命，故以纪映淮为比。《易》“归妹以须”，正义谓妹为须，余本之。左麾在清江眷一妓，集义山句赠之云：“相携花下非秦赘，新得佳人字莫愁。”此亦左麾韵事也。

王西溪诗

盐城自得县以来，以诗人名者，宋邵臣曹、孙箴庵一致、刘水心沁区。宋规放杜陵，好撑高调，语有犷气；孙章句谐畅，一览即尽；刘五律步趋文房，苦无变化，皆未饫余之望。今年家居，为王氏修宗谱，获见其远祖信字西溪者，诗集附谱后。其人官进贤县主簿，以忤长官自劾归。旧与唐襄文顺之稔。襄文视师盐城，枉过其庐，亲为其集制序，而襄文集未载，盖襄文次年即病没通州，遗稿逸去故也。西溪诗有佳句，如《塞下曲下荆川》云：“阳羨龙韬二十霜，一朝专阃视边防。营中不用征飞将，厮养犹能搏虎狼。”五言如：“林鸟知昏晓，山云辨雨晴。”“看镜伤时遇，抽簪与世违。”“山泉鸣晓月，辽雁度寒云。”皆自然清绮，不烦雕琢。其《挽荆川》诗自注，言“荆川临终，青天有霹雳之声”。又言“荆川练兵，每兵养猴犬各一”，此事为纪载所无。余录西溪诗，见宋、孙、刘三家之前已有此人，交游未广，无推挽之者，著于余书，所以扬幽光也。

丙戌戊子文字之交

光绪丙戌之交，王逸梧先生为学使，按临泰州，兴、东、泰三邑

人士，同以文字受知先生。若泰州袁淡生銜、李极轩星南、卢希吕求古、东台汪作舟济、夏虎臣寅官，余与同县顾石孙硕，并定衿契。时淡生为魁，雌黄月旦，出其一言，其意气，公然笼罩人也。淡生如深山大泽，字育万有；极轩如璞玉浑金，精气内函；羲侣如魏晋年少，风神谐畅；作舟如熊羆呈欲，姿态横生；虎臣如鹤立鸡群，轩轩霞举；石孙如长河直泻，千里一曲；余则如市鲑村酿，差可献酬。戊子秋试，淡生、作舟、虎臣同举。虎臣以庚寅入翰林。淡生屡试礼部不第，廖仲山枢府荐以应召，选授浙江景宁县知县，旋卒于官。希（羲）侣由优贡官甘肃，不相见者二十馀年。极轩充丁酉选拔贡生，病瘵以没。作舟罹疫，相继下世。石孙官河南，甫摄一县，鼎新以后，仓卒东归。虎臣致官知府，寢得志矣，降同白望。余幸逃皖劫，多病呻吟。逸梧先生，年逾七十，闻亦窜迹平江山中，绝景吞响。师友之间，沦替如此，可为太息。悲夫！涸鳞响濡，本自相依；孽鸟回翔，詎无旧念？人间何世，天道宁论！秋灯书此，不禁泪之渍纸也。

黄仲弢学士

仲弢学士，余入学受知师漱兰先生子也。先生没后，余有谏，由京师友人属叔颂编修转致其兄，因是仲弢颇知余。仲弢客鄂，余寄一诗云：“汉殿传闻近太清，侍臣晓露挹金茎。丐祠官观叨恩泽，浪迹江湖识姓名。灵琐欲留淹日莫，疏林遥折剧含情。东曹西掖应回首，好听君王问长卿。”仲弢得书，叹味不置，复书凡数百言，藏余篋中，为鼠啮尽。昔为仲弢编《蓼綏阁集》，不及补入，至以为憾。壬寅，仲弢随张文襄来江宁，欲招余至两湖学堂，余以已受蒯礼卿聘辞之。仲弢官湖北提学，张文襄筹办存古学堂，招缪艺风及蒯礼卿至鄂，共定存古章程。文襄时来学署谈论，宴客亦假于此。仲弢久病甫愈，酬应疲茶，竟以是死，可哀也。仲弢遗集，经余审定，此事自有本末，见余笔记中。名“蓼綏阁”者，杨雄《方言》：“荆扬之间，凡言广

大者，谓之恒慨；东瓯之间，谓之蓼綏。”仲弢集名以此。温州故东瓯地也。

施均父爱士

施均父补华，湖州人。同治庚午举人，古文最佳。从左文襄西陲，保至道员，复以文襄劾罢。后经张勤果奏请开复，以道员留山东，未几卒。咸丰七八年间，均父馆湖州钮氏。余昔所识盐城江君濯锦，流冗贫食，展转至湖州，寻亲未遇，憩于佛寺回廊下，时已岁暮。江携有书篋，不过时文短书而已。施挈钮氏二学子来游，见江，怜其状。问：“能作诗文律赋否？”答曰：“粗能之。”施命以“漂母饭信”及“故天将降大任于斯人”一节文赋题，属翌日呈。江如之言。施改窜大半，命重誊。优加奖语，持示诸世族中，岁除诸家以糕果压岁钱就寺餍江，相属于路。施语赵忠节公景贤，请留江就湖州试。忠节曰：“渠江北人，自应回江北考试。”因此未果。忠节时已办团练，江能道忠节遗状。江后归北，施醵金赠之，并附一诗。有云：“妻不杜陵仍瘦面，子非王霸亦蓬头。”又云：“怕说尚书诗句好，绿杨城郭是扬州。”余闻于江，年甫十四五，未能尽记也。江后为廩膳生，伧楚鄙陋，不知何以获施一盼。盖施爱才激于天性，如雨露之不择堦坵。今求如施者，鲜矣。施卒官后，余偶见江，语之曰：“子昔为施君存恤者，顷施已下世。”江不为动，乃叹知己忘恩。此事亦须就古人求之，风俗之衰，已非一日也。

庚戌九月大观亭之集

余庚戌客皖，方伦叔先生约九日登大观亭，同游者朱先生孔彰也。姚叔节期而未至。余与两老乘肩舆，过清水塘，观余忠宣殉节处，折赴长啸阁小饮。坐毕，叔节适至，畅谈甚久。余即日有长句呈

三君，两老皆有和作。惟叔节将赴京师，匆匆未成。辛亥，溧州仲甫方伯连早，重修大观亭，丹青炳焕，气象一新。余屡以病喘，竟未再至。今日思之，如孙兴公之冥搜吟想，不可得见也。余有诗云：“大观亭上作重九，高处何如太华峰。我从二老蜡游屐，薄值喘息翻龙钟。皇天不畀济胜具，虽有五岳无由逢。历览得此亦壮观，类濯齿发开心胸。江流滚滚洗秋练，山势蜿蜒趋群龙。壁立横綰吴楚钥，时平久绝兜铃峰。故事静从两君问，忠宣埋笔湘乡封。”时余病起，作此诗颇具豪兴。去年八月后，仲老逆走临淮，伦叟屏居上海，叔节逃归桐城。方、姚两君，闻人且欲得而甘心焉。余幸未当浚军之乱，然亦亡书三篋。自计此生大观之游，将不可续。叔节年甫不惑，或有见时。仲、伦两老俱同暮齿，脱获再见，则摩挲铜驼道往事，直以先人拟之矣。

汪梅村先生

梅村先生有冯敬通悍妇之厄。每值不豫，必令先生长跪，自批其颊。惟畏洪琴西。一日，逢彼之怒，势不相下。琴西猝命亲兵以肩舆迎之，藏先生于涂仙朗舟中。妇大索三日不获，既知为洪所为，则宣言：“渠若不出，吾将其著述诸稿焚去。”洪闻窘极，因送先生回。妇诟之愈甚。蒯礼翁又说先生一事。蒯寓江宁，冬日清晨，先生披短袄叩门甚急。蒯延入，问：“何事？”先生气不相属曰：“家难！家难！”蒯命仆曰：“汪太太来，阻之。”未几果至，置于门，蒯仆不应，色沮而去。汪仲伊先生言，渠在采访忠义局时，值曾文正欧阳夫人生日。杨仲乾、陈虎臣属汪曰：“此间须梅老作一寿文，请君言之。”仲伊诣汪，告以来意。梅老作色曰：“古无寿妇之礼，不但我不作此文，诸君亦不可作。”汪默然而出。既而梅老以寿文进，隶事精切。仲伊怒：“此老非人，何忽见卖？”继访知，梅老盛色折仲伊，时妇于屏风后窃听，随责梅老：“古何以无寿妇人之礼，然则妇人非人耶？为

我速作一文，须将古来应寿妇人罗列其间，否则吾与若不甘休也！”梅老惧而为此。仲伊后告琴西，琴西曰：“此妇应为霍小玉后身，梅老即李十郎也。”相与叹息而罢。

任子田先生身后厄运

吾乡任子田先生大椿，官止御史，年甫五十而卒。无子，有继其后者辄夭绝，因之纪文达笔记中轻信诬蔑之语，为子田玷，非其实也。子田著《燕禧堂五种》，版存任氏，光绪初尚可刷印。子田墓道傍农家场地，碌碡声时震于幽宫。余昔闻任驯斋言此，常为恻然。甲辰客扬州，请于蒯礼卿观察，言之恩新甫运司，捐贳取任氏书板，置淮南书局发卖，而以捐贳畀任氏，别建农场，留其余生息，为岁时祭扫之费。蒯君并属余致书兴化陈晓珊大令，招同任氏诸君商之。陈以蒯意告诸任，皆相覲有难色，或云家集不可作官物。陈复书如此，余告礼翁，惟有感叹而已。今日板为蠹蚀空，腐不能充爨材，任氏亦未闻有移农场之举。信乎，先生运之穷也。

李爱伯张文襄诗

宋严羽创“诗有别材，非关乎学”之说，空疏耳学之士，籍以自便。吟风弄月，流连光景，大半筐篋中物。一遇郑重题咏，扬榷今古，即瞪目腐毫，莫敢应命。《诗》三百篇，虽妇人女子，皆娴雅训。《古诗十九首》，以第一首论“生别离”，用《楚辞·九歌》；“胡马”二句，本之韩婴；“浮云蔽日”，又陆子《新语》也。大抵虚实相间，前有浮声，则后须切响，为诗家不易之旨。国初之诗，以朱、王为大宗。竹垞隶事清新，铢两悉称。阮亭贪使事实，而情意每有不属，故为秋谷、潜邱所讥。初白薄弱，樊榭伤于典实，两失其平，俱非正轨。瓠北病与樊榭相似，而工致不及。钱詹事大昕序《瓠北集》，发明朱竹

垞纠严沧浪之说，而归于“有真材别趣”之说，以免于“祭鱼点鬼芥，骆驼掉书袋”之诮。数十年来，吾持钱氏之说以衡作者，则李爱伯、张文襄诗，庶乎近之。爱伯诗，久有刻本。文襄诗不多作，俱典赡道美，意与词副，事与人配，虽托体不高，究不愧为一代作手。余本非南威，妄议淑媛，然诗家流别，味之数十年，雅有所得，辄因李、张之诗揭其指；亦如王弼州素不工书，而自诩善于评书，谓腕有羲之鬼也。

诗学将衰

七八年前，蒯礼翁于苏州见汪柳门侍郎，曰：“近日书坊无《诗韵》卖，子闻之乎？”蒯云：“似不至此，老前辈无乃过言。”后回上海，遣人问书坊，果无此书，告余以为异事。余谓自乾嘉以后，诗学凡数变，其间以惜抱先生源流最正。嘉庆诗人尚才气，大抵承随园谄习，以聪明俊快议论为诗。船山、兰雪二派，互为雄长。又有学浙派者，横亘其际。道光朝，梅伯言倡学韩、黄，参以大苏，如黄树斋、孔绣山、朱伯韩、任子贞、曾文正、冯鲁川、孙琴西，皆奉梅为识志。梅去京师，叶润臣倡为五言，与其同门生孔宥函，善用平韵，殊有雅音。而其师潘解元德舆，专宗杜陵，以禄位不能动人，虽有张享甫和之，风气迄不为变。润臣官浙后，京师贵人改为学苏，或兼考据，近师覃溪。其下者，仍不外船山、兰雪，如摩登伽咒之易为所摄也。当咸丰中，湘绮王先生命世间出，各体兼工，七言似高岑，跌宕处直入少陵阃奥，五言学选体，五律一以杜陆为归，七律似空同于鳞，而武岗邓弥之先生和之。初刊《白香亭诗》，诗最佳，续集不在此论内。以傅长汉诗例之，真可谓“双鸾游渚，二离扬辉”矣！独山莫先生子偲，诗亦学韩、黄，间有清矫绝尘之作。虽不免摹拟，然就当时鲤鲜杂陈，而蔬笋可口，自然果腹，亦为上也。后来之秀，薄厌唐体，而趋学宋。北宋则宗后山、半山，南宋则一屏务观而尊诚斋、后村为祖。意取清

微，兼标兴象，似明公安、竟陵，而去其纤仄，高者为世所称。甲午以后，文宗定庵，诗亦善之。七绝龚派，遂蔓延海内。近数年来，又有所谓昌谷、义山派者。学昌谷，则牛鬼蛇神，重以无理，茫然不识其义所在；学义山，则无题侧体，烂然溢目，而谬云结念君国。其显有《柳枝诗序》之自发其核者，往往而是，高明点定，相率假借之，沧海横流，渺无涯涘！诗道既衰，国运随之，乌狗重陈，益为世取羹矣。昔宋崇宁后，时相不许士大夫读史作诗，陈去非以《葆真宫池避暑》五言一首，不过规摹山谷，一时坐上推为擅场，传写遍京师。见《容斋四笔》十四。吾恐中国异日，求去非不得，将出一胡钉录，庄定山辈群将铸金事之。诗学之衰，萌芽于此，可叹又可痛也。

二研堂缘起

乾嘉诸老，著书广博无涖，一屏矜张虚矫之习。接人以槪，使人心领神会、悠然自释者，吾得二人焉，曰钱少詹大昕、阮太傅元。阮视钱文词稍逊，然每事必尽其语，唯恐人小有未悉。昔人大司马子长功德，吾谓两先生其功德不小也。《潜研堂集》原槧本，吾三见之，有顾南雅所书上木者，长沙龙氏刻本，比原刻较狭。《研经室集》，吾得足本，有阮亨梅叔印记。太傅晚年诗文，随作随刊，分经史子集补入。文以有《顾亭林祠记》为最备，余藏本缺此，从缪艺老本补入。二书携以自随。辛亥客安庆，暑假回里，徇吴棣轩提学雅意维系，留书三篋。浔军之乱，书为偷儿擿去，或云为湖北李君明卿所匿，疑不能明，此二书并罹其劫。余闻之挥泪，几有宋公闭门目肿之痛。昔者署侨居西一室曰“二研堂”，仿彭尺木《二林居》之意。今二书既失，与友人书强自署为“二研堂主人”。友人来问所指，故记于此。

惠定宇称小门生

惠定宇为经学大师，注渔洋先生《精华录》，署“东吴小门生惠某”。盖其父惠天牧士奇，为渔洋弟子也。定宇经生，乙丁两部之书，雅所研究，故于史有《后汉书训纂》，于集有《精华录训纂》。注《精华录》，凡例最严，而不能自守其说，致为《四库提要》所讥。然于渔洋同时人物，言之甚详，往往不减任天社、施武子之于黄苏；小小故实，又其后也。余壬寅至苏州，访先生之后，云有一支寄广东。复有一友云：某年，先生后裔自他省归应试，某廪生攻其冒籍，其人称冤。此廪生不知有惠红豆，亦为一奇。余时在学士街买得张宗楠所编《渔洋诗话》，故余《苏州杂诗》中有一首云：“顺康人物见新城，诗话新编照眼明。忽忆元和惠红豆，经师肯署小门生。”谓此事也。

谭复堂先生

余有句容门生经君家龄，以县丞官浙江，屡书来告：“谭复堂先生为诂经精舍院长，负时望，何不函所为文，请谭君为玄晏之序《三都》？”此庚子年十二月间语也。余感其意，写文二十馀首，令面谒先生。先生患臂痛，扶一婢出，视经有加礼。亲作札复余，淡墨欹斜，极有古趣。评余文云：“熟精选理，自铸伟辞，无从来旁采肱篋之敝，当制序以张之。”辛丑五月序至，有“年已七十，不能妄叹”之褒。此序在余文集之首，并文数十首为樊云门方伯丢失，余移书樊君索之，卒不答。盖有古帖投溷之惨，合余而三。今先生原稿尚未检出，余有负先生矣！余复书去，而先生已没。余寄挽诗云“书报秣陵垂尽日，死当汉代中兴时”是也。经生往吊，见两诗，一为余诗，一为宋平子诗。先生有数子，长名宝瑜，字子刘。

唐尉迟乙僧天王像

尉迟乙僧天王像，项墨林故物，有子京亲题，藏于仪征张氏，由张归于蒯礼卿观察。标其购值，张某以价之廉也，改十为千，蒯病见同狙佞，深以为恨。端甸斋在江南，从蒯假观，未许赠也。后蒯自欧州回京，告假归里，端时罢直督，置酒祖饯，谓蒯曰：“天王像在此，携去何如？”曰：“暂留君处可也。”蒯后告余：“爱此巨迹，终不忍赠。因渠失势家居，遽携归，颇伤友道，故以暂留作圆通语。”近观李君文石《论画诗》，竟以此为甸斋所藏。盖甸斋本欲效王子围不反之假，李君据实纪之耳。蒯、端俱下世，此画又虑失所矣。

杨果勇侯

果勇侯杨芳，以钦差大臣赴粤，道经江西，自巡抚以下郊迎，官厅供张甚备，椅垫皆绣缎者，侯坐食时许，适巡抚命从者撤垫，视之则虬虱蠕蠕，至不可数。巡抚问故，告言从征张格尔时，不解衣卧者数月，遂生此疾，虽易新衣亦如此。余族侄香树时客江西学使幕中，亲闻其事。香树告余在光绪二三年间，年已七十馀。

张文襄金陵杂诗

张文襄以甲辰与江督魏午庄制军，会勘湾沚工，驻节江宁月馀。每日乘肩舆历览名胜，得诗数十首。至鄂，遣材官送张子虞观察，属传示诸门生和之。蒯礼翁以文襄诗示山阳段君笏龄及余代和。段有足疾，余为其和金陵杂诗十六首。礼翁不易一字，叹为温雅。余稿藏篋中，今检未获。记其第一、二首云：“龙虎山川王气销，仓荒人物忆南朝。废兴七姓无馀子，剩觅清溪长板桥。”“上流屏蔽

拥荆襄，北负淮淝作战场。三百年中江表传，更无人语旧沧桑。”又有“可怜跋扈桓宣武，强迫兴公赋遂初”二语，此指文襄癸卯展覲后，为当事齟齬，久留不出，有“何不寻君《遂初赋》”胁迫之语。及礼翁任淮扬海道，与上官不合，欲投劾自免。艺风先生以书告余曰：“‘可怜跋扈桓宣武，强迫兴公赋遂初’，此礼卿诗也，不觉成讖。”余语艺老，此余代作，当时别有所指，礼翁补官尚未有萌芽也。艺老叹以为奇。

刘霞仙中丞

刘霞仙中丞，以五品军功随骆文忠入川，即摄蜀藩，洊升陕西巡抚。霸桥一战，死者数千人，智勇俱困，后与乔勤恪公互相揭参，复辩蔡梅庵诬奏，词气亢厉，因此落职家居。卒后开复原官，附祀蜀中骆文忠祠。余取其《养晦堂集》读之，优游揖让，居然有极似曾南丰者。罢官读书，发为冲澂之音，可谓善于变化气质。惜其不复出山，而使海内未有尽用之叹。曾文正诗谓“四海一刘蓉”，又云“空山捉卧龙”，时霞仙尚困童子试，文正心折如此，其必有以取之矣。

杨仁山居士

仁山先生为研究佛学之耆宿，数十年来，海内翕然宗之。先生本名家子，父与曾文正公同年，官杭州知府，晚主讲安庆敬敷书院。卒后，马雨农学使继之。先生当文正驻安庆日，委办平糶局，与涂朗仙同事。自言二十以前，声色狗马，无所不好；二十以后，始醉心西方之书，老而不衰。少好吟咏，曾有句云：“客味鹅儿酒，乡心燕子鱼。”燕子鱼，石埭所出也。癸卯遇先生于蒯礼翁座上，礼翁治伊蒲之馔款之，先生谓然。余后以赵凡夫、悉昙、章阁托、陈宜甫问先生，为析其义。去年闻先生下世，南北戒严，不克偕宜甫及李晓墩膜拜

遗蜕，与未助礼翁执紼之役，俱为恨事。

谢麟伯编修

谢麟伯编修维藩，巴陵人，生长陕西，曾官山西学政。诗学李于麟，格高调响，陆襄钺为刊行。谢以染疫卒于京师，同人因其先世葬陕西，舁麟伯柩附焉。麟伯无子，以从子为后，捐职典史，需次陕西。鹿文端官陕抚日，张文襄电请鹿恤其后，遂属藩司委谢署某县典史，实陕西第一优缺也。

卞忠贞墓

江宁卞忠贞墓，在朝天宫西。余馆江宁书局，居红纸廊，去忠贞墓仅一牛鸣地。每谒墓下，辄想昔日峰距之状，父子同为国殇，不似近时士大夫，唯以檀公走为上着也。墓依冶城山麓，墙垣陟卸，无人过问。《南史·何点传》：“从弟遁以东篱门园居之。园有卞忠贞冢，点值花冢侧，每饮必举酒酹之。”今则左右皆饿隶居矣，曾赋诗吊之云：“松桧吟风罨昼阴，苔延残甃碧沈沈。千年杯酒无人酹，孤负庐江处士心。”即用点事也。

顾亭林诗笺注

山阳徐宾华先生嘉，同治庚午举人，笃嗜亭林先生诗，为之笺注。甫刻成，先生即属点勘，为补白数十条，已具刊原诗下，而未标余说。后刻补遗，载段笏林及余之说，作“段曰”“李曰”者，大半皆非余言。余说皆考事实，据摭字面非余意也。先生此注，于时事考据最备，然有时将亭林自注混入本注中，而待补者亦夥。一人之力，何能尽之，不足为先生病也。余为之撰序，极推先生此书，有云：“遂令

务观杜口，惭诒凤巢。”用放翁《施注苏诗序》，示余之谦。先生年八十馀尚在，别已八年。所著《味静斋诗》已刻，与余倡和者，皆在续稿中，先生客盐城时作也。

吹网录鸥波渔话

吴县叶调生廷琯，著《吹网录》、《鸥波渔话》两种。咸丰以来，工为子部杂家言者，推先生为最。《吹网录》考据精审，议论抑扬，咸有忤然忠厚之意。《渔话》虽近诗文评语，怀旧思古，文采彬蔚，不为标榜之词，有同市利。此二书者，期于不敝天壤。先生为陈云伯婿，诗集刊入潘文勤丛书中。先生避兵上海，同治初元尚在。余友丁君秉衡，曾见先生朱履扶杖，神采翩翩。此书刻于吴门，久不印行。徐君积馀言板藏某孝廉家，如有人汇刻丛书中，庶几不负先生著书苦心。余幸早购此，客中每携以自随，所谓二友也。

黄子寿先生

黄子寿先生彭年，主讲保定莲池书院，手定堂规，广置书籍，课以时文经史词章，门下斐然，著录者甚夥。先生请于李文忠，以官赏购各直省书局刻书，于院中发卖，仅加运费之半。暇时即召诸生讲艺。先生无志出山，由文忠密保，简放襄郟道。诸生人贺，先生笑曰：“吾守节多年，今日不免嫁人，奈何？”此正定崔尚之为余言，崔时在院中。崔言地本元张柔故宅，规模宏敞，为北方书院之冠。继黄为院长者，武昌张廉卿裕钊、桐城吴挚甫汝纶。

陈 惕 庵

盐城陈惕庵玉树，以孤生崛起海表。博闻强识，志行卓然。以

史学兼经学，为文皆见实际。文宗《鲒埼亭集》，而较有畔岸。惕庵于经有《毛诗异文笺》、《尔雅释例》；于史有《卜子夏年谱》、《光绪盐城县志》；于子有《教育刍言》、《民权释惑》；于集有《后乐堂集》，著书满家。卒年仅五十有四。惕庵优贡同年中，如江建赓、谢锺英皆早世，惕庵继之。其得第尚存者，江宁魏家骅耳。惕庵受知师，为黄漱兰、王逸梧、黄元同、缪艺风诸先生。以礼聘惕庵者，则有岑西林制府、柯逊庵中丞、程雨亭都转、徐积馀观察诸君。惕庵文集，其友同邑马君为璵，官畿辅，移书于余，谓“重编惕庵集，非君莫属”，致写官之费二百贯。余数年来，核定不下百篇，皆可缮写。当时欲为惕庵谋儒林一席，今则已矣。惕庵之文，有过伤繁富者，有显触时忌者，余拟编为惕庵内外集，以质于世。惕庵与余定交，在光绪辛卯，其后益密，欢乐恤夷，历久无间。余为撰墓铭，艺风采入《续碑传集·经学门》中，厕于曲园先生及吾乡赵君蓉裳之间。余籍以报惕庵，庶几古人所谓死友也。惕庵光绪戊子科优贡生，旋中本科举人。从子名宗谌，谨守惕安家法，亦与余善。

卷三(拭觚下)

縲 病

余乡谓臂短屈不能伸者为縲膀。午桥中丞端方署江督日，徽州县致二人，送诣日本习普通师范。吾友顾听秋、成兰征往。兰征右臂拳曲，且折其一支，如悬赘然。作书画兰征皆用左手，故自号“左腕生”。一旦改服短衣窄袖，则右不能举，诸友多为兰征悔此一行。余谓表侄杨君甫臣曰：“《战国策》李牧病此，为木材以接手。曷放之？”而未能言其详。后检《秦策》，知吾乡所云縲膀即縲病也。策言：“武安君曰：‘縲病钩，身大臂短，不能及地，故使工人为木材以接手。请以出示。’出之袖中，状如振梱，缠之以布。”振梱不知作何状，然知其材为木，外以布缠之。录此见余说之有征，而性多遗忘，知非书不核矣。

成容若龚定庵

成容若、龚定庵，为清朝两名公子。容若有徐健庵、查初白、姜西溟为师，朱竹垞、高澹人、顾梁汾、徐电发为友，名章俊语，价重鸡林，不假《通志堂经解》为重也。定庵为段懋堂外孙，两世礼曹，交遍海内，绮纨附骥，齿挂通人。此两公子皆足自致千古，余每羡之。友人合肥李健父国松，生自兰绮，风流儒雅，宾从翩翩。余曾以成、龚两君比之，而不敢著于诗文，因健父齿逊纳兰，虑为语讪。健父年过容若，时遇于安庆，始为诗赠之云：“三万牙签插架新，难从计簿乞闲身。风流异代成容若，慧业当时龚自珍。幸舍加餐多上客，谓予开、

访渠诸君。谪台逃责愧诸宾。江南江北常相见，犹是栖栖一旅人。”附见于此，有深知健父者，当信余言非妄也。

莫子偁先生纳妾

子偁先生为曾文正公老宾客。辞县令不就，被处士服，往来吴会，颇饰简牍，谒当路，致其馈贐。客扬州，尝以数百金纳一妾，载之舟中，效范蠡夷光故事。妾本扬州瘦马，乘莫熟睡，攫篋金，自后舱窜去。莫属江、甘两令侦逻，数月不得。李雨亭运司谓程尚斋曰：“子偁老取吾辈钱，于此失去，一展转间，不为己有，何如多积书画耶！”此事余闻之歙县汪仲伊先生，汪闻之尚斋。汪，尚斋妻侄也。

大学士验人才

宣统庚戌，保举人才入京。经大学士验看，加以考语，改授部曹。水南水北，向以“山人”名者，皆供驱使矣。余尝有诗纪之云：“南郡诸生说上京，《后汉书·申屠蟠传》。东山果有济时情。谢太傅。宾贤枉被群公热，吴野人。是镜能高处士名。见《茶寮客语》。万柳新荷谁主客？冯文毅溥事。一丝九鼎费将迎。黄鲁直《咏严子陵》。坐中惜乏渔洋老，请诵当筵蛱蝶行。顾亭林先生事，见《古夫于亭杂录》。”余此诗，不免陷于轻薄，然从康熙己未宏词科开，犹嘲谤蜂起。其致余为此者，盖亦勉副其实也？

玉峰志校勘语

《玉峰志》上中下三卷，凌万顷、边实同撰。《续志》一卷，边实撰，附于其后。艺风先生以红样本属勘，云：“原书亦有误字。”因视原钞，有不误者，有传写尚可辨其形似，而红样本误改误阙，不可不

正之。如卷下“黄由诚应纪”，原钞本下有“图回经济”，校点者粘签于上曰“图回疑”；红样本改“回”为“维”。不知“图回”出《荀子·儒效篇》：“图回天下于掌上。”是原钞本不误也。《续志·谢公应跋》有“幹乘周鼎之疑”。校原钞者于“幹乘”外作方围；红样本因阙刊此二字。又卷上：“昆山陆机居此。机《思乡诗》：‘仿佛谷水阳，眷恋昆山阴。’”案：《文选》卷二十四，陆机《赠从兄车骑》诗：“仿佛谷水阳，婉恋昆山阴。”而修志者改为《思乡诗》，又改“婉恋”为“眷恋”。此皆待勘于后人者。边实《续志》于《人物》后，继以《自序》，如史公、孟坚之例，序其先世独详，而末云：“属摄令谢玉渊以书先讳。”盖实已为县人，陈留书其地望耳。此《自序》为县人一手修志之例，而书讳亦古人碑志之填讳也。自序云：“其先世名肃者，为咸平、景德名臣，一时人才号为二十四气者，肃居其首。”此明末二十四气所仿。检日记此条，因录其校语，覆视尚不谬云。

俞曲园先生遗命

曲园先生于光绪丙午十二月二十三日下世。陈小石中丞以先生学行入奏，诏入国史儒林传。先生临终赋《自喜诗》七律四首、《留别》七绝十首。其孙用先生手迹石印附哀启赠人。尤奇者，以启代讣，另夹一刺，“俞樾”两大字，“辞行”为两小字。启云：“敬启者，德清俞曲园先生于光绪三十二年十二月二十三日考终苏寓正寝，年八十六岁。遗命不讣，留片辞行，并附《留别诗》及临终诗呈政。苏州马医科巷俞寓亲友公启。”右事前人未有行之者。有之，自先生始。其了然于死生，与随园《告存诗》迥别。传之后世，盖亦谈者所资也。

吴枚庵与稽斋丛稿

长州吴翌凤，字枚庵，工诗；善藏书：多精钞本，与鲍渌友、吴槎客、陈仲鱼互飧所无，名在黄尧圃之前。其自定《与稽斋丛稿》三十卷，未有刊本。同治乙丑，先华府君得于常州书肆中。精钞，有亲笔改定语，惜仅存诗词二十卷，计四册。枚庵诗宗渔洋，沿沈确士之派。东南劫后，由先府君得之，余力不能为之刊布于世。按其目录，写质于世，或有吴郡人物色及此，余当借之录副。稿前有韩封、张思孝、陈学海、虞敏诸序，又自序一首，题为嘉庆六年辛酉。今载其目录于后。卷一《纪年诗删》，古今体诗六十五首，改为五十首。卷二《纪年诗删》，七十四首，改为六十八首。卷三《无双集》，乐府四十首。卷四《辛壬杂诗》，古今体诗五十二首。卷五《东斋馀稿》，古今体诗五十八首。卷六《东斋续稿》，古今体诗五十二首。卷七《登楼集》，古今体诗六十七首，附四首。卷八《见山楼集》，古今体诗五十六首。卷九《据梧吟》，古今体诗三十八首，“据”改“倚”。卷十《宋中游草》，古今体诗九十三首。卷十一《庐云小录》，古今体诗一百五首，附一首。卷十二《抽帆集》，古今体诗三十首。卷十三《湘春漫兴》，古今体诗七十三首。卷十四《湘春漫兴》，古今体诗七十二首。卷十五《清浏杂咏》：古今体诗八十三首。卷十六《清浏杂咏》八十三首，附一首。卷十七《曼香词》，四十二首。卷十八《曼香词》，四十三首。卷十九《曼香词》，四十九首。卷二十《曼香词》，四十首。卷二十一《杂文》，二十五首。卷二十二《杂文》，二十四首。卷二十三《杂文》，二十三首。卷二十四《杂文》，二十一首。卷二十五至卷二十八为《雨窗怀旧录》。卷二十九为《诗臆》。卷三十为《楚游纪程》、《宋游纪程》，附《楚游赠言》、《借书图题词》、《拈髭索句图题词》。诗词俱有圈识，其删去者无之。间有西庄、竹汀、琢堂、耘圃诸家评语，录于眉端。惜《怀旧录》四卷，散逸不著；抑有好事者得之，矜为帐中之

秘，久之仍传于世，未可知也。

立 年

友人问：其乡某，年三十，诸友制扁为寿，扁俗作匾。文曰“望垂立年”，以“立年”二字为疑。余曰：此人学问甚不苟，陶诗“是时向立年，志意多可耻”，此所本也。魏晋至隋，多假《论语》纪年，如十五，则曰年始“志学”；四十，则曰年逾“不惑”，又曰行向“不惑”；五十，曰年已“知命”；六十，曰年垂“耳顺”；惟“从心”罕见人用耳。

张幼樵学士

幼樵学士，被议以后，婿于李氏，侨居江宁，颇为时流所轻。蒋诒姻王，无损清高之节，况文忠非王氏邪？此事须综本末论之。幼樵卒于癸卯正月，时余馆江宁，为诗挽之云：“霸台白简震朝端，废籍书空党禁宽。元祐旧臣甘屏逐，陈涛往事剧辛酸。秦楼列宅栖萧史，华屋西州感谢安。叹逝尚书频自念，并添忧国泪洊澜。”幼樵治宅未毕而死，南皮尚书时署江督，往哭极哀，且为之题主焉。幼樵得仁和朱氏藏书，冀以晚年蹉跎，暮志不遂。辛亥之变，黠贾暴徒，剽掠其第，精钞佳槧，悉索无遗，酬以贱值，利市赢数十百倍，诚书林一厄也。往者归安陆氏韶宋楼书，售予日本，余读岛田彦桢所记，有诗伤之云：“太常秘籍归丰润，善本图书乍眼明。未预楚弓忧得失，绝忧罟里与聊城。”今罟里瞿氏藏书无恙。聊城杨氏无后，垂没，请山东巡抚保护，其后不知何如。而所谓丰润者，先尽矣，哀哉！幼樵病喘嗽，服小青龙汤，大剧。北人腠理缜密，何以不耐麻黄？盖久居南方，体质渐变之故。余诗出，居停主人蒯礼翁见之，云借以挽张。读后四句，曰“不可矣”。因幼樵为癸未知贡举，例称师生，“秦楼”之句，非所敢施尊行也。

见 一 楼

余馆江宁，陶斋制府寄情风雅，一时属吏皆善自矜饰，投其所好。星期五夜，戟门之外，轩盖如流。故有淬视纓綬，泛咏皋壤，制府顾而和之，谓吾虽在朱门，如蓬户也。有观察某君，籍隶南康，于庐山筑楼数楹，请制府书扁，题为“见一楼”。用唐灵澈酬韦丹诗“相逢尽道休官去，林下何曾见一人”句意。某君后并宅献焉，制府未受；或云受之，不能详也。制府量移直隶，罢官后得完颜氏园治之，度置金石，几遂林下之志。蹶而后起，江南僚吏贺电相属，尽两日未毕。余在安庆闻之，曰：“祸其始此乎？”以时方汹汹，公为射的，以集流矢，愚者不为也。亦不意有资州之祸，如此之酷。“林下一人终未见”，是韦公明之后，又得陶斋负澈诗矣。右军誓墓，特以愤慨，况区区一诗，焉能激之邪！

翁叔平相国喜骂监生

咸丰戊午，叔平相国与潘文勤共典陕西试，故姻好也。当时人为陕西庆。二公并坐一堂阅卷，翁得劣卷，横抹，大声骂曰：“必监生卷！”潘言于翁曰：“来朝将与君分堂阅卷。”翁请故，曰：“子诚大秀才、拔贡生，我乃监生，不堪遭君骂也。”翁大笑，允改口。数日后，骂如初。是科有陆吾山^{襄城}于师门风仪最殷，欲刻翁日记，未果。余言吾山刻谢麟旧诗于艺风先生，先生告以此事。

晋东海彦璋墓砖

盐城县治西北九十五里收成庄，于同治十年十二月，耕者得古墓砖。启其藏，朱棺粲然。砖长九寸，广四寸有半，厚寸许，质粗而

量极重。有“东海王”三字，右侧有“仪熙三年”四字，皆隶书。余友陈惕庵玉树，新修《盐城县志》，考为晋东海王彦璋墓。其《考古卷》云：“古无纪元，仪熙者义熙，为晋安帝纪元。”原注：仪与义古字通用。《毛诗·楚茨》“礼仪卒度”，《韩诗》作“礼义卒度”。《周礼·小宗伯》“肆仪”，故书仪为义。《春秋》“邾仪父”，《汉书·邹阳传》作“义父”。安帝以会稽王道子次子彦璋继东海王冲为后，为桓玄所杀，见《晋书·东海王越传》，即其人。陈君从子宗湛，昔以此砖赠余，今尚存在家。

记震在廷

震在廷钧，满洲人，光绪壬午举人。前扬州府知府式梁先生英杰之子。在廷累世官京师，二百年来门阀，游谈者乐道焉。在廷以知县需次江苏，褒衣大袂，一望知为迂儒。然胸罗今古，多识前言往行，有叩辄鸣。著《天咫偶闻》、《香奁集发微》。辛亥八月以后，人谓在廷死矣。余闻之大戚，谓失此读书种子，奈何！后知其潜喙未出。在廷即不死，终必不为世所重也。今记其官甘泉时所言于余者，以见在廷居官梗概。在廷言：“屡至甘泉山访雷塘旧迹，尚见沟洫，远望北湖，地高于此，若引北湖水以溉雷塘，则甘泉高地，成为腴壤。”又言：“北湖阮公楼尚存，楼有九窗，窗各一景，文达署曰‘九景楼’。摹刻华山碑及泰山二十九字皆在楼下，嵌于壁间。文达后人，群利其楼之圯，斥卖材料，以供薪米。因牒制府，请即以此楼改为北湖学堂，官绅互管，以杜阮氏后人覬觐，令名贤旧迹，危而复存。阮氏闻之，亟将楼板拆去。适当交卸，犹属后任留意此事。”又言：“广陵厉王中殿石，嵌置扬州府学，及改学堂，为圻者幕以石灰，恐其焦裂。又尝至雕菰沟，访焦里堂旧居，其楼已属别姓，并蒋叔起所言之山茶花，亦无之矣。”以上皆余所问，在廷答之如此。嗟乎！使在廷当太平时，不且为一清白儒吏邪？

叶润臣遗事

叶润臣名澧，东乡先生之子，两广制府名琛之弟。由内阁侍读改官道员，需次浙江。咸丰己未卒于浙，不及见庚申之劫也。润臣家世华胄，官京师日，缟纈之交，遍结名士。居虎坊桥西，善为平韵五言古诗。受诗于山阳潘解元德舆。潘弟子孔宥函继牒，俱工五言。当道光之季，苏诗竞日，读润臣诗，觉洒然尘垢之外也。吾友山阳徐宾华先生言，咸丰戊午，应京兆试，吴稼轩先生招饮，坐客有润臣，润臣一目上视，时久不得其伯兄昆臣消息，相对歔歔，不复作平生豪语。润臣诗名《敦夙好斋后集》，由胡心耘活字板印，前有朱伯韩撰传。余有其书。伯韩以庚申殉节杭州，此其己未所作。叶氏子孙重刻本，余托张荆野求之未得。原刊前集，在扬州文枢堂书坊见之，以索价昂未购。

戴文节告病归里

清宣庙末年，为穆相壅蔽，略不省事。时民患已萌芽，督抚承穆风，莫敢奏闻。文节为广东学政，期满还朝。召见问：“汝一路由江西、安徽、江苏来，民情如何？”文节遽对曰：“盗赋蜂起，民不聊生。”宣庙大骇曰：“如汝说，尚复成何事体！”怒询穆相。穆免冠谢曰：“戴某见皇上春秋高，欲以此撼皇上，沽直名，非实也。”宣庙遂恶文节。照例年终赐南书房翰林福字，戴不与焉。文节见几，遂以病归。至咸丰庚申，殉难杭州。

孙琴西内转太仆缘起

琴西先生为渠田学士胞兄，诗文俱擅场。道光庚戌榜中，与曲

园先生，最有名者也。孙官宁藩，沈文肃为江督。孙于沈馆阁称后辈，而以世谊与沈往还。以其属吏修衡参故事，不数数也。沈积不能容，于年终考语揭之，照例内转太仆。奉旨次日，孙诣沈，直以京卿拜会，俟开中门，肩舆而入。沈恚甚，相见犹举倪若水送班景故事，颂孙云：“世叔此行，何异登天？”孙瞪目作尔汝语，云：“赖君一见，遂作散人，受恩多矣。附片请假数月，可乎？”沈愠然于色，然无可奈何也。孙归里后，优游林下，年逾八十而卒。当琴西先生去宁时，渠田尚为钟山书院院长，次年亦辞馆归。论者谓文肃于师门恩谊太薄。后来又又有许仙屏与曾忠襄一事，已记于前。许以计免，琴西峭直，所不能为也。

书完颜恹夫人

完颜夫人恹氏，讳珠，常州人，麟见亭河帅母也。夫人父尉直隶之肥县，见亭祖官肥县知县。夫人以僚属女谒太夫人索绰罗氏，试以锦鸡诗，夫人按笔立成，云：“闲对清波照彩衣，遍身金锦世应稀。一朝脱却樊笼去，好向朝阳学风飞。”太夫人大赏之，聘为子妇。时夫人年甫十四也。夫人课见亭严，好谈经济，日以循良导其子。古人言“女有四行”，夫人庶几近之。余见夫人刻《李二曲集》，为道光戊子刊本。序文侃侃论世，居然有法度。巾幗女子，知研小诗而已，其能刊理学名儒书，殊为可异。集凡二十卷，后附《恹逊庵先生事略》，称“族孙恹珠编”。又附恹寿平事，言：“随其父客建宁。陈锦破建宁，被掳。锦无子，纳以为子。锦至杭州，遇寿平于途。因与僧谛辉设计，怵锦妻：‘此子当度为僧，不然将死。’以此得脱。”较袁子才所纪为详。夫人又善画，传瓯香馆家法。余昔于南清河僧寺见之。近世女职不修，虽才秀翩翩，有林下风，未纬之以学，求如夫人之早闻道者鲜矣。

蒯 礼 卿

晋人云：“廉颇、蔺相如虽千载上死人，凛凛有生气。”蒯礼卿光典是也。余于壬寅馆于其家五年，余伉直自遂，往往与之相忤，君好上人，而独下余。于余诗文，未尝有訾议。为《答宋芸子书》及撰《周壬山制府寿序》，所使典实，属为其子讲读一番。好贤礼士，未有若礼卿者。余既为别传传之，馆沪以后，又乞缪筱珊先生及冯梦华中丞撰铭墓之文，两君皆许之矣。礼卿第在江宁碑亭巷，地直孔道，辛亥住兵，藏书掠出，售于沪上。如戴东原《直隶河渠书》稿本，原为曲阜孔氏所藏，亦在其内。今年再有此举，恐捆载尽数出矣。礼翁若在，不过推为民政长而已，性刚而疏，必不久于其位。倏幽告终，不霑新命，其早死幸耳。惜任昉瞑目渍酒无宾，雍门鼓琴，曲池就圯。“谁当九原上，郁郁望佳城。”未尝不思之而流涕也。

杨惺吾先生

杨惺吾先生守敬，从黎莼斋钦使游日本。黎刻《古逸丛书》，皆杨手定，世多知之。杨在日本，所得宋元刻本及卷子本甚夥。余昔问先生：“何以有此财力？”先生言：“日本将甫维新，土苴古籍，余所带汉印及古钱满篋，彼中方喜购此，以易其书，渠等欣然，如苦窳暴得大赢。逮其老儒倡复古学，追悔无及矣！”杨年七十馀，声若洪钟，惟耳患重听，须高声对谈。与余在江宁七家湾江南图书馆，为一日之集。先生问余：“《水经注》则何如？”余曰：“佳书也。”先生曰：“不好，有叫嚣气。”余敛衽称善。先生之谦，诚不可及。先生因余问潘儒初、邓铁香诸君事，哂然异之曰：“我顽固党，君亦顽固党邪？”相与大笑。先生与柯逊庵，为代刻书籍几致绝交。谓余曰：“我死后，君须记上。渠现在有势，我儿子做官，不敢得罪。”今柯已死，先生闻

客沪上提篮桥左右，余与丁君秉衡冒雨访之，未得也。

胡 稚 威

胡稚威天游，古文学韦，时阑入皮陆一派，俚文则上追燕许，刘舍人所谓“负声有力，振采欲飞”者也。袁随园云：“吾于稚威则师之矣。”又言：“钞骈文数十首，为杨蓉裳窜去。”今《石笋山房集》具在，蓉裳虽要为帐中之秘，其自撰《芙蓉山馆文》，实不能窥稚威万一。沈约集中作贼，吾于蓉裳知免此语。稚威试鸿博，污卷获黜，以副榜贡生客死河东。小仓山房《稚威哀词》最佳。杭大宗《词科掌录》称稚威“藻耀高翔，才名为词科中第一”。大宗因举次风与己俱下之矣。稚威俚文，近代竟未有能学之者。随园自矜骈文，欲继稚威而起，其俗调犷气，尚逊迦陵之雅，又安敢望稚威乎？学稚威不成，必有秦武举鼎之应，故世群趋而学卷施。湖南人说部，记稚威后身为阮文达。又言：“文达督浙江学，按部绍兴，道经稚威之居，怦然心动，询其老婆，则稚威之妻也。因搜其遗文刻之。”情事虽不合，然足为稚威吐气。偶阅《词科掌录》，见大宗之推稚威，其言有征，故累举稚威梗概如此。

朱鼎甫侍御

义乌朱鼎甫侍御一新，以劾李莲英去官，主广东端溪书院。旋移广雅书院，卒于院中，年甫五十也。醇邸当国初，设海军，盛用满员，鼎甫抗章，极言非是。醇邸大怒，抄折寄示李文忠。文忠就幕府汪君宗沂商之，嚶然大声曰：“写白折子作八股的翰林，亦参起海军来，你看是可恶么？”汪阅毕，置案上，默然无语。文忠曰：“如何？”汪曰：“鄙意亦以朱言为是，故不敢遽答。”文忠曰：“七爷不肯答应，我们要回覆的。”汪曰：“暂缓复之，七爷徐思，其气自平，再为缓颊，朱

可以免。”文忠如其言，事获寝。否则，鼎甫早以海军得罪矣。鼎甫于二十四史，曾读一过。与袁爽秋游西山遇雨，衣襦尽湿，遂得昏瞶之疾。此友人告余者。

蒋果敏公

蒋果敏公益澧，提兵入桂林，救劳文毅于垂死，克复诸郡。湘绮先生《湘军志》谓，广西山谷皆立小庙祀之。余询之桂林人，语果不爽。果敏既得劳文毅之资，戡定两浙，声施烂然。官浙藩日，延文人为记室，且请师之，戒以无预他事。居然能操笔为尺牍，善如人意。因是折节读书，真英雄也。果敏家居后，奉召入都。召见时，未如小珰所请，奏对毕，故迂其道行数里始出，果敏因是暴卒于京邸。朝野谓蒋若不死，必可大用。蒋与张勤果，同以未尝学问，复事笔砚，乃率有儒者气象。古人云：“非复吴下阿蒙。”可于二公证之。

吴僧觉阿

吴僧觉阿，张姓，与冯景亭宫允同学，同为附学生员。绝意婚娶，为僧于苏州之通济庵。博雅工诗，吾于叶调生《吹网录》、《鸥陂渔话》、《显志堂集》，知觉阿遗诗，有通隐、梵隐两刻。庚申劫后，其徒悦岩与宫允之子芳辑芳辑学诗于觉老。复合刻两集。余贻书于叶鞠裳编修，求其集，未得。觉阿诗友朱伯韩，谓觉阿出家前作，似和尚诗；出家后作，似秀才诗。于其胸中曾不介蒂，寄以吟咏，固宜似和尚。逮为和尚，袖手局外，蒿目时艰，一腔抑塞幽愤之气无所发抒，不觉见之于诗，又宜似秀才。观察可谓知言。余考伯韩虽一时持平之语，亦有所本。明宋潜溪好佛，太祖目为宋和尚。僧宗泐好儒，呼以泐秀才。皆在家出家时，同游于方之外者。觉阿可继李谭，后有撰《清诗综》者，当不可遗也。

吴梅村立幀山水

余于张子虞寓斋，见吴梅村立幀山水，淡远萧疏，极有士气，题有《菩萨蛮》词一首。款为：“澹心索画，庚寅重九前五日，骏公吴伟业并题。”澹心者，莆田余怀也。庚寅为顺治七年，不署年号，殆有陶公仅书甲子之意。若于诗文集见之，乾隆四库馆开，必为采访督抚所纠，有毁板斫棺之祸矣。

郑板桥

吾乡郑板桥，以书画名海内，真迹渐少。在板桥当时，即有扬州某观道士学其体，足以乱真，见李艾堂《扬州画舫录》。后又有同县黎氏仿之，皆书也。兰竹，钟氏昌凤能为之。板桥楹帖，乡中所见者，粉笺居多。板桥初学晋帖，余尝见板桥雍正九年书杜老《丹青引》横幅，体仿黄庭，对之磬折，后乃自为一体。蒋心馥指为晚摹瘞鹤兼山谷者，然余尝见李长衡书，板桥极似之，其渊源固有自也。

顾亭林先生肇域志手稿

亭林先生《肇域志》手稿，德清许周生藏。庚申浙乱后，为吾乡黄氏所得，于同治丁卯为黠贾市去。黄先世多藏书，任子田侍御曾假十数种至京师。有经周书昌、丁小雅勘定者，俱为黄氏后人用贱价售出。余闻之谢先生庭兰，谢客吾乡三十年，习知此事。

牛腹血治金创

李时珍《本草纲目》“牛血发明”下引《元史》云：“布智儿从太祖

征回回，身中数矢，血流满体，闷仆几绝。太祖命取一牛剖其腹，纳之牛腹，浸热血中，移时遂苏。”又云：“李庭从伯颜攻郢州，炮伤左胁，矢贯于胸，几绝。伯颜命破水牛腹，纳其中，良久而苏。”余昔遇歙县汪仲伊先生，言同治庚午马端敏被刺，官吏仓黄觅医。往见洪琴西先生欲陈此方，值街市逻卒填塞，禁人出入，行至半途而返。后知端敏被刺，即噤不能言，虽有良方，亦无从施救。当汪告余时云“有奇方”，余云：“得无纳之牛腹中乎？”汪讶云：“君何从得知之？”自是定交遂密。

论扬州学派

扬州学派，吾尝与友人断断争之，有似伏玄度习彦威之论青楚人物，自笑其偏，然不可不举示后人，以助谈柄。盖吾扬自卢雅雨先生为运使，延惠定宇修定《感旧集》及《山左诗钞》。华亭沈学子、青浦王述庵与惠同馆卢署，休宁戴东原往来其间，扬州是时已开小学校黉一派。而吾乡顾文子、任子田相继而起，高邮则贾田祖、王石疆、李孝臣，宝应有刘端临，江都则汪容甫，仪征为江秋史，并研精汉学，各树一帜。再次则焦里堂、阮文达、王文简、黄氏承吉、钟氏怀、李氏钟泗、徐氏复，及寓居扬州之凌氏廷堪、江氏藩，是皆继贾、王而起者。其后又有凌氏曙、汪氏喜孙、薛氏传均、梅氏植之、刘氏宝楠、成氏蓉镜，与凌氏之甥刘氏文淇。文淇传子毓崧，毓崧传子寿曾、贵曾兄弟，贵曾传其从子师苍及子师培，是为刘氏四叶之学。刘氏之门有田氏溥光、薛氏寿、陈氏立，又有刘氏恭冕、梅氏毓，皆传其家学，羽翼刘氏，不背师法。光绪以来，唯仪征刘氏，尚守先人矩矱，其余五县两州，未有能奋自树立，毅然以前辈为师者，盖骛于功令文字，冀其速化。为书院院长者，率多巧宦隳官，据为窟穴，本无学术，不知提倡，谬种流传，递扇无已。禄利之途广，苟简之习成，凌夷衰微，遂有今日不绝如线之势。余虽生顾、任之后，少壮习为辞

章，四十以后，略知涉猎，而不能为专门之业。近者老病纷乘，炳烛馀明，犹思自勉。窃念经史一途，陈陈相因，至难再凿户牖，唯子部杂家，其类至广，性与之近，姑以寄吾好焉。而追念扬州学派，昔为人所颂者，今且一蹶不振，前贤可伤，后者难继，余综其始末陈之，未尝不为之长太息也。

曾国藩古文派别

湘乡曾氏古文，导自梅伯言氏，熟于阳刚阴柔之旨，极其伸缩变化，铿訇隐辘，自成清越，刘彦和《文心雕龙·风骨》一篇，固曾氏所心摹手追者。国藩门下，有武陵杨彝珍、东湖王定安、武昌张裕钊、无锡薛福成、桐城吴汝纶、遵义黎庶昌。彝珍、定安，肉多于骨，长于用复，而短于使单。裕钊善叙事，而规模不免狭小。福成具体而微，首尾完密。汝纶习于间架，其铭词陶铸诗骚，颇堪继武。庶昌读书较多，不囿于法而范围较广。此六君者，虽未能各自树立，然皆湘乡入室之弟子也。龚、魏之学兴，偏霸之才，易饰耳目，求其优游揖让，不诡于正者，以余所知，海内不过十数人。推原其故，知于古文中求古文，而于古人为文所从事之书，未尝肄业及之；况古人与不可传者俱死，其存者糟粕而已。吾虑湘乡一派，积久渐绝，读书者少便于习《古文辞类纂》，他书概从束阁故也。

论先正事略

李次青方伯《先正事略》，每传皆立一帽子，以自见其议论。此碑版文字，偶一为之，非史裁也。其自相抵牾处，如何文安及汪辉祖传同一事也，而是非互异，此据诸家碑状而不加剪裁之病。又同一道光死夷事者，葛壮节及陈、王、郑诸公皆有传，而独遗关忠节天培，关事见鲁通甫文。又其附传多失次序，虽据他人之书，而不免有

未去葛龚之消。此无他，仓卒成书，遽以饷世；而适承中兴之后，海内引领，欲见诸公本末，故不脛而走，遍于天下，方伯再出山，不及追改。读此书者，贵以他书参之，勿为所惑也。

徐星伯先生

大兴徐星伯先生松，继朱文正兄弟翁覃溪后，招来后进，天性敦挚似竹君，胸次宽博较覃溪为胜，四方宿学之士，客京师者以先生为归焉。先生官湖南学政，为武陵赵文恪公慎畛劾罢，斥戍伊犁，且籍其家。余问缪艺老：“先生何以得罪如此之酷？”言随棚厨夫卖茶点与诸生敛钱，事涉徐之封翁，赵摭以入奏。然不经此，先生之《新疆赋》及《新疆识略》不成。天山南北路，冰崖雪窖，皆畀先生著书材料也。先生归后，仍官中书，门下往来者，乌程沈垚、平定张穆、泰兴陈潮、甘泉杨亮、阳湖董祐诚皆谈地学之友。先生事迹见艺风文集。大兴赤县，自先生没后，未有能继先生者。人士星散，京师雕耗，而国家于以不竞，陆生之宴喜西都，有道之人论东国，孰谓与国家无关哉？

湘绮楼缘起

王壬秋先生，以湘绮楼名集，海内举此称先生者久矣。顾未知湘绮命名所自，叩其弟子，亦未能答。余己酉在江宁，谒先生于俞恪士观察宅内。先生问刘融斋官允后裔何如，余一一具答。又论六朝诗云：“鲍谢五言，已开唐律。”先生举“大江流日夜，客心悲未央”，余以“朔风吹飞雨，萧条江上来”应之，先生抚掌称善。余因请曰：“先生湘绮名楼，出于何书？”先生曰：“子真有心哉！”示以未刻文稿第一首，即《湘绮楼记》。盖先生初娶蔡夫人时，筑楼于湘水之旁，题曰“湘绮楼”，取江文通《拟魏文帝诗》“高文一何绮，小儒安足为”，

其意谓湘人能为绮丽高文耳。余始释然。顷来沪上，告于沈子培提学，沈曰：“初亦疑之，不知用江诗展转如此。”

刘 张 侯

仪征刘张侯师苍，曾祖文淇，祖毓崧，父寿曾，俱见《清史·儒林传》。张侯世传左氏学，故师汉计相而字其姓焉。丁酉科拔贡生，旋中本科举人。余昔与张侯试经古覆试，诸人皆携书籍满竹笼若负畚者，至力不能胜，张侯提一小篮，载笔砚数事，余窃伟之。张侯试《穀梁》大意，振笔直书。余与之语，口答手写，几于五官并用。壬寅始交张侯，访于青溪旧屋，门署一联，为“红豆三传，儒林趾美；青藜四照，宝树联芳”。余曰：“君家四传矣。”张侯亟对曰：“不敢！不敢！其实惠氏亦四传也。”既与张侯游梅花岭，皆方地山昆弟为主，以扬州前辈遗事质张侯，张侯应之如响。本年张侯从弟师培应秋试，张侯携一仆来江宁省其弟，在镇江怡和舫船失足堕水死，仆呼救不及，尸经渔舟捞获，已流至焦山门左右，面为鱼咬如创瘢，一手曲掩其心，盖极文人之至惨已。张侯目短视，躯干庞硕，樵襪无比，星夜登舟，故及于难。张侯遗集，为歙汪君宗沂所定，尚未刊。余有《杨季子集》，即从张侯假钞。

父附子集之例

姻丈顾先生騄，同治庚午举人，官陕西凤翔县知县，余亲家石孙之父也。先生好为诗，没后集经余定，题为《顾凤翔遗集》。南通州范仲林钟官河南，石孙以家集赠仲林，见余序文，谓可跻乾嘉作者，余颇自愧。先生之父名继春，工诗，有集未刊。石孙及其弟燕卿，欲刊附先德集后，问余有例否。余曰：“宋《黄山谷集》，附其父《亚夫伐檀集》；王楙《野客丛书》，附其父《野老纪闻》，此前例也。”石孙曰

善。集亦属余审定，诺之已五六年，尚存篋中。黄、王两家附刊之例，《四库提要》极不谓然，云：“子虽齐圣，不先父食。”其说诚善，谓有子粗立名誉，其父暗澹无华，畸零遗箸，俛为灰烬，因挈与同刊，冀传于世，此亦扬清芬述祖德之用心，必以苛礼绳之，亦过矣。

渊雅堂文

王惕甫芑孙《渊雅堂文》，沉厚雄健，寓复于单，善学东汉，而下逮于韩柳，其源流甚正。当时未肯俯首姬传姚氏之徒，如管异之等，遂昌言攻之。长沙王逸梧先生选《续古文辞类纂》，知取鲁通甫，而深摈渊雅，毋亦徇姚氏门徒所言与？然通甫究与桐城异辙，阑入其中，波澜态度，殊觉不伦。张南皮《书目答问》，不以通甫列之桐城派中，非为未见。余深好《渊雅堂文》，而能继渊雅者有通甫，故并论之。

卢雅雨先生提引事

雅雨先生官扬州，主持风雅，继踵渔洋，片言一艺，皆见褒赏，致亏累官项七八十万，不能考终牖下，为人所怜。然至今称于人口，比之狐狸獭貉啖尽者，较有区别。先生提引查抄事发，吾乡徐君步云，以召试中书直军机，遣健骑泄之于卢，以故无所获。承审官拘卢幼子，诱其尽言，云：“某日，徐世兄自京城有人来，我父忧见于色。”徐以此革职，戍军台。卢，徐召试举主也。当召试旨下，卢牒兴化县令，属举所知。令正踌躇，有礼房书吏素宠于令，询之，言：“邻有徐先生，吏归舍，深夜尚闻其读书，每日无间。可请访之。”令遽造徐，言论立合，以名上。由雅雨先生考送，召试赐举人，官中书，校四库书，年至九十馀而终。同时为卢累，谪军台者有纪文达，罢职者王昶、赵文哲。纪为卢姻亲，王、赵旧宾客也。

晚翠轩诗

《晚翠轩诗》，侯官林旭瞰谷著，瞰谷之友李君宣龚，属梁公约赠余者。瞰谷年少，欲有所为，不幸如柳仪曹，其取祸亦酷。诗大都宗节庵苏堪，饶有生造之趣。友人言正阳关某僧寺，瞰谷题诗殆遍，盖随其妇翁沈爱沧居正阳最久。天生此才，遭非其会，哀哉！余初得李君之赠。题诗卷端云：“玉树青葱映紫宸，孙刘才望一时新。梧桐露浣凉飙起，输与空庭扫叶人。”“北军百万典熊黑，故老元臣横涕咨。并世高文韩吏部，变骚馀影写罗池。”知人论世，于余诗或有取焉。

卷四

吊端忠敏二诗

端忠敏方，满洲人名不系姓，公私称谓，截取首字，代姓呼之。其例已见唐白居易《无虞集》之文，亦见梁玉绳《觚记》，今用其说。继西林之后，带兵入川，其时，人怀异志，忠敏犹以前此督鄂旧部子弟视之。及至，四方瓦解，争为奇货，加刃忠敏，非与为仇，直鼓众取富贵耳。身首异处，且具智伯月氏之痛。海宁王静庵国维有《蜀道难》，余有《悲溷阳》，二诗皆为忠敏而作，同录于此，以俟海内诸贤论定焉。

蜀道难

对案辍食惨不欢，请为君歌蜀道难。蜀江委蛇几千折，峰峦十二烟云间。中有千愁与万冤，南山北山啼杜鹃。借问谁化此，幽愤古莫比。云是江南开府魂，非复当年蜀天子。开府河朔生名门，文章政事颇绝伦。早岁才名扬名硕，中年书札赵王孙。簪笔翩翩趋郎署，绣衣一着飞腾去。十年持节遍西南，万里皇华光道路。幕府山头幕府开，黄金台畔起金台。主人朱毕多时誉，宾客孙洪尽上才。奉使山陵绝驰道，幸缘薄谴归田早。宝华庵中足百城，更将何地堪娱老。呜呼！乾嘉以还盛文物，器车争为明时出。士夫好事过欧赵，学士考文陋王薛。近来山左数吴陈，江左潘吴亦绝伦。开府好古生最后，搜集颇出诸家右。匋斋著录苦未尽，请述一二遗八九。玉刀三尺光芒静，宝鸡铜禁尤完整。古本精严华岳碑，千官谏训毛公鼎。河朔穹碑多羣致，中馀六代朱文字。丹青一卷顾长康，唐宗纷纷等自郅。开府此外无他娱，到处琳琅载后车。颇怪陶公储木屑，不愁

马援谤明珠。比来輶轂多闲暇，倦眼摩挲穷日夜。自谓青山老向禽，那知白首随王贾。铁官将作议纷纶，诏付经营起重臣。又报烽烟昏玉垒，便移旌节上荆门。玉垒荆门路几许，可怜遍地生榛莽。木落秋经滟预堆，风音暮宿彭亡垒。提兵殊少贼苦多，纵使兵多且奈何。戏下自翻汉家帜，帐中骤听楚人歌。楚人三千公旧部，数月巴歛共辛苦。平时武帐称元戎，此日辕门呼索虏。彻户万户金千金，首级还需赠故人。此意公私君莫问，此时恩怨两难论。爱弟相随同玉碎，赠官赐谥终何济。铜鼓聊当万里歌，铁笼便是东园器。杀胡林中作帝羆，蜀盐几解相交加。留取使君生面在，顺流直下长风沙。南楼到日人人识，犹记使君曾驻节。将军自卫为周防，父老遥看暗呜咽。昔闻暴抗汉与明，规摹还使后人惊。和州有庙祠余阙，西楚何亲葬谷城。即今蛮邸悬头久，枯骨犹为老兵守。白狄谁归先轸元，集场空请王琳首。玉轴牙签尽作尘，兰亭殉葬更无因。颇闻纪甗归齐国，复道龙文委水滨。首在荆南身在蜀，归魂日夜西山麓。千里空驰江上心，一时已挟城门目。可怜萧瑟满江潭，无限江南与汉南。莫问翠微旧山色，西风落木归庵来。

悲 湓 阳

湓阳好古天下稀，永宁多宝足配之。西园轮直忽再出，资洲饮刃真堪悲。忆昔长安盛文史，旌旗遍树潘翁垒。东观馀论宣和图，孔融尊酒平原履。此时奔走趋声价，此时人物称王霸。波斯大贾碧眼胡，倾倒公卿鲍残炙。如君驩厠竹林游，入仕山王亦胜流。监税金钱搜秘册，起家持节镇方州。方州持节无齟齬，西历咸秦东吴楚。兼榷盐铁赐铜山，交会流通夸少府。毕良史与廖莹中，指挥狎客承下风。清明河图定窑鼎，争献门下矜奚童。搏扶九万摇银海，珠槃玉敦凝光彩。百缣密拓沮渠碑，埃及文求五千载。庐陵鄱阳且伏膺，何论卞宋两中丞。后生特起此天意，举令尝水分淄澠。好官滋味崦嵫影，斥去犹能保要领。出山富贵为群奴，交胸铍剑生俄顷。泰山

鸿毛有重轻，惜君此死太无名。头颅万里同谭尚，谁是田王田涛、王修。涕泪倾。智瑶饮器伤残忍，掷去模糊嗟泯泯。持首无客殉田横，归元有子求先軫。昔为人羨今人怜，纷纷过眼如云烟。精灵啼血时来往，莫使空山化杜鹃。

李 莼 客

李莼客慈铭，官京师数十年，为词坛领袖。咸丰年入都，即友潘郑庵。后潘官尚书，莼客仍以兄称之，人劝其少屈，曰：“吾不友郑庵邪？”莼客甲戌会试，房荐出长沙王益吾先生门。已中式矣，主司再取卷视之，试帖为十韵诗，格于例被摈。庚辰，拟不复应礼部试，海宁羊辛楣、会稽陶仲彝敦促之，遂成进士。数年，补户部郎中。会考御史，莼客以资浅不及格，黄漱兰通政、盛伯希祭酒代顶俸满。考取后，自期当言人所不敢言。一补御史，即参顺天府尹孙辑“辱骂属员，威逼自裁”。属员者，东路同知郝联薇，为兰皋先生孙，实有此事。嗣经潘文勤查复，取郝氏家人切结了案。莼客由是深恨文勤。阎文介管户部日颇重莼客。莼客以丹初轮日接见十四司，以一司官唱名，如呼囚点隶，诘书责之。文介颇嫌于心。当邓铁香鸿胪以言事噪动中外，其折悉由莼客与潘孺初改正。莼客好骂人，名位居其上者，务倾之以为快；而于后生一节之士，殷殷求见，未尝不推襟接纳，教以诗文门径，且时招集以杯酒示礼。故誉莼客者参半，贵人大僚多阴疏莼客。其与人书亦言“南皮吴县，久已绝踪。顺德谓李若农。善谀，渐成隙末”。莼客刻《白华绛跗阁诗》，甚精，价银一两二钱，人谓莼客不欲流传。至今石印本尚须一元有馀。莼客诗从实处入，能读莼客诗者，颇少也。

郑成功忠于明室

成功以父芝龙投诚明室，由任子肄业南监，执贄于钱牧斋。唐王起闽，成功奉隆武号，纵横海上将二十年。病革之日，诵高皇帝宝训，掩面而逝，时康熙元年也。自台湾入版籍后，台民私祠成功，如蜀人之于诸葛。其后朱一贵、林爽文迭乱，疆臣怨台事，不敢以祠郑为请。至沈文肃为钦差大臣，勘定台地，奏建延平王庙，台民始张目伸胆，铙钟吹鼓，赛祭不绝。文肃自撰祠联云：“开千古未曾有之奇，洪荒留此山川，作顽民世界；际一生无可奈何之运，缺憾归诸天地，是破格完人。”文肃此联，含蓄不尽，不敢作一激烈语，而毕申忠义之气。延平有知，当为首肯。相传文肃官江南日，每宴僚属，酒半辄诵此联，呜呜歌之。至复诵，则大声拍案为节，群相愕视，敛衽称赞。文肃引满举白，一笑而罢。孙海岑太守时官江宁府，屡预此宴，告于余友阮君晋朋，余问于阮如此。台湾自归日本后，延平之享不废，匪独贵其自出也。又闻光绪丙戌以后，德宗迭梦朱衣人，自言姓郑，云：“好还我台湾！”德宗错迁莫对。后复梦，且盛色相逼。述于孝钦，后言：“汝告可以驴年马年还他。”及甲午事起，次年果割台湾偿之，马年之讖应矣。延平精爽阅二百馀年，尚自耿耿，为明遗臣之最。此事闻之泰州袁淡生銜，皆延平故事也。

曾文正靖港之败

文正靖港之败，贼炮伤坐船，文正自后舱跃入水中，與人某负文正易他舟，摇橹拒逆风，至对岸免。文正舁至行馆，不脱湿衣，自矢以死，命幕客李元度、陈士杰草遗折。元度诡言塔师湘潭大捷，可易衣矣，文正不信。左文襄自抚署视文正，见污泥满身，笑言：“好象猪子。”黎明塔忠武湘潭捷书至，文正乃易衣，语人云：“此之不死，

天也。”长沙张沅荪述此事，沅荪名百斌，文达百熙族弟也。

蒋心馥以袁子才比陈眉公

尹文端再官江督，子才已罢官，被处士服，出入节署，又善以谐词媚尹，材官骑士，折简嘉招，盖一日无子才不乐也。心馥游江宁，文端招饮，坐客有子才及秦涧泉学士，分韵赋诗。涧泉诗先成，文端不以为佳。心馥次上，阅毕不作一语。至子才诗，则启颜称善。心馥阴有不嫌，所撰《临川梦》，极诋眉公，云：“装点山林大架子，附庸风雅小名家。终南捷径无心走，处士虚声尽力夸。”又云：“翩然一只云间鹤，飞来飞去宰相衙。”隐然一子才也。钱受之《列朝诗集小传》评眉公诗：“取其便娟轻俊，聊可装点山林，附庸风雅。”心馥本此。牧斋称眉公：“重然诺，饶智略，精心深衷，妙得老子阴符之术。”又云：“交游显贵，接引穷约，茹吐轩輊，具有条理。”子才为人，亦颇近此。心馥虽以传奇修文德私憾，实为子才作一重公案也。

冯竹儒观察

上海自通商以来，苏松太道有名者，吴煦、应宝时、冯俊光。吾尤以俊光为贤。俊光字竹儒，广东南海人。由咸丰三年举人，从曾文正、李文忠军，历保同知，总办江南制造局。留心经世之学，设局译西书数十种。又购明代实录，置于广方言馆。造第一轮船成，欲乘之以环游地球，其志甚壮。父玉衡，先以事戍伊犁，同治元年卒戍所。西人陷伊犁，竹儒在曾文正军，告假求父柩，历蒙古草地，至古城子，不得进，恸哭而返。光绪二年，左文襄定伊犁，竹儒已官上海道，求解官访父柩。奉旨赏假一年，不必开缺。时回疆虽定，道路犹梗，非商贾不能往。竹儒从父祖霭，诡为贾客装先发，竹儒随其后，祖霭果得玉衡柩于伊犁广东义园，载以东返。竹儒遇于安西州，扶

枢归葬。至江宁龙江关，疾作，抵上海而卒。竹儒归至中途，有旨寄谕疆臣，冯某不论行抵何处，着即入都引见，盖将大用也。夫尊官厚禄，人之所欲，上海道膏腴甲天下，竹儒独舍之不顾，以殉亲闻，此仁和吴氏、永康应氏所不及也。竹儒之子祖勋，为张文襄公所赏。冯少竹之名，遍于人口，不知其先德积基如此。瑞澂欲致少竹死地，此宜援古人及子孙之例争之。吴氏力保上海，应宝时继其后。吴子无闻，应子某以公债票几陷于祸，又以智免。孰云无天道哉？

阎丹初相国

丹初相国官部曹，胡文忠奏引办湖北粮台，崇尚俭朴，风为之变。官山东巡抚日，躬御布袍，着靴，下缎上布。州县及候补人员，衣服有鲜明者，必遭诃斥，或则撤任，或则停委。人皆相习为伪，衣冠敝陋，怀胡饼坐官厅啖之，公密访得，至加优保。有齐河县某，御狐袍谒见，公盛怒云：“汝何得如此？想是腹百姓脂膏。且汝独不闻吾有条教榜示官厅否？”某令故为觳觫状云：“减负罪，但卑职此袍价视羊皮廉。省中比承大人之示，同寅皆争购羊皮褂。狐皮骤落，故卑职以贱价具此。凡今之寅僚，出御羊皮，入御狐貂，但以取悦上台，其心殊不可问，卑职不敢附和。”公色需谢之，列诸荐章，数年由直隶州擢知府去。李君清用，为公门生。官苏州时，访之陆稿荐熏腊店，涵锅外围之面饼，价廉而味美，酒锅上用蒸桶，汁易溢出，以生面条围之，汁渍入，酒锅熟而饼亦熟，贫家购以当肉食。告之卫中丞荣光，因共饬该店，日进此饼，苏人传为笑柄。李升陕西布政，署中不具厨传，宴客则取之外间菜馆。有一菜馆，以藩台初次定席，肴饌精美，开价甚廉。李后宴客，皆责如前例，馆主人移他处避之。李在签押房，见仆抱衣出浣，云：“何不交太太洗？”仆言：“太太今日无空子。”则云：“俟明日。”陕抚叶伯英后因事劾李去，丹初在枢府力争，失上意，乞罢，壬辰没于解州。遗折入，初拟恤典甚渥，后悉改常例，独谥以文

介，名实相副。孝钦常语人云：“可恨阎敬铭骗一好谥法去。”孝钦好侈，阎管户部，阴加裁节，故有此语。然丹初一派，究不失为好官，其矫枉过正，则非也。

徐进之先生

吾乡徐进之先生，初名宗勉，字谈月，工书，画兰竹，师板桥，然不多作，自号种竹道士。刘融斋宫允《昨非集·种竹道士徐退说》，为进之作也。时已改名退，字进之。徐性简易，好诋诃人物。大兴查芙波为山长，徐诘以制义幽奥，查不能答。县令贵筑周际华，自居文场老斫轮，徐为四书文，隐寓刺讥，周不能堪。治具谢徐，故为谩语慰之云：“如子高才，非游京师不可。吾儿子项官京曹，可为主人，何局促乡里为？”厚资促徐行，而阴以一书寄项云：“徐初至时，当以宾师礼待，渐薄具礼，使不自容，将流落无所归，庶逞吾志。”项如其言。徐遁入西山为道士，正书之外，又学篆隶，几十年。西山严冷，反衣羊皮，长袍短褂皆如此，毛髻髻若猿猱，自喜其状。或着道士服，白绫为表，遍画兰竹。道光丁酉，复入京师，居南城莲花寺；仍应京兆试，不中，取监照贴国子监署壁，日益纵酒狂歌于市。红巾初起，警报沓至，徐着道士服如故，一童子负药笼随其后。为步军统领所侦，拿交刑部，穷其党羽，因疏数人：“宋晋、刘熙载、厉恩官、蒋超伯，皆吾党也。”问官骇然，以颠狂咨步军统领销案。童子姓张，父为永定河守备，以此坐童子父不善择师，将守备革去，童子泣无所归。僧忠亲王时带兵讨贼，僧曾以重币求书于徐，乃使童子投僧军，书一序送之。略云：“方今专阉之帅，恇怯相效，遇贼非败即走，无能为国家冒死击贼，唯亲王为天下英雄，誓与贼为存亡。吾令汝投其军，能随贤王驰骛左右，立功不难。汝父虽被斥，有汝以军功继之，世庶不谓河员之儿不武也。”童子谒王良乡，呈徐序，王掀须大笑。曰：“徐进之亦知我为天下英雄邪？”立派童子入亲军队。后积功至参

将，认徐为师，时有馈问。咸丰八年，融斋官允集乡人醖金资徐归，遂不复出。张童子，大兴人，遇礼部试年，必就巢珠街扬州新馆，访之吾乡赴公车者，问徐师安否。每致数十金或百金，媵以药物，且请过其家，宴之有加礼。云：“吾对诸君，如见徐先生也。”徐年八十馀卒。有子，早慧，死；孙为邑诸生。先生入茶寮，专席独坐，唯余与亲家顾硕，侍坐左右，与谈道光时事。余穷之不已，务使竟其说，先生呼为小友。右皆得之先生亲述，世间所不知也。先生言，步军统领侦骑往拿时，刀矛如雪，虑为其辱，曰：“吾为诸君贺，诸君已得妖道，其功甚大，何必用武？当随之去。”故未受束缚。先生所供“党与”，除宋雪帆为溧阳人，徐皆扬州籍。

刘金门侍郎获谴

金门侍郎名凤诰，江西萍乡人，官浙江学政。阮文达巡抚浙江，时以防海往来宁波，奏请金门代办监临，事在嘉庆十三年戊辰。金门常骂詈教官，积怨已深。入闱，又以竹片击号官头，责其巡察不勤。其仆受诸生徐步鳌贿，印用联号，金门知其情未举，闱中诸生哗然。诵一联嘲之云：“监临打监军，小题大做；文宗改文字，矮屋长枪。”改文实无此事，乃锻炼语，取以配对，欲致金门于死。浙人监察御史陆言销假入都，至学署辞行，金门既缺祖饯，又无馈饌。陆直揭其事，钦差侍郎托津周兆基、光禄少卿卢荫溥查办。讯明得实，金门戊伊犁，文达坐此革职。金门喜集杜诗，在伊犁三年放归，集联云：“三年奔走空皮骨，万古云霄一羽毛。”论者谓下语非金门所敢当，金门后以修《全唐文》卒于扬州。

董文敏送王侍御按黔诗卷

文敏送王侍御按黔诗卷，纸本，长约七尺，高七寸许，齐梅麓旧

藏。有“齐学裘”、“玉谿”两印，又“双溪草堂鉴赏书画”印，又“戴光曾”印。诗格调逼似子麟学杜之作，字似不经意，有水流云在之致，真名迹也。诗云：“绣衣持斧拥旌旄，戎马间关气象豪。报国肯回王子驭，酬知频拭吕虔刀。皂雕弹事风霜笔，羽扇谈兵虎豹韬。行矣捷书宜早奏，汉家麟阁五云高。”其二：“夜郎氛祲未全消，使者单车万里遥。自昔长缨曾请借，即今铜柱未重标。阴符圯上书三卷，令甲明廷诏六条。圣主宵衣眷南顾，舞于何日罢征苗。”后记云：“送王侍御按黔，时有兵事，侍御兼视师之节。董其昌。”下钤董其昌印，白文方印。玉谿跋云：“董宗伯送王侍御按黔诗，的真唐音，折入少陵之室。其书如行云流水，略无滞迹，又如游丝走空，逍遥自在，其神妙当与知者道耳。此卷昔为先大夫梅麓公珍藏有年，手书其签，什袭秘阁。不意兵燹之后复得见之。翰墨因缘，烟云过眼，抚今追昔，感慨沧桑。儿年八十，久旅无归，亦可叹已。侄孙畏三出此索跋，遂书数语而归之。时壬午八月八日，客于申江城南天空海阔之居，星江齐学裘玉谿氏谨识。”按玉谿为梅麓长子，与吾乡刘融斋先生善。文敏此二诗实佳，不知《容台集》有此否？昔蒯礼卿观察从柯巽庵侍郎假抄《容台集》，余曾阅一过，竟不记此。

洪武户牒

贵池郎遂《杏花村志》，载其先世礼卿公洪武三年户牒。体用白话，今记其牒式于后：“户部。洪武三年，钦奉圣旨：‘说与户部知道，如今天下太平了也，是户口不明白俚，教中书省，置天下户口的勘合文簿户牒。你户部官家出样式。那有司官，将他所管的应有百姓，都教入官，附名字，一一写他家人口多少。写得真，着与那百姓一个户牒，上用半印勘合，都取勘来了。我这大军，如今不出征了，都教去各州县里下，着绕地里，共点户比勘合。比着的，便是好百姓；比不着的，便拿来做军。比到其间，有司官吏隐蔽了的，将那有司官吏

处斩。百姓每自躲避蔽了的，依律治罪，便拿来做人军。’领此，除钦遵外，今给半印勘合户牒，付本户收执者。一户郎礼卿池州府贵池县杏花村居住。男子四口：成丁二口，本名年五十四岁，男贵和二十八岁；不成丁二口，次男观音保，贵恋乳名。年七岁，孙佛保年七岁。妇女二口：妻阿操年四十二岁，男妇阿尹年二十八岁。事产：屋五间，基地八分。右户牒授郎礼卿收执准此。洪武四年 月 日 安字二百二号 六花押。”印后有吴非《户牒歌》甚佳，亦录之：“天下太平不出征，当使百姓归农耕。大哉王言敕下部，司徒户口欲分明。家为给牒与收执，贵池畿内尊先行。安字二百有二号，半印全押篆文清。填者姓名谁，杏花村郎礼卿，事产只屋基，男妇六口两成丁。洪武初来三百载，其后仅藏传至今。我为览讫三叹息，不如一纸犹得垂云初。呜呼！不如一纸犹得垂云初。”

郑板桥先生轶事

板桥先生以书画名世，其遗闻轶事多传之者，皆其罢官后乞食江湖所为。先生穷约居里中，宅近东门外宝塔湾。值岁俭，先生生徒尽散，举债偿急需，延至端午节，质剂子本，屈时而畀。先生虑不得偿，先期避往焦山，觅同乡僧某，托名道暑，实避债焉。至五月下旬，未得家中耗，不敢遽归。马秋玉曰琯，时住松寥阁，清晨雨霏，携一仆登山椒，微吟相属。板桥随其后，听之似重叠仅得一语，云“山光扑面经宵雨”。板桥遽前揖曰：“君得句颇佳，仆已窃听之。”马谓：“诗思苦甚，先生能举其偶乎？”板桥曰：“不才已得‘江水回头欲晚潮’七字，不审足下谓何？”马喜极，谓较己语为自然。叩其所居，明日来拜，邀往对弈，为设一榻，请板桥移寓，共尽昔日谈。板桥欲归不得，面有忧色。马问：“以君雅人，方谋行乐，何郁郁为？”板桥云：“仆为避债而来，非能效公等作达。今将归矣，虑家中无耗，不敢遽行。故忧耳。”马唯唯。又历十数日，与马别，为饯行，举满为寿，板

桥自落落也。抵里步近门巷，赳赳而进，见墦人墦墙扫除，大骇，以为宅已赁他人。入门，其孺人含笑相劳苦，更出望外。又呼仆具酒食，曰：“老爷想饿矣，可速备。”板桥益踟躇不安，私叩孺人曰：“端午节何如？”曰：“在前数日，君寄家二百金，已为毕债，当节左右，隳突吾门者，皆改容谢罪去。今以其馀修屋，防梅雨耳。”板桥自叹曰：“吾怪马君，固应不至如是，今果知贤者也。”是年赴扬州与马订交，后遂为马上客。罢官后，亦以马为主焉。此老友王松巢告余，诸家记载所未及也。

王阮亭先生私谥

《柳南随笔》言：“阮亭先生自重其诗，不轻为人下笔。内大臣明珠之称寿也，昆山徐司寇以金笈一幅，请于先生，欲得一诗以侑觞，先生念曲笔以媚权贵，君子不为，遂力辞之。先生没后，门人私谥为文介。即此一事推之，则所以易其名者，洵无愧云。”详案：先生为吾扬州推官，一郡士子，无不被其容接。入官京师，风裁严整，门无杂宾。以纳兰太傅之赫奕，而不得其一字。世称南朱北王。竹垞犹结交成容若，以为梯荣之地。先生独与汤文正昵，文正弟子郭琇，即劾明珠去位者。沆瀣相通，知先生不以此随节，在得取友之正，心曲可以示天下后世。杜陵诗文中，尊杨国忠，投赠鲜于仲通、哥舒翰等，不免有玷笔墨。先生诗文中独无之，此其所以为介也。先生以刑部尚书挂误归，故当时不敢请谥。迨沈文憲德潜受知高宗，文憲宗仰新城，曾被“横山门下诗人”之褒。叶面字横山，为文憲师，少有诗名，传入京师，新城与人书云：“不意横山门下，尚有诗人。”谓文憲也。一日侍上，问曰：“近人诗多质俚，不讲风韵，何也？”文憲对以“士人于王士正诗，不甚肄及，故有此病”。上言：“士正亦自名家，何为士人轻之？”文憲奏言：“人情贵耳贱目，以士正未邀易名之典，不为当世所重，意存蔑视，非能真知士正者。”上颌之。未几赐谥文简。归愚先生可

谓善于进言，然究不如当时私谥为得其实云。

吴渔山入耶稣教

墨井道人吴渔山与王石谷齐名，皆籍常熟，而相友善。张浦山《画征录》称渔山借石谷所摹大痴画不还，石谷遂与绝交。世言渔山老年好用西洋法作画，云气绵渺凌虚，迥异平日。或传其遂奉西教，浮海不归云云，未得确证。上海徐紫珊渭仁，跋杨西亭所写渔山小像云：“余尝于邑之大南门外所谓天主坟者，见卧碑有渔山字，因剔丛莽视之，乃知即道人埋骨处。命工扶植之，碑中间大字云：‘天学修士渔山吴公之墓’。两旁小书云：‘公讳历，圣名西满，常熟县人。康熙二十一年入耶稣教会，二十七年登铎德，行教上海，疾卒于圣玛第亚瞻礼日，寿八十有七。康熙戊戌季夏，同会修士孟由义立碑。’盖道人入彼教久，尝再至欧罗巴，故晚年作画好用洋法。西亭此像作于辛酉，其时犹未入彼教也。”紫珊此跋，叶调生《鸥波渔话》，王紫诠《瀛壖杂志》共载之，以为石谷与渔山绝交以此。翁叔平先生题渔山为石谷画留耕图小象第二首云：“意在欧罗西海边，渔山踪迹等云烟。题诗岂解留耕趣，荒却桃谿数亩田。”自注：“渔山晚奉景教，浪游不归。其志与先生殊途，其假画事，乃后人附会耳。”叔平先生未见紫珊此跋，故犹用旧说。

袁爽秋太常

爽秋太常少极贫，肄业杭州东城讲舍。高伯平先生均儒怜而教之，学具有师法。高又延誉于尊经书院薛慰农山长，慰农以兄子妻之，侍御淮生女也。赘于薛氏，居全椒数年。复受业吾乡刘融斋先生之门，刘时主讲上海龙门书院。爽秋后言，一生学问得力于闽县、兴化两师。闽县，伯平先生原籍也。爽秋校书扬州淮南书局，时同

舍一客，略不读书，昼惟鼾睡。爽秋官芜湖道，甲午，张文襄督两江，召爽秋留署中十数日。僚友迭邀为秦淮之游，爽秋不解妓献酬款曲，习为故事，偶值明眸一顾，便喜以为倾城悦名士，谓之红颜知己。遂以千金脱籍，载归芜湖，扃小室中。虑薛夫人见逼，以亲兵守户，行部则以匙钥交门生歙县汪君掌之。薛夫人向汪索门钥，汪持不可，夫人径往扭锁。汪当门大呼曰：“某在此，非老师不许入！”此汪亲告余者。爽秋甲午诸诗，愤欲死国。后有心疾，喜怒不恒，常呼侍婢予以一剑，命取太太首级来。当时谓爽秋得狂疾，张文襄以电报来询状，实有此事。爽秋已擢藩司，鄙为粗官，愿身入帝城为乐。及内转太常卿，竟以言拳匪事劾。均音殉，行示也。哀哉！庚子三四月间，爽秋与樊云门至琉璃厂就日者谈，指樊云：“君驿马星发动。”问：“何方？”曰：“在西。”爽秋云：“我何如？”曰：“君后未可量。”以死事言之，未可量者，度词也。爽秋肄业龙门书院，与华亭沈祥龙约斋善，故买宅松江。又与松江守陈遽声建融斋书院，在前已公牒卫静澜中丞，奏请融斋入国史儒林传；又请祀伯平先生于嘉兴乡贤，以报师恩。爽秋所为，皆血性男子磊磊轩天地事。德宗执手一哭，即被奇祸。爽秋名字，自与桐庐山水永永常在。余偶举其琐事，亦所谓磊落嵌奇可笑人也。

官文坐享大功

相国官文，以荆州将军补授湖广总督。时胡文忠驻兵江北，属员献媚于官，日进谗言，谓巡抚科目人，蔑视旗员。官阴衔之，文忠亟渡江谒官，握手接昆弟欢。下言有敢造言离间督抚者，访实以军法从事，官意终未赚。后以丹初阎公计，取盐务陋规，月致数千金于官。官唯饮酒唱出，一切不问，凡督抚会衔出奏，胡送稿来，官谨画诺，略不省视。有功则推官为首，官乐为之。官为人简易，识字不多，时朝廷以湘军多汉人，假官镇江鄂，阴诃所为。时曾文正且为祁文

端所忌，文宗疑湘人以此。官妾纵恣弄权，文忠请于母夫人纳为义女，妾呼文忠为大哥，公亦以妹善视之。官稍欲自见，妾辄沮之。曰：“你干不了事，不如让胡大哥做。”后妾升为嫡，文忠往拜其生日，与某方伯遇，方伯掣手本回，不肯同拜寿，文忠以好字称之。此皆人所知者。唯此妾所出，世多不知其由。庄卫生受祺《维摩室遗训》云：“官中堂天下第一福禄人，有妾一人，年甫二十馀，其始乃四川灶婢，历尽磨折，忽为官妾，饮食起居拟于公侯，且有过之。不数年，立为嫡室，官且甚畏之。胡宗保认为妹，今拜其太夫人为母。又享福五六年，今已病瘵，旦夕将死。致病之由系郁闷而起，真可一笑。”卫生官湖北藩司，得诸目见耳闻，据此可见此妾骄憨恣纵之状。文忠若不笼络此人，焉能奏功？金陵克复，曾文正奏捷，犹以官为领衔，故得封一等伯。入相后卒，无子，群从子弟争袭，尸停数日不敛，穆宗饬某带领侍卫，挥令收敛。无劳而享大功，宜有此报。

祁文端忌曾文正

祁文端为韵士先生之子，以经训小学提倡后进。张石洲、苗先路、何秋涛、王荃友，皆为门下客。道光末叶，曾文正亦预从游之列，固无间也。文宗初，祁为师傅，颇得上意。文正奉旨在籍团练，塔忠武湘潭之捷，文宗喜文正得人，顾谓祁曰：“朕欲专任曾国藩，训练乡兵，相时赴敌，毋许各省督抚牵制，何如？”祁顿首曰：“曾国藩以在籍侍郎号召乡兵，长驱东下，非国家之福也。”文宗嘿然。后曾有所论列，皆蒙严旨切责。文正语刘霞仙曰：“祁某京师旧交，何中伤之如此？”为之叹愤不置。文正后藉肃裕庭、文文忠、倭文端交口力荐，始得所向如志，获底于成。文端之语险哉！庚申文宗出狩，传诏：“叫师傅来！”文端已逃赴芦沟桥。其门生江宁端木埰谏曰：“老师备位大臣，奈何先去，以为民望？”文端言：“吾非不知忠孝，然方寸已乱矣。”文宗闻祁不至，怒曰：“什么师傅，叫他滚出去！”祁所为予告

者，非美词也。文端同治初元，复至京师，署左都御史，旋以病去。祁走芦沟桥，此江宁周左麾亲闻于端木子畴者。

罗提督思举轶事

嘉庆时川楚教匪炽甚，以乡勇军功起家者，罗公思举也。公初投军，衣服褴褛，额候部曲，笑谓“叫化子军”，公曰：“亦观其后何如耳。”公善偷营，纵火焚贼垒，自相践踏，大军蹙其后，迭进迭胜；公短衣腾山蓦涧，轻捷如猿猱，火既暴发，而公已在数十里外，贼恨之切齿。公少为贼，州县捕置之狱，笞臀盈千不死，有典史怜之云：“以子之材，何不投营为国家用？”羁满释出，典史资之行。已保至总兵，告假回乡里，典史尚在，拜谒为师。以官牒牒各州县云：“某某盗案，皆我所为，现已为国家效力，毋累他人可也。”公官四川提督时，宴客酒酣，解衣磅礴，指左右臂创瘢，示人云：“此我母某年病，刳肉处；又某年刳肉处。”又指杖痕云：“此某县犯案所杖。”历历不讳。故邵阳魏源叹公为忠孝人。公后官湖南提督，平瑶佩钦差大臣印，谓天所以报之。山阳高征君子上，随父士魁官蜀，又闻公告人一事云：“某年盗某家，已穴壁入，伏于床下，主人展转未睡，不得施手。腹馁甚，私摸床下坛内，细似米屑，掬以疗饥。甫入口，喷嚏不已，盖芥末也。主人骇而繁诸官，致杖数百。时辛辣螫鼻，不可名状，至今尚忆其苦。”众宾皆笑曰：“公奈何以人之所讳而为美谈？”曰：“聊佐诸君下酒物耳。”夫传以勇不作乱而以从师，谓之君子；如公勇不作贼而以从军，其志行亦不在君子后。余故乐举其轶事，凡作贼之后作官，恣睢偃仰者，皆视公有愧也。

记关忠节公死难补先正事略

李次青《先正事略》，于道光壬寅鸦片之衅死事之武臣陈忠愍

公化成传，附葛公云飞、王公锡朋、郑公国鸿，而无广东提督关公天培。关死在四人之先。广东隳防，而后及江浙。关传为鲁一同撰，见《通甫类稿》，书已早出。次青于汤文端传，即摭《通甫类稿》中文，而独遗关，是谓之首尾不具。谨次其大略补之。公名天培，字仲英，江苏山阳人，由道光十四年自苏淞镇总兵，擢广东水师提督，驻札虎门。居虎门六年，禁烟事起，公佐林文忠公缴获烟土二万二百餘箱。奏闻，叙功有差。二十年，英师起，林公以罪去。钦差大臣琦善至粤，命撤海防，犹责公守虎门。琦善日以文书缓英师，阳督公战，请继师则又不许。虎门外列十台，大角、沙角二台最据险要，时助守台者仅数百人。未几，英舰奄至，二台继陷。公与游击麦廷章住靖远台，督厉士卒，自卯至未，杀伤过当，身受重创，陨。虎门陷。而后及定海，又及宝山。陈忠愍公死于宝山，此最后事。此余谓次青首尾不具也。公死后，仆孙长庆求公与麦廷章尸，各得半体，归葬。英兵严守台，由汉奸某感公不杀恩，多方说英师，导入，乃得公尸。事闻，赐谥忠节，建祠予荫。林文忠公赴戍，过山阳，吊公丧，挽匾云：“我不如君。”又联云：“问何人实坏长城，孤注竟教躬尽瘁。闻异类亦钦伟节，归元相送面如生。”联上各忘首五字，异日将问人补之。

孙渊如先生

钱唐袁氏谓“常州星象聚文昌，洪顾孙杨各擅场”。孙者，渊如先生也。吾最重先生，先生能诵全部《文选》，其骈文绝不摭拾《文选》字句，诗有奇气。三十以后，一意研经，袁氏谓渊如逃入考据，诚不欲以文人自囿。少与钱詹事大昕游茅山，访梁天监井阑。毕秋帆中丞邀入陕西幕府，为之特辟一室。同幕有某公讨先生一檄，秋帆裂掷于地。歌者郭生，与先生昵，留节署，夜出，门已上扃，先生引郭梯后苑墙缒诸外，为逆者所得，繫于长安县。秋帆闻之，命速释，无使孙知。乾隆丙午应江南试，主司朱文正公临出京，与彭文勤约：

“吾此行，必得汪中、孙星衍。”果得先生于经策中。登第后，散馆试《厉志赋》，用《史记》“胸胸如畏”语，和珅误认为别字，抑置二等，改部曹。人谓先生稍屈节于和，可奏留馆，先生卒不可。官部曹，受知阿文成公，免其行半跪礼。和阴有不嫌，文成拥护之。由京察放充沂曹济道，与康基田堵曹南决口，省帑金数百万，策皆出先生。巡抚玉德忌先生，专上康功。擢河督，在任修汤陵，立伏生后。摄臬司，平反旧案数百。巡抚不欲先生尽其长，奏回河道本任。后改补粮道，引疾归，侨于江宁。曹南人赠以牡丹数十本，唐陶山仲冕署以“廉卉堂”，比陆公纪之“廉石”。余重先生以经术饰吏治，有儒者雍容气象；诗文渊雅，出以自然。《吴会英才集》所选，特其少作，晚年一归于道。其金陵侨宅“冶城山馆”，在朝天宫左，即今张氏之“竹居”；“五松园”在四象桥浙江会馆南，近王府园。余初馆红纸廊编译局，与冶城山馆近；继馆江苏通志局，在王府园，又与五松园近。曾有诗云：“兼两图书插架新，渊如两度许为邻。”尚友先生，联以寄意。世以孙洪并称。洪为人气矜之隆，诗文咸露刻镂迹象。顾敏恒早死。杨蓉裳骈俪虽工，亦用唐体，顾之《昭明庙文》，未为绝作。然则袁氏所许，名为四子，实则一雄，令余不能不倾倒于先生也。先生有一曾孙，习典当业，尚宝藏先生年谱，缪艺风先生告余云。

俞曲园获谴始末

曲园先生以河南学政，因出题割裂，为御史曹登庸劾罢。先是曲园进书，已荷严旨，曹君特探圣意，为诋献之举耳。咸丰七年七月丁未，上谕内阁：“前据河南学政俞樾，呈递《易原图》，据称由钦定《周易折中》载河洛未分，未变方图、三角图推阐而得之。不知康熙年间，大学士李光地景春奉旨编辑《周易折中》，于《启蒙附会论》内具载河洛阴阳动静加减乘除各图，又附载此二图，原以《易》理精微，象数兼赅，推其餘绪，即可通于勾股开方等法，非以此为作《易》

之原也。今该员辄凭臆见，衍为两仪、四象、八卦、六十四卦之图，穿凿附会，转失其真，且有訾议先儒之语，尤属率意妄陈。原图着发还。”此后曹参折上，上谕内阁：“御史曹登庸奏学政俞樾轻浮乖谬，并将所出题开单呈览。河南学政俞樾，出题割裂，致令文义难通，据该御史开列二十题，俱系不成句读，荒谬之极，至所称科试郟县童生文题，误出破句，几至罢考。按试河南府时，坐索棚规，逗留三日，均属有玷官箴。俞樾着即革职，交英桂督同藩司英荣，将所参各款秉公查办，据实具奏，毋稍徇隐。”又上谕：“前因河南学政俞樾，出题割裂及坐索棚规各款，迭经降旨交英桂督同藩司英荣秉公查办，并调查卷册，据实呈奏。兹据英桂等奏称，详访舆论，俞樾考政尚严，惟所出题目确有数题割裂太甚，不成句读。尚无坐索棚规及轻浮卑鄙等款。”云云。先生仅以革职免官，赖有英香岩此奏。后浙江学政徐树铭，请开鸿词科，复举先生名，徐降调去。曾文正坐是不敢复起先生，遂以著书终老。人多不知先生获罪始末，故备引之。

陆存斋与丁雨生买书构衅

自咸丰红巾乱后，书为一厄。屹然负藏书两大家名，存斋观察与雨生中丞也。昔日本岛田彦桢著《皕宋楼藏书源流考》，载二人因争买书至绝交云云。未知所本，今见存斋《仪顾堂续跋·元刊〈玉海〉》中云：“道光中，上海郁泰峰茂才以六百金得书即指《玉海》。于扬州盐商家。同治初，丰润丁雨生开府扬州，余过其官舍，出以相夸，并载入《澹斋书目》，所称墨光烛天者。及余自闽中罢归，有以郁氏书求售者，余阅其目，是书在焉。询其何以能归郁氏之由。知雨生介绍应敏斋廉访至郁氏阅书，自取架上宋元刊本五十余种，令材官骑士担负而趋。时泰峰已故，家已中落，诸孙尚幼，率其孀妇追及于门。雨生不能夺，取其卷帙少者，自置輿中，其卷帙多者，仅携首帙而去。后经应敏斋调停，以宋板《世彩堂韩文》、程大昌《禹贡论》、

《九朝编年》、《毛诗要义》、《仪礼要义》、金刊《地理新书》等十种为赠，余乃反璧。余始恍然。因念同治元年，余随筱泉制府榷税广东，始与雨生共事。时方以庐陵失守开罪，尚未开复也。及余兵备南韶，雨生亦权苏松道篆。余奉讳归田，则渠已开府矣。余以访书至苏，雨生必先屏车骑过访，后竟以争搜古书成隙，念古人怀璧之诫，因识于此。”案：今两家之书，斥卖略尽，录其构衅之始末，以著所藏原主，此事亦书林故实也。

喀尔喀赤陵姐琵琶

康熙时，喀尔喀部有善弹琵琶女名赤陵姐，能弹冰车铁马之声，弹时朔雁俱落，驷骑环听，肃然无声。邻部厄鲁特部噶尔丹汗遣使求之，喀尔喀怒不与。汗起兵伐之，浸灭其部，以赤陵姐归。喀尔喀部遣臣款塞求救，圣主亲统六师征葛尔丹。丹逆战，其妻阿弩夏吞率突骑略阵，被我军殆于军前。旋紫噶尔丹以归。赤陵姐随入京师，犹奏技于王公家，闻者至有绿珠、杜秋之叹。两部构兵，只以一女子，此亦不祥人也。乾隆时，徐芝仙兰游京师，从故侍卫闻此，因作《赤陵琵琶姐歌》。哀感顽艳，嗣响梅村。余经见沈小庾遗稿纪此事，并载徐歌，因备录之。歌曰：“逻婆檀上红使蹙，龟兹国唱无愁曲。尤物皆从气运生，天数色艺空金屋。千年大漠藏龙蛇，化为女子颜如花。生长赤陵呼作姐，能将番曲谱琵琶。琵琶宫调八十一，别有新声缓挑出。韵并风生乐万方，国王一见加诸膝。其王分地跨兴和，西与山戎厄鲁县。接壤多。闲起侵陵缘互市，终修和好悔操戈。鼓声坎坎冰天裂，艳妆正踏山头雪。一枝春色照黑沙，两国兵端从此结。虎夺龙争秋复春，朝为楚胜暮为秦。掌上青娥偏解舞，原头战骨几生尘。皇皇天子修文德，频遣行人颁玉册。蠢兹猋窳恶浮天，为一妇人灭一国。旌旗出没黑山陬，风雨凭陵青海头。尘起百灵争诉帝，霜高属国尽防秋。维时五月之日暮，至尊驻蹕香泉成。寇骑

仓黄走大荒，龙骧浩荡来西路。羽林老将为余言，亲见阙支阵前仆。四寸文綦么凤飞，周身细铠秋金鍍。芙蓉十队花寒烟，腰有残英泣断弦。鬓点雪霜亡赞普，命馀锋镝出祁连。理藩院里秋槐老，阶墀犹把琵琶抱。宛似虾蟆陵下人，浔阳江上伤潦倒。听弹一曲别郎官，弦上传来意万般。未死若怜胡地隔，得归终恋汉恩宽。曲终上马风萧索，风吹泪逐哀弦落。何倾泪逐哀弦落，禾黍油油满沙漠。君不见倾国倾城代有人，若个老归生处乐。况尔归时国有君，太平无复强侵弱。”

邯郸县龙祠铁牌

直隶邯郸县境西北三十里，高阜上有圣井，在龙王庙内。井周径略近一丈，井底有铁牌若干。遇旱，则铃请铁牌，供奉虔祷，雨辄应时而至。同治丁卯，京师大旱，有以此事言于恭邸，派员往请，立沛甘澍。由恭邸奏闻，西宫命别铸金牌，谨镌神号，飭兼顺天府尹万藕龄尚书赴庙，祭赛陈设。庙祝叩头固请，谓设遇盗贼将金牌劫去，死且不贷。万许春秋两祭，请牌恭祭后，即敬谨安奉县库以为例。相传，请牌得两，当别铸一牌，同原牌俱置圣井，以故井中铁牌累累。光绪辛卯，南清河一带苦旱。漕督松椿移牒邯郸县，恭请铁牌，按驿递送。至清河日，漕督虔请如礼，连日拈香，涓滴不应，酷日风霾，交相为厉。漕督托病不往，道宪拈香返，叹恨见于言色。余纪事诗有“龙湫顽铁绝灵爽，天命至此神无功”，谓此也。此牌后由淮安府张小云太守迎至淮安，祷亦无效。张禀松督：“可否送归原籍？”松命置于古庙中，龙迄无灵求归。此井自宋元祐年乡人建庙奉神，每祷辄应。殆囿于直隶省，各有统辖，迁则不能为神，与官吏之所司一也。

陈总兵庆云之女

陈总兵庆云，赐名国瑞，湖北应城人。初由贼中投诚，为黄开榜义子，时称黄大少，妇人孺子，皆知其名。以剿擒功，授浙江处州镇总兵，未赴。与郭宝昌为僧王左右翼。王死曹州，国瑞夺回王尸，免罪。擒犯京畿，国瑞驰援，赏御前头等侍卫。解柄居扬州，先与李世忠酗酒肆斗，降都司。后因詹启伦殴伤人命，国瑞强梁干涉，启伦抵罪，国瑞滴戍黑龙江，死于戍所。有女年十四五，自关外赴京师，因阎文介哭诉醇贤亲王。王奏请资送其柩回南。一时传指其女为缙紫复见云。此女许字雷大常以诚为孙妇。国瑞有数千金，在妾某氏处，合官吏贖赠，不下万金。嫁女时，妾为之主，资从甚薄。雷孙渐不能自给，女数告贷于庶母，后遂厌之。妾居扬州尼庵，以数千金资其弟，开一钱铺。女亦愤甚，白昼率健儿入庶母所，以索还雷氏原聘朝珠为词，搜其金饰数事去。庶母奔赴甘泉县署，报白日抢劫。县令杜之衡飭役逮捕。女赴淮扬道衙门诉状。时为临桂谢子受先生，习闻女贤，欲缓其狱；杜令径以抢劫案具详矣。余馆道署，怱愚先生传见陈女，问其底里，先生从之。女见时，青裙屏饰，举止端详。陈说庶母寡恩及家世衰微，涕泪并集，先生惻然。移书陈舫仙廉访，飭杜令细查情节复禀，毋得卤莽。先生又属杜谕其庶母，资雷千金了案。先生行部扬州，此金迁延未缴，女复来诉。先生假座扬州府大堂，飭甘泉县立提陈妾之弟至，责令即具金交女。一时观者近千余人，皆谓断此案公允。此光绪十八年间事，若演为剧曲，必声色俱著云。

周保绪先生文武全才

荆谿周保绪先生济，嘉庆乙丑进士，两补淮安府教授。少工词

章，与同郡张翰风、李申耆善。又习易筋经卷帘诸术，权勇技击，一时无双。初客宝山县署，县令田钧，山东巨野人，敬礼先生为上客。因丁忧，以交待未清，羁苏州。时李文成之乱，连及山东，田念母柩未葬，虑毁于贼，北望号泣。先生慨然与武举任子田往视之，两人牢马持矛，出入贼藪，凡刺杀百数十人。葬田母毕后，并骑反，历十八日以报田，田拜泣。先生官淮安日，与漕督周文忠天爵，知府周听松涛，并以勇力闻，号“淮北三洲”，以洲寓周也。城守营参将某，以剿川陕教匪立功，自矜武力。先生曰：“姑至敝署一较如何？”翌日往，共赌跃大成殿。先生十上十下，如飞鸟濯翼，超过檐际。某仅得其六，微侧遽堕，折其左足，医数月，卒跛而行。山阳县有豪胥，多折辈行与交，见先生唱喏而已。一日先生散步学前，胥适过，呼之来，以所吸烟铜斗，遍击其首，叱曰：“速去！”胥至家，首暴痛，肿几如斗，呼舂求死。胥妻子知胥罪，泣跪先生阶前求救。先生命舂至，又以铜斗微击数周，痛立时止。两江总督孙养圃制军重先生才，属统江淮缉私之任，资以原糈。先生招置奇才剑客，辟园亭于扬州，日夕训练，先后捕获枭匪数辈报孙。凡累致数万金，当其盛时，妖姬曼舞，选侍左右，既厌处剧，散遣壮士，斥财立尽。一意闭关著书，遂成《晋略》。周文忠督鄂日，犹招先生一往，未几卒。及红巾乱，人念先生若在，必可以剿抚之策挽回东南劫运也。

张文襄轶事

张文襄年十三，入学顺天。学政为程庭桂，文襄献诗一册，程诃之曰：“童子无躁进，且好好读书。”咸丰壬子中解元，年才十六。己未庚申两会试科，俱以族兄子青为同考回避。徐季和祥，即以庚申全写文襄擢解之文中会元，特改《中庸》为《大学》耳。文襄于同治癸亥始擢第。相传季和与文襄在京师，如尹邢之相避。一日猝遇于途，季和障面疾驰，文襄遽前校其腕戏之，因是深衔文襄。季和劾文襄

在鄂督任一折，至摘文襄寿李文忠文“池小不足以回旋”，为丧心病狂语。季和欲劾文襄，可举者多，何至以文章宾主之辞为病邪？有云此折为李爱伯所授，爱伯尚不至此。季和连类及之，殆孔北海所谓丁零盗苏武牛羊，可并案也。徐折当时交粤督季勤恪、江督刘忠诚查复。勤恪复折有云“世有文字渊源，昧心反噬”，云云，亦隐刺季和前事。章奏之学，俱以文字为戏，朝廷无人可知，不然台官宜揭之矣。文襄督四川学时，按试龙安府，知府为王文敏懿荣之父，例为提调，供张一切。文襄见帐额画折技，甚工，询之巡捕，对以府尊小姐所画。文襄时已丧耦，到省请吴仲宣制府为媒，王不允。后言之再四，始定聘焉，即王夫人，文敏之妹也，先文襄没。文襄工宋人四六，在粤督任，《谢赐寿表》有云：“葵藿之忱未泯，董桂之性犹存。”《鄂督谢任表》以“江汉南纪”对“申息北门”，人称其工。其官粤督，继张靖达任。靖达随薨于粤，文襄挽之云：“继公惭武库之才，岷首哀思，片石人传羊太傅；据鞍示矍铄可用，壶头瘴疠，明珠天鉴马将军。”时靖达为言官所劾待勘，得旨复原。文襄措词之工如此。余好访文襄轶事，姑纪数则，以恣我笔端之馀兴也。

龚定庵赵飞燕印

定庵藏赵飞燕印，本严东楼故物，后归项墨林，又归李竹懒，又归定庵。定庵宝此印如性命，作诗盛张其事。又于昆山寓居，筑宝燕阁，几欲以印为身后之殉。后卒以此偿博通，流入番禺潘士成家。潘败后，遂失此印踪迹。江建猷随江郎庵侍郎校文粤东，尚见藏此印香檀匣，印则无有矣。印为缪篆文四，曰“婕妤妾赵”。婕从系，赵字内含雀头三。以曲阜孔氏所藏汉虑僂尺度之，高七分，径一寸弱，玉质晶莹，罕有伦比。姚衡《寒秀草堂笔记》谓为某人伪刻以给定庵，定庵用宋拓夏承碑或云姜寿碑。及数百金易之。然考据诸家皆定为真汉物，姚氏所言，未足为信。张石洲言：“《汉书》赵氏婕妤三：钩

弋夫人也，飞燕姊弟也。飞燕后立为后，弟亦进昭仪，皆不终于婕妤，此印应属钩弋。”因赋诗专隶钩弋事。后又思：“篆文四，犹赵字内含雀头，得非飞燕狡猾，隐寓其名耶？”又作二诗证之。余谓作飞燕，使题诗较有感慨。今录石州后诗，为定庵张目。诗云：“涎涎双飞入汉家，前班后许无容华。舞腰新系承恩印，慧意斟酌授鸾斜。”“秋高长信霜风起，艳血飞翻豆蔻水。娇啼怆绝樊通德，里谣起取张公子。”

卷五

朱文定扑责士子

宝应朱文定朴彦，督学浙江，待士过严。有因小故，横加扑责，羞愤自尽者。浙人汹汹，至为不平。文定之父名彬，字武曹，随文定校各郡。钱衍石侍御据此纠之。文定降一级留任，父回籍。文定督学湖北时，士子覆试，童生须先呈起讲稿，然后誊入卷中，有被诃责者，有楚扑者，畏缩莫敢先上。单地止相国懋谦，时以幼童获隽，诸人给单前进。单挺身持稿本历阶而上，文定翘须厉色，意以“何物小子敢撓我锋”，欲寻隙责之。视其起讲甚佳，无可置诘，即命之下，然胸中郁怒。诸生一哄呈稿，文定默无一语，相率而罢。退揖单曰：“我辈得免夏楚之辱，子之功也。”文定自此，威亦稍霁。

刘融斋中允

吾乡刘融斋中允，先世阜宁人，蚤孤，刻苦厉学。为童子师时，默诵蔡沈《书经集传》、《禹贡注》，熟则绕案背之，贫未见注疏本也。中允道光甲辰赴礼部试，场毕，谒乡试座师钮松泉殿撰，钮问：“场中时艺稿带来否？”中允赧然曰：“同乡高南卿先生，以前后作墨卷二比，忽摹名家，体不一律，恐难出房。”钮取阅之，云：“中郎在此。”后果然。中允督学广东，仅考四府，移病归里。步访亲友，一儿捧大帽，一儿执名刺。故友早世者，每登堂拜母，奉以饼金，助甘旨之需，或兼药物，如化橘红及桑寄、生亨之类。后主讲上海龙门书院，江浙能文之士著录甚夥。已中风矣，犹阅诸生日记。李勉林制军，时为

制造局总办。萧敬孚先生言于李，以小轮船送归扬州，年馀遂不起。吾乡清宦，先生其一也。先生主讲时，好食盐渍鸭卵以十许，千文一枚，每日仅食其半。忆蒯礼翁告余一事，云昔寓上海，从先生学算。先生每日午前徒步来，略具数簋待之。先生曰：“不可，即具一肴，毋将我脾气改坏。”蒯从之。己酉五月，值湘潭王壬秋先生于江宁，曾问先生后裔何如？余具对。王云：“融斋先生很看得起我。”余曰：“见尊集赠刘诗，便知。”壬老曰：“然，此先生谦德溉人。壬秋年少时，便令心折，亦不易也。”

汪仲伊进士

汪宗沂，字仲伊，歙县人。少邃学，以礼乐兵农医自任，兼通奇门壬遁轨革家言。为王子怀侍郎婿。弱冠，以《礼乐一贯录》受知于曾文正公。朱九香先生督学安徽，取为同治丁卯科优贡生。由庚午举人、光绪庚辰进士，签分山西即用知县，出长沙王益吾先生之门。仲伊谒先生，先生即戒之曰：“不讲师生讲朋友，礼照缪筱珊例可也。”筱珊先生甲戌出益吾先生门，荐而未中。仲伊朱卷出，张香涛先生读而异之，谓朱肯夫曰：“此必外间重改本。”朱曰：“闻系原稿。”张不信，自往礼部求原卷观之，始叹服。谓朱曰：“吾欲往拜。”朱曰：“令汪见公可也。”遂告仲伊。仲伊云：“吾与张从子同年，理当先谒。”因趋出，适途遇张，折回朱所，谈一日夜。初谈商吉五行大义，张曰：“机祥小数，不足言。”又谈《三礼》，不合而去。张嗣出为山西巡抚。仲伊曰：“吾宦情本淡，况不乐为张属吏也。”遂终身不仕。后出参李文忠天津幕府数年，荐于晦若自代去。嗣袁爽秋外简徽宁池太道，聘为中江书院院长。李学使端遇奏保五品卿衔，家居，主讲黟县书院。丙午，年七十，拟不出矣。元日，取《周易》筮之，得“晋之震”，乃复就蒯君礼卿之聘。与余望衡而居，每日必谈至三更始罢。于朝章国故及当世人物，扬眉盱衡，更倡迭和，私谓得余之晚。时暑雨浸

淫，江宁人士由蕴热患红痧，处以辛凉解剂即愈。仲伊在扬州，用古人预防法，自处大承气汤服之。重至江宁，颜色瘠瘦。余询知其故，曰：“奈何以老人尝此峻剂？”余八月归里，闻仲伊十月病没，其病下利，亦以服药败也。仲伊初见文正，令其校刊《王船山遗书》，与欧阳晓岑论题王夫之像，晓岑云：“曷题明某人？”仲伊云：“既入国朝，不应再署明字。”与晓岑大哄。改入采访忠义局，又与陈虎臣、杨仲乾不合。复入书局，与戴子高、刘恭甫善，而以刘海山先生为师。洪琴西为书局总办，最赏之。仲伊之学不纯，然恢奇豪达，不名一家，与之言，如瓶泻水。要足为余老友之一，惜其别后，不复再见也。子律本，光绪甲午举人；其餘诸子，忘其名矣。仲伊言：沈又肃最重李小湖先生，有同乡某来见，求为向沈关说扬州盐商一事，可得馈二千金，足以救贫。李怜其窘，欲许之，徘徊未发，商之仲伊。仲伊曰：“先生以清介为沈所重，奈何以此自污？若徇同年之情，请以所入束修分润之。”李大叹服，曰：“吾几失节，由子救我。”仲伊又言：馆勒少仲家，教其某子，归应江西试，勒请仲伊送考，时督学为李公文田。仲伊用六壬占之，预拟一赋，系论乐律题目。勒子就试占场，果遇此题，遂冠其曹。李后誉勒子于同官中，不知为仲伊作也。仲伊之术多如此，然丙午出山后尚言“此岁必有京师之行，就天津谒某督”，说以时事，迄亦不验，而仲伊死矣！仲伊由陆凤石相国奏进遗书，诏入国史儒林传，自足不朽。右系仲伊轶事，恐余之外，无能知者，忆而记之，如见我仲伊也。

左文襄不礼唐镜海

唐镜海先生鉴，为仲冕先生之子。少以理学名，由布政使入为太常卿。回里后，奉诏入都。召见后，有旨令主江南书院，为士矜式。先生在都，若倭文端、曾文正、何丹畦、窦兰泉，旨从奉手受教。先生奉旨还乡，骆文忠欲延主岳麓书院，左文襄力持不可。王壬秋语左：

“唐先生系奉旨主书院者，有何不可？”左不得已，改聘先生主常德府某书院。先生艰于舟行，又为盗劫行装，惊悸而卒。余谓文襄年少气盛，镜海理学名人，延接后进，多为峻容，亦不可犯。文襄与镜海，必宿有不嫌，故稍持异同如此。

段懋堂先生避横逆

懋堂先生历官黔蜀，罢官后，弃其故土，侨寓苏州。先生所著书自序屡言“避横逆”，文集又言“为墓田讼事，垂老断断于此”，度当时先生必为此久遭齟齬不自者。余叩之友人，云：“先生自黔归，宦橐稍裕，族弟某艳其资，嗾他人更番黜先生，几为所窘。故先生著书，不忘书此。”云云。家庭构衅，至积不能平，虽以通人处之，无能保其夷粹也。

王幼霞给谏

幼霞给谏名鹏运，广西临桂人。幼霞父名必达，官江西。当曾文正以客军援江西，江西大吏多掣文正肘，遇不以礼，幼霞父独谨事文正，馈饷不绝。文正常举告僚属，叹为有侠义气。幼霞在中书积资最深，有刘贡父之病，貌为之损。两次考取御史，皆以召见被抑。后卒由御史官给谏，上封事，不纳。病免，游江南。张文襄属扬州运使聘为有仪堂总教习，时癸卯年也。甲辰余客扬州，欲往见幼霞，访桂林遗事，蒯君礼卿云：“余即邀幼霞游平山堂，请君作陪，可以畅谈。”会礼翁有事赴仪棧，幼霞游苏州，猝病，卒于旅舍。余悔与幼霞失之交臂。若余早见之，质以所闻，幼霞必无靳于我也。

狗曲成讖

《汉书·儒林·王式传》：“诸大夫博士共持酒劳式。博士江公心嫉式，谓歌吹诸生曰：‘歌《骊驹》。’式曰：‘闻之于师，客歌《骊驹》，主人歌《客毋庸归》。’江翁曰：‘经何以言之？’式曰：‘在《曲礼》。’江翁曰：‘何狗曲也！’式耻之，谢病归。”颜师古注：“言狗者，轻贱之甚也。”昔余友陈君惕庵应两江师范学堂总教习之聘，以礼责诸生，诸生哗然，惕庵即襦被归。余有诗记此事云：“狗曲共嗤王式礼”，云云。后余于庚戌就安徽沈子培提学存古学堂之招，沈已告病卸任，余亟赴皖与沈仅谈一炊顷而别。在皖阅卷留一月馀，寄沈诗亦有“直虑江翁讥狗曲”语。次年开堂后，诸生以余评语过严，心怀不平，幸余徐以言导之而罢。由此观之，“狗曲”一语，余与惕庵分尝其厄，有先见之几焉，谓之讖语可也。

己酉愚园之集

湘绮先生，灵光岿然，海内人士，无贤不肖，皆知有王先生。己酉五月，先生游江宁，由刘蘧六郎中领袖，公宴先生于胡氏愚园，并摄影焉。一时坐客，以齿序列，如长洲朱仲我孔彰、独山莫仲武绳孙、江阴缪艺风荃孙、邵阳魏季词繇、义宁陈伯严三立、清河王寿萱锡祺、汉寿易实甫顺鼎、兴化李审言详、丹徒柳翼谋诒征、贵池刘蘧六世瑗、刘恂甫诒慎；期而后至者，清河吴温叟涑、江都梁公约莸；尚有桂阳陈君及某某等，不能尽记。先生神明不衰，雄谈如少壮人。诸君以旧事相问，一一缕答，而于肃裕廷冤狱，言之犹为沉痛，艺风先生亦然其说。质以曾、胡、左三公事，皆为人所未闻。虽嘲谐间作，足备记录，为后世故实，诚雅集也。先是，余等集于此园联句，余有句云：“遥知汉太史，应指德星明。”诸人以为兴会。未几，即宴先生

于此，余诗若为兆焉。

哀 溷 阳

余于壬子四月作《哀溷阳》诗，为端忠敏而发，一时附端者，颇致不满。昭文孙师郑谓“不愧杜陵诗史”。襄阳周君自京师客上海，述宝端臣侍郎言及忠敏云：“‘出山富贵为群奴’，兴化李先生诗，有旨哉！”然余诗尚有“昔为人羨今人怜，纷纷过眼如云烟。精灵啼血时来往，莫使空山化杜鹃”。非极哀之，肯作此语邪！

汪 本 楹

安徽沈子培提学曾植，于宣统庚戌创为存古学堂。本合皖南北高材生各十人，分科讲学。不循学堂新章，先发题，甄别限期缴卷，不用扁试。以故，倩替者多，不辨真伪。教员：元和朱孔彰、桐城姚永概、黟县胡元吉及余，共四人。姚、胡皆他适，余与朱先生独留阅卷。余得刘和光，朱得汪本楹，余让朱君取汪第一，刘次之。沈告病交卸，后任提学吴隶轩同甲，将荐卷送巡抚朱中丞家宝覆定。余与朱先生赴抚署辞行。中丞向朱先生拱手云：“请仍让刘和光为第一。”及次年开堂，刘殊不及汪。改革后，汪从休宁时通书问，深以余为可师，而议论亦与之合。闻其在家闭户著书，不预人事。刘和光者，久无音耗。因之汪本楹遂储余心胸间，不能忘去。

记东台之游

东台去吾县一百馀里，余于光绪二十二年偕姨弟许葆生，因相墓事，访汪作舟于东台。时天寒微雪，作舟方集弟子讲学，馆余于某道院，饮宴于此。作舟谈轨革壬遁之学，复论文字源流，轩眉抵掌，

诸弟子屏息瑟缩以听。陪客有瞿冲斋伯恒、吉凤池城。冲斋始由广西弃官归，谓余云：“为人出而入官，退而归耕，方不浮情。我今犹能扶犁耕田也。”凤池丹阳人，居东台数世，精研经训，与丹徒陈星南祺寿齐名。不知作舟何以不招星南，余亦忘访之。未识凤池时，余赴面馆早餐，隔座有持服者，与客谈古今事，旁若无人。余意此必凤池也，前叩姓氏，果然。余客东台诗有云：“海隅喜见文章聚，谁信中间有客星。”指此。光绪丁未重晤凤池江宁，出此诗相示，余方忆其全貌，星南时已定交矣。

南浔富绅善刻书

今之南浔富绅寓上海者，有周梦坡广文庆云、刘翰怡京卿承干、张石铭观察钧衡，皆善刻书，聚宾客，有宛平查氏、祁门马氏之风。淞社之立，周刘两君，持之甚久。翰怡刻书最夥，石铭次之。翰怡喜刻未传之本。石铭喜刻丛书，几媲津逮。梦坡喜刻新集之书，为海内文囿，稍延慧命。年辈视刘张为长，而风雅好事，躬为领袖，兼富游兴，年几七十，视听不衰。石铭已以忧死，翰怡归守南浔藏书楼，奉长恩之祀。梦坡犹手自著书，亲为条例，岿然为鲁灵光。余藏三家刻书略备，丙辰怀人诗，记三君有“湘素景摹凋印绝，前惟乌镇后南浔”语，盖实录也。

张文襄喜打诗钟

诗钟原始，江阴金粟香先生谓，义起于古之击钵催诗。余谓不然，盖古州群乐名建除八音数诗，推阐及此，纤巧割裂，未见其胜。张文襄每与客集，必打诗钟，佳者击节叹赏。蔡伯浩以得明保，黄叔颂因委宜昌厘金缺。蒯礼卿言，文襄圈识佳联，随即弃置，故传者不多。当时工而且速，推易实甫、文云阁。张季直最钝，而亦不工。礼

卿差优于张，此其自言。伯浩见赏，系嵌第二字“射虎斩蛟三害去，房襟杜算一身兼”，叔颂左第五字“弟兄岑氏奇皆好，姊妹杨家态最浓”是也。

梁星海赠诗扇

梁星海于光绪戊申游江宁，寓中正街陈伯严吏部寓庐。访士于陈，举朱仲我、吴温叟、梁公约及余以答。梁各书团扇相赠，皆写旧作。余扇为《江上怀朱一新》五律一首。余报诗云：“梁髯朱叟最相亲，去国当年两谏臣。”友人谓二语已得骊珠。仲我亦有答赠之作。公约为星海门生，谢诗例作师弟感激语。今阅二十许年，星海、仲我、公约皆下世。余扇付裱背，与沈寐叟折扇共为一轴。记怀朱诗首云：“分此千里月，照我两人心。”今星海遗集载之。

沈乙庵述李若农善相

李若农先生文田以善相名。乙庵，其门生也。一日集于沈所，门者以梁启超刺入，沈亟白李曰：“老夫子曾言，吾乡新出梁生，足为粤人生色。今其人来，可以一谈。”及梁入，李骤色变，翅须咏齿，若无所见。梁窘甚，辞出。沈云：“往者老夫子于梁闻声相慕，今何蓄怒以待？”李云：“耗子精，扰乱天下必此人也。”又，杨士骧由直隶藩司入观，诸京曹公宴若农，请杨加入。李见杨，不甚接谈。后杨先行，沈问后者，莲甫何如？默然不语，再问，则大声喑云：“又是一个总督，奈何？”此两事，沈亲告余，以鲜知记之。

书袁爽秋事

袁爽秋在芜湖道任，因纳妾为正室所不容。袁行部外出，扃妾

一室，以钥付门生汪某管守。汪歙县人，能为文章，非虚造者。又爽秋在扬州淮南书局，同事某好狹邪游，昼为酣卧。爽秋惜其不学，其熟睡，燃灯蕊粘其额上，渐灼至肤，某负痛起，欲饱以老拳，爽秋深谢乃已。此一事乃吴温叟闻之于高叔迟者。余偶书两事于商务印书馆月报中。时在沪馆，天已昏黑，门仆持袁荣叟名刺来拜，延入，则挟汪某同来，并馈余书数种。言书事非实，请为更正。余言：“尊甫忠节自在天壤间，前一则无非范文正庆朔堂及胡澹安梨女故事；后一则为说部谈助，俱无害也。若言更正，请君自为之。”不悻而去。后汪某暴卒，袁乃假汪子语更正。汪某在时，以言自出，渠必不肯为。余与爽秋，素无爱憎，其子力为辩护，吾意欲为乃考作两虎舂豚计也。

曹君直定交之始

丙辰余在里跌伤右臂及足，不能赴馆。居停主人刘聚卿，别延曹君直舍人元忠代馆。君直善目录学，工为樊南体诗。余于九月初赴馆，君直别编《碑刻目录》，乃叶鞠裳先生新售于聚卿者。九月六日为聚卿生辰，例将余所撰寿序悬于厅事。君直捧烟筒读之，初犹微讽，继者愈高。读竟，视撰者为余，乃前揖曰：“孔孺轩《戴氏遗书序》，不是过也。”因定衿契，日夕谈艺，至岁暮始别。君直集名《土室诗存》，有赠余作。

仪栈联语

仪栈初设瓜州之东，与金焦距离不远。初任总办庞际云，铃阁悬曾文正联，有“两点金焦”语。逮后移仪征之十二圩，仍悬曾联。张文襄于壬寅冬履勘仪栈，觉文正联与风景不合，举张融《海赋》“积雪中春，飞霜暑路”，命门人蒯礼卿、黄仲弢觅对句。礼卿退以属余，

余云：“莫妙于《江赋》‘总括汉泗，兼包淮湘’。”礼卿称善，云：“泗字稍欠。”余云：“《孟子》已云‘决汝汉，排淮泗而注之’，江兼统于淮，何妨！”蒯告仲弢，亦以为切。文襄自用左思《魏都赋》“洗兵海岛，刷马江洲”对之。文襄书此联，凡易十数纸。材官往来取回，然后付刻。余谓蒯：“南皮好名，好上人，如此实则不通。仪棧临江，非海岛也。江中可居曰洲，古有明训。即强名为洲，骑兵营隶仪棧，亦无马队，何刷之有？情何如我湘鄂皖赣，四岸稍有关切耶？”

王句生诗文集

仪征王句生翼凤《舍是集》十卷、《声远堂文钞》四卷，从友人假读。句生学诗于黄春谷，受文于包慎伯，与梅蕴生、杨季子、刘孟詹齐名。集中七律，酷似明杨升庵。句生以咸丰庚申殉难杭州，其兄西御及季子殉于郡城，孟詹避兵以忧死，安吴转徙淮北遇盗惊悸而卒，于是扬州风流文采尽矣。读句生集，不能无感也。

俞德渊惩改扬俗

光绪新修《两淮盐法志·名宦俞德渊传》：“扬州俗尚奢靡，德渊以俭朴矫之，谨守管钥，权贵游客皆失望，德渊不顾也。”此语隐以卢雅雨、曾宾谷为非。夫果能综核名实，游客稍假借之，穷措大塞破眼孔矣。卢曾二公盖得其意。德渊为卓文端秉恬陕甘主考所得士。文端以诳误罚钱，贷于诸门生，德渊守其俭朴，吝而不答。及文端典江南试毕过扬，德渊就谒舟中，文端置之不理。德渊暴病卒，人多谓文端示以难堪。此见梁章钜《归田琐记》。余曾与缪筱珊先生太息言此，先生即以文端典陕甘试年岁告。德渊甘肃平罗人，志作“平乐”，非也。

李晴峰之仆

仪征李晴峰先生，方在仙女庙讲学，闻黄匡山被焚事，避居泰州，门徒最盛，世遂称为泰州教。吾闻某姓童，自江宁围城逃出，先生养之为仆，懵幼无知识也。先生与诸生讲，此童窃听，稍有所悟，因此粗通文字，渐且淹贯。善烹饪，为厨师，好学不废。或遇先生怒逐之，则涕泣首伏，依先生数十年。先生没后，仆作长联挽之，泰州友人昔以告余，仅记其两末句云：“徐甲发肤非己有，刘安鸡犬尚人间。”叹以为工。徐甲事见《神仙传》，李义山诗：“不因杖履违周史，徐甲何缘有此身？”徐人罕用之。此仆所隶两事，恰合身分，余好语于人。晴峰先生仆，亦未可轻，恐萧颖士之庄亮，尚不如也。

张啬庵赠梅郎诗

梅伶兰芳，张啬翁一意揄拭，有过于龚芝麓、吴梅村之誉王郎者。啬翁去年有《送梅诗》云：“梅郎再去南通之日，有迫即去，伸意为诗，视而送之。诗云：忽见清瘦减容光，名为身魔亦可伤。北海鹏搏千里绝，南山豹雾几时藏。愁花况奈春无主，泣血宁知璞已创。我且欲谋岩壑遁，不辞剪纸与温汤。”门人刘之泗读通州报，见张诗，问余“温汤”所出。余云仅“温汤”二字，即温泉也。之泗举全句，余曰：“此张先生用杜陵《彭衙行》‘暖汤濯我足，剪纸招我魂’语，改暖为温，所以便韵也。”余适因吾邑与东台争刘白两场，有书属啬翁为调人，久而不报，以诗促之，即授梅郎事入诗材云：“濠阳水筑称幽居，那得无闲作报书。圭窠荜门能举契，华离荐食敢凭虚。玉川自署甘虬虱，杜老微吟足鲤鱼。怜到梅郎清瘦甚，温汤剪纸定何如。”旋得啬翁和诗，并云：“前用《彭衙行》，以温字较响，故易以暖，无别本也。”以余书中问温汤有别本，故答之如此。其实古人多有改字适

韵之例，不必为啬翁讳也。因梅郎事，乃张拨余两人以诗为骑驿，遂连缀及之。

上海刘公会

余甫馆上海，每年四月迎刘公会，旗伞仪仗与寻常赛会同。刘公偶像在后，冠服翎顶，坐八人肩舆，略如督抚体制。前列衔牌不下十馀对，有道光丁未科进士等字。后考公名郇齐，河南太康人，咸丰四年署海防，同治八年署县事，除豪绅把持漕粮之弊。十年贼陷苏松，县城危如累卵，公倡为坚守。计相持数月，剿贼屡有斩获。贼陷浦东，公往御之，以众寡不敌，跃马投水，遇救免。汉奸余义政谋纳贼，公立诛义政。又斩通匪之严柄，守益固。同治元年，以全城功，特旨擢署江苏臬司，帮办军务，旋署藩司兼护理巡抚。后以母忧去官，哀毁卒。或云雉经以殉，莫能明也。母亦贤母。当大海会匪戕署知县袁公德祖，时公署嘉定，母就养，甫抵岸，亟入城，以固人心，尝训公曰：“县令造孽易，修福难。”公故凜凜于母训，忠孝存焉，没后，李文忠奏请照军营病故例，赐恤十二年。绅请立专祠，此正合有功德于民则祀之义。赛会本为愚民报德之举，顷以迷信一概禁止。余恐商民不知刘公本末，略著于此。

丹徒成林奇遇

丹徒成林，自号竹隐，以郡中竹林、招隐，擅山林之胜也。少工写真如陈老莲，得自幼慧。年十七八，即以技鸣归安。严条能记成奇遇。一在金山寺时，偶玩月江际，见有小艇乘潮自至，则一妇人携两少女登岸，告成欲宿于寺。成以寺不容宿妇女，乃以己所居室让之，而于门外清坐彻夜。比晓叩户，寂然无声，乃排闥入，不见女所在，甚为异。忽于枕函边得一金钗，上缀明珠七粒，知为神女遗物，

因宝藏之。一在客山东时，某巨室招绘阖家欢图。成美丰姿，巨室女亦绝色，私悦成，成不知也。一日，巨室父兄欲他往，與已驾来，就成絮语，女忽褰帷，见父兄在，却回，父兄略不为意，遂驾车出。成乃枯坐斋中，女忽遣婢赠成白金五十，金跳脱一，促成速行，曰：“父兄回，君将不免。”成仓皇遁行三十里，闻女已雉经。严所记如此。案：此事在成，不能以挑诱责之。山东大姓素守礼法，乃使年少画师窥其妇女颦笑，揣摩形似，其父兄亦不得为无过。然成遇神女偶获金钗之报，不致有成公智琼弦超之事，神女诚不以情感累。女仙成公智琼下嫁齐北从事掾弦超，见《搜神记》。如巨室女自知非礼，而以死雪耻，勉成速行，亦自可伤。两事若经文人点缀，谱作曲剧，必足动人。吾哀成林有柳下颜叔之节，而不免于登墙掷果之嫌，色累之也，然其遇亦奇矣。

钱牧斋贡豫王礼单

国初，豫王兵薄南京，宏光出走。明故臣忻臣伯赵之龙、大学士王铎、礼部尚书钱谦益、都督越其杰等迎降。王引兵入城，诸臣咸致礼币，有致万金者。诸暨曾王佐为豫王记室，得见王铎以下送礼帖子，而传之于苏人张滉，独记牧斋帖子。前书：“太子太保礼部尚书兼翰林院学士臣钱谦益百叩首，谨启上贡。”计开：“鑒金银壶一具，法琅银壶一具，蟠龙玉杯一进，宋制玉杯一进，芙蓉犀杯一进，天鹿犀杯一进，夔龙犀杯一进，葵花犀杯一进，法琅鼎杯一进，银镶鹤杯一对，宣德宫扇十柄，真金川扇十柄，弋阳金扇十柄，百子宫扇十柄，真金杭扇十柄，真金苏扇四十柄，银镶象箸十双，右启上贡。”又署：“顺治二年五月二十六日，太子太保礼部尚书兼翰林院学士臣钱谦益。”此事见王应奎《柳南随笔》。王谓：“钱独致礼甚薄，盖表己之廉洁。”以上所贡观之，亦不薄矣！柳南又记：“曾氏语张滉云：是日钱公捧帖入府，叩首墀下，致词于王前，王为色动，礼接甚欢。”

案，牧斋即以此夸于吴人，谓被王礼遇。大军徇常熟，所在杀戮。牧斋树帜于门，邑人争避其家。豪仆索重贿，始许入，因此获利甚夥。可知牧斋所献，颇当王意，当时固不以金珠为贵也。独不知玉杯、犀杯，皆言“一进”，不解其意。牧斋博雅，必有所本，拟俟通人问之。

蔗 菩 萨

池州崇祀梁昭明太子，自宋已然。尤延之谓水旱灾疫，禱无不应者也。今池州奉之不衰，村里赛会，舁神像，敲钲击鼓，导之出入，名之曰“蔗菩萨”。询以“蔗”字何义，人不能答。神作蓝面，貌极狞恶。然事之必谨，如妇人孺子有匿笑指顾者，往往中恶，口角目眦身痛诸病，如家人自投首则已。神之威灵亦赫矣哉！昔顾敏恒在池州撰《昭明庙碑》，不知此事，文中遂少一波澜。余拟赋七古一首张之，尚未暇也。

鸡汁淪龙井茶

余甲辰客扬州，徐积馀观察以新刊胡研孙《粮储词》见寄，中有咏樊山以鸡汁淪龙井茶词。此事新隼，可入食单。余《扬州杂诗》有：“鸡泊新成淪茗词，才人作宦鬓如丝。江南回望长安月，记否樊山夜集诗。”咏此事也。后余游粮储署中，见茅亭上有研孙集杜一联：“正是江南好风景，每依北斗望京华。”叹为才者。然余诗先成，“江南回望”之句，与研孙联语相应，若有先兆，殊不可解。

卷六

郁华阁集

《郁华阁集》三卷，长白伯熙祭酒盛昱撰。盛昱没后，其表弟杨鍾羲手写刻之，前有蒯礼卿光典序。时为光绪三十二年，蒯将赴欧洲，不知属何人代撰。余已馆编译官书局，友人见蒯序，犹谓余曰：“此君所为也。”余曰：“此文发端，袭有正味斋《曾盱江遗集序》，后复直钞傅季友《修张良庙教》四语，又有‘钟期既逝，庄生于焉寝管’。‘辍弦’尚切，‘寝管’系隶何事？余前虽司蒯笔札，恐不如此之陋？”友有惭色。

谈艺琐录

张鸣珂《谈艺琐录》六卷，聚珍小字本，体仿《墨林今话》，兼录生存之人。就中为余相识四人：安吉吴俊卿、武陵赵于密、嘉兴金蓉镜、汉军郑文焯。吴、金为同社友最契。赵字伯臧，识于沈子培先生座上。同集者，朱古微、罗叔蕴、曹君直、杨子勤。伯臧与叔蕴论汉晋名陶釉色，与今不同，不知其能画也。赵寓上海马霍路，惜未往拜，乞得一帧藏之。郑一画一书，皆有价值，深自矜贵，为吴中老词人。

闾韵联句

往馆上海，李晓墩世由，招饮白克路寓舍。客有临桂况夔笙周

颐、湖南程子大颂万、湖北黄季刚侃。余到甚迟。子大倡阉韵联句，作香奁体。余得“琼”字，须用人名作对。琼上一字必仄声方洽，习俗飞琼，不可使也。夔笙窥余作微笑状，程、黄亦静默以俟。余从容书“彩伴云耕下智琼”七字，子大拍手，季刚回视，夔笙若有惭色。初意窘余，不知尚有智琼事在，为余拔山之助，稠人广坐，宜稍有所知，守之以谦，不然殆矣。

黄仲弢蓼綏阁集编辑始末

黄仲弢绍箕，没于湖北提学，遗稿散佚。端甸斋督两江日，携仲弢残稿，付江楚编译官书局坐办陈庆年，续访诗文，延友编定，畀以二千元，不足则以官局经费济之。余局员也，名为帮总纂，应隶总纂缪艺风先生教下，陈为坐办，公然以僚属视余；则长洲朱先生孔彰，亦在威胁之下。陈既任续访，无计搜茸，延友又无相当之人，且须分其润金，谓余可以虚礼诱也。一日闯入余室，问曰：“仲弢遗箸，有可访否？”余曰：“袁爽秋《于湖题襟集》有仲弢诗文，《樊云门诗集》附有仲弢诗，孙仲容《墨子间诂》，记有仲弢跋，诸书余皆有之。”陈称善，即持馀稿，属余编入。其《题李文石大明湖图》，已列前稿，抄者误将“白雪夫于”，写作“白雲夫子”，余为改定。又改“阙特勤”为“阙特勤”，“福本”之“福”，即古“副”字，考见《匡谬正俗》，而前稿作“福”，经某君改为“副”，不知有从衣之“福”也。《寿许仙屏诗》“小波”，余改为“坡”。陈又属他友覆勘，复改“勤”为“勒”，改“福”为“副”，余乃正色告之，始定。仲弢妇弟张黄楼观察致书于陈，询黄集定否，陈复书言延友访辑，尚须多金，乞加筹数百元，不足由某自任云云。此在甸斋移直督后语。誊写书记吴某，余时周其乏，知黄集为余搜录，窃其书稿视余，似有不平意，余乃知陈干没如此之巨，后晤黄楼上海，仲弢集卒未刻，而不知有此一重公案。“蓼綏”训大，东瓯人语，义见《方言》。

鲁通甫先生入国史文苑专传

光绪壬午癸未间，史馆议修儒林、文苑、循史等传。山阳潘德舆，入文苑立专传，鲁一同、孔继铤附焉。鲁与潘为友，孔则潘之门人也；史馆误与孔列，鲁氏后人，窃为不平。李莼客极重通父议论，曾摘其文入笔记中。赵次山领清史馆，缪艺风先生为纂修，任儒学文苑传，余言之艺风，通父宜别立专传，艺风然之。此语偶传于通父之孙字志刚者，诒书问余是否。艺风已逝，余从缪世兄子彬乞得艺风拟传寄志刚，即据以刊通父集前。余未见清史定本，艺风之稿，即作横云山史稿观可也。余好通父文，谓善学范蔚宗，故思报之如此。

陈兰甫先生赏识于晦若

贺县于晦若式枚，出游广东，时方年少，往谒兰甫先生，大加赏识，赠诗云：“桂海奇才出，神锋不可当。”此沈子培先生告余者。余识晦若于艺风座上，极口诋项城，诵范蔚宗《后汉书》书法以相譬况，其神锋颀然不可见矣。

康南海公羊之学

世传南海以公羊之学，昌言变法。沈子培先生告余云：“君知南海研究公羊所从起乎？”余云：“大约由龚定庵以上溯刘申受学术耳。”沈曰：“南海入京，几于每日见顾。余自译署及刑部画诺归，疲倦异常，南海已在座，乃言：‘今日困极，不能奉陪，廖季平适寄著书来，可持回视之。’南海以此心醉公羊，由季平之书导之。”余因云：“外传王湘绮言‘南海康某乃我再传弟子’，殆以此故？”沈曰：“然。”

李爱伯先生

会稽李爱伯先生慈铭，庚午举人，庚辰进士。其座师房考咸尊为爱伯先生，而不敢以师生礼抗。爱伯亦狎侮不顾，老辈阳敬之，畏以得罪一士，首为之倡，其名声之慑人如此。官御史日，一弹顺天府尹孙楫，威胁东路同知郝联薇，致令自尽。一参费念慈某事，台规顿肃。而于李少荃相国，不无微徇，人亦谅之。爱伯甲戌会试，以试帖诗十韵被摈，卷出王益吾先生房。缪艺风先生言爱伯遇科第显贵，务摧抑之，不为礼。若后门寒素修谒求进，无不款款虚己，与谈诗文要妙，且设食相待，为之吹嘘，不遗余力，正其兀傲不群处。世人但以骄矜目李，过矣。爱伯日记百许册，经蔡子民先生募印；尚有若干册，为樊云门匿而不献，或云中有诋张文襄语，涉及樊山。又云樊山改名他师，于樊极不满，此疑案也。爱伯人兼狂狷，与狭中护前者绝异，今世亦难得此人。

南京鸡鸣寺豁蒙楼

张文襄再督两江日，属黄华农方伯，于鸡鸣寺东，伐去丛木，建楼其上，俯临台城，以览玄武湖之胜。楼成，文襄署扁曰豁蒙楼，取杜《八哀诗·咏李北海》云：“朗吟六公篇，忧来豁蒙蔽。”不知文襄于义何在？余于光绪乙巳六月十九日夜，偕合肥刘访渠泽源、殷孟樵晋龄登鸡鸣寺，东蹊此楼。见后湖灯火，灿若繁星既而微月渐上，极视后湖，深绿浅白，尚可仿佛一二。次日余赋七古一首，有“台城北负山陂陀，鸡鸣高揭争崑峨”句，又云“万柄荷香不入城，窈窕一川花事歉”。蒯礼卿观察极赏此诗，且朗吟荆公诗“扶舆度阳焰，窈窕一川花”证之。余与梁公约、吴温叟、李晓暾，召集艺风先生、况夔笙、王道农、刘龙慧，宴于此楼。时值亭午，后湖明丽如画，荷花亭

亭，高出水际，与夜游迥异，楼名“豁蒙”，其庶几焉！

吴子修先生悔馥生诗

子修先生逝后，令似絅斋寄先生《悔馥生诗集》，中有与余赠答之作，又为余序《游杭诗录》。先生为王益吾先生乙亥典试浙江所取士，欲与余认同门，余不敢当。先生诗庄严典重，音律谐畅，无诘屈生涩之病。冯蒿叟序述先生论诗云：“所贵乎诗者，率吾之真，与其身世所遭，曲以导之，沈挚以宣之，蘄与古作者相符契。若今之治诗者，桃唐祖宋，务为奇涩幽怪，上夺西江黄陈之席，或曼衍其词，出入玄释，若可解若不可解，以簪鼓聒俗。之二者，匪唯不能为，亦不欲为，凡君所言，雅与余合。”云云。此语似为举世崇尚散原派及定庵派者，痛下针砭。子修、蒿庵，皆散原同年生。蒿庵素谦，揭之务尽其态，殆将死之鸣，为世人正告之，使后世勿谓当时无人持正议也。

扫叶楼联语

扫叶楼在江宁清凉门内，即龚半千隐处，楼上画扫叶翁像。山势极高，与南唐翠微亭相接，南望可望牛首隐于云雾间。往与友人刘访渠、殷孟樵登此楼，曾集句为联云：“四禅隐岩曲，双阙似云浮。”蒯礼卿极赏之。访渠任书，卒未果悬。至今思之，似不可无此联也。

赵秋谷比苏子美

赵秋谷以国服未满丧燕客，演《长生殿》剧罢官。苏子美因进奏院神货，拆封纸钱，召馆阁同舍共宴，集优伶女妓为乐，经言者论劾

去职。秋谷以常熟赵某不在招客之列，怂恿黄给事上章，兴此大狱。子美亦以李定求预剧会，子美不纳，定腾谤都下，致御史刘元瑜希合弹奏，坐客皆斥，梅尧臣亦在其内。秋谷坐客，亦遭对簿之辱，且有贿免者，查初白亦在列。子美年四十馀死，秋谷年逾八十始卒。两事遥遥相对，而进奏院事，人罕传之，余特合举，为当年朝士隐有所忌。少年新进，不可轻触其锋，而一蹶不振也。

曾国藩言论不合

《曾文正公日记》论近代博学家，言其中为人者多，为己者少。顾亭林、江慎修、王怀祖、方望溪、姚姬传、朱可亭、秦味经为己。阎潜邱、戴东原、段懋堂、刘海峰、纪文达、阮芸台为人。详案，此等议论皆头巾气。若言为人，谁非为人？为己，谁非为己？且学术本以概人，己何预焉。文正此语不合。

吴穀人垂老集稿

穀人先生《垂老集稿》，藏于高邮宣氏。后有阮文达跋，言：“穀人先生馆阿文成家，余时在京，先生时有教益之处，为人泣下，人不知也。”案文达此跋，在予告归里之后。尝质此于缪艺风先生，谓文达当时，疑必有援之入和致斋门下者，穀人以不附和故，阿文成延为其孙那彦成师，文达又得穀人之教，皤然不滓，为世名臣，宜追思为之泣下也。

近代诗人四家

近数十年来，海内所称道之诗人，樊云门、易实甫、陈伯严、郑苏堪四家，如四大宗。然亦据科第声势，故相捕逐，未必真得四人之

精诣也。樊由庶常散馆知县，受知于张文襄、鹿文端。易实甫为故方伯之子，早捐道员，才气无双，有龙阳才子之目。陈以公子著称，后举进士，与乃父幼铭中丞同为党魁，康梁新学，提倡在先，得名最重。郑好谈经济之学，诗亦刻挚豁露，与上三人不同，其后驻防龙州，官至方伯，而诗名益大。几于妇孺走卒，无不知有四人名姓。少年后进，有才华者学樊、易；锻章炼句，语必超奇，则学伯严；议论闳深，洞胸达腋，务尽其致，则学苏堪。樊、易之派，盛于北方；陈、郑之派，擅于东南。四人与余皆有渊源。余诗体与樊、易不近，亦羞为之。陈谓余为学人之诗，郑许余诗，皆余所不经意处。实甫游山诗最佳，而以五古为胜，其七律对仗愈工而愈无理。樊山七古，为梅村之云仍，隶事喜使赵宋以后，取其纤仄鬼琐，琢句不外刘长卿、姚武功及南宋四灵体，苦无变化。若邓弥之先生五古，王湘绮之七古，曾无人寓意于此，以为四人所囿而不能自拔也。

两 野 狐

《法苑珠林》五十四有言野狐事，其一野狐捕得一鹰，复见河鱼，舍鹰拾鱼，鱼既不得，复失本鹰，贪捕其两，不得其一。又摩纳诵刹利书，有一野狐，住其左右，专听诵书，心有所解，作是念言：“我解此书语，足堪作诸兽中王。”前为不知足戒，后可为不学者勉。

吴 挚 父 文

吴挚父文，新出东洋皮纸本，蒯礼卿观察购两部，以一部寄江宁余书斋中。蒯自十二圩差次回宁，即请余谈，曰：“挚父文何如？”余曰：“难言之。”蒯问故，余曰：“姬传先生论文不可缺者三，有考据在内，挚父于考据特疏。”问：“何以征之？”余举《潘星斋侍郎神道碑》“道光丙午典云南试，与滇督阮文达，赋诗相倡和”，文达已于道

光戊戌予告，丙午正其在籍重赋《鹿鸣》时，何得如吴云云？蒯不信，命仆取吴集至，览毕叹曰：“那么不是。”余因曰：“今之工古文者，往往如是，不足为怪也。”

汪容甫文笺

余好汪容甫文，因有《容甫文笺》之撰。友人每举汪文中隶事相诘。光绪辛巳，馆淮扬道署，上元周左麾鉞，问《广陵对》“忠孝存焉”有本否，余曰：“见《蜀志·诸葛瞻传》注。”丁巳充江楚编译官书局帮总纂，坐办陈庆年好倾人以为快，一见即问汪容甫《自序》“目瞑意倦”四字所出，余曰：“见贾公彦序《周礼废兴》。”幸不为其所窘。戊午客上海，晤仪征刘谦甫富曾。余偶言汪文如《黄鹤楼铭》“桃花浥水，秋月春风”，似无典实，尚出《南齐书·良政传序》。谦甫遽惊曰：“此先兄恭甫名寿曾。矜言独得者，不谓君已知之。”又如《自序》“受诈兴公”，见《世说·假谲篇》，余于严冬拥被观书得之，亟起书于日记。孺人赵云珠掣余足曰冷，余不可。曾著此事于丛录序中。后二十余年梅县古君公愚补笺汪文，于《广陵对》、《黄鹤楼铭》两事，皆能注出，但引《南史》，未著《南齐》，稍异耳。

三国演义

《三国演义》一书，风行海内，世人几疑为正史中有之，非稍知读书者，不能辨其真伪。即论关公一节，赤兔马为吕布良马，当时有云：“人中吕布，马中赤兔。”见《三国志·吕布传》注。此马无归关公明文。秉烛达旦，明潘辰鉴断指为关公之大节，《蜀志》关传亦无之。胡元瑞《笔丛》，诋潘氏为俚儒，是也。周仓亦并无其人，元人《关庙碑》有“骑赤兔兮从周仓”，可知相沿已久。苏东坡言“小儿听稗史，闻曹操败则喜，蜀先主败则戚”，似此书已有平话流传宋代，特非今

之演义耳。

邬友仁

张燕公撰《虬髯客传》，瑰奇恣肆。其言唐文皇裼裘而来，神气扬扬，貌与常异。虬髯默居座末，见之心死。以杜甫《赠表侄王弼》诗“秦王时在坐，真气惊户牖”证之，疑为实事。自是海外扶馀王遂著人口。阅《崇明县志·杂志门》引《听雨轩赘记》，又有虬须一事，文字亦雄伟可喜，具录之云：“总兵俞公大猷镇守松江时，将出操演，兵马俱候于教场。忽有长身虬须人出入行伍间，管队者呵之不止，众兵群殴之，其人旋转一挥，兵仆地者数十。未几，大队四合，其人夺一棍，拦挡冲击，众皆披靡。公至，询知其故，立马与语曰：‘汝武艺如此，乃轻身与若辈较短长耶？’问其姓名居址，答曰：‘邬友仁，崇明沙人，父客金陵，将往省之。渡海飘风至此，闻操演，故来一看耳。’公心异之，坐演武堂，试以兵器。邬嫌器械轻难舞，强之才举手，枪杆折矣。公所用槊，重四十馀斤，令试用之，邬入手，亦微若有不足者，遂持而舞，寒风如箭，周数丈地，人无敢立，咸亟称之。公问其‘欲仕乎’，曰：‘官大则可，小则不能’。公即授为千户令，随营操演。邬言行李在船，欲往取，公给以马，使四卒随往。邬上马，马脊折，遂步行，卒四策马追之，终莫及。至海边见一大舶，泊于外，一小划距岸二丈，有二人在，邬一跃，即登其上。遥谓四卒曰：‘吾宝山兵也。以微过为主者所黜，往来海上者二十年矣。今为某岛主，闻此间兵势精严，特觐之。汝本官拔我为千户，可谓识人，然我俯首总兵之门，曷若海外称尊之得自由乎？吾逝矣，为谢俞公。我当遍告同辈：终渠在任，决不敢一矢相加，以报知己。’言讫举棹如飞，将及大舶，舶上百余人齐出匍匐迎迓，遂扬帆东出。四卒回告，公惋惜者累日。公镇松十馀年，海上果无烽烟之警。其七世孙昌，时官梧州守备，以手书日记示余如此。”以上俱《赘记》语。案《明史·俞大猷

传》，官苏松副总兵，旋为浙江总兵，首尾仅五年，往来剿倭，疲于奔命。所言“镇松十馀年，海上无烽烟之警”，多不实，言出自大猷日记尤非。所言邬友仁，亦不过汪直、徐海之流耳，文人故张之。吾特据以续燕公传，作小说传奇观可也。传奇为唐人小说之一种，非今之传奇。

云南曲靖府汉李膺碑

贵池吴铭道次尾之孙。有《曲靖观李元礼碑诗序》云：“碑在曲靖之南里许潇湘江中，有篆书‘李元礼’三字，仿佛可辨云，尚有‘汉光和五年’等字，今剥蚀尽矣。《后汉书》‘侯览狱起，膺诣诏狱拷死，妻子徙边’，《皇朝考》‘曲靖府城南有《李元礼碑》，相传李膺因党祸流妻子于此’。曲靖蜀汉时兴古郡，介牂柯夜郎。自宋以后，滇为段氏所据，声教阻绝十数世。从前规画，无不风飘烟散，知烟没者多矣。而此碑岿然独存，当为传信无疑。此碑习为土人所祷卜，水旱疾疫，有求辄往。守令以春戊祭，著之祀典。”案：吴氏所举甚奇。检《一统志·祠庙门》有“李元礼祠”：“在南宁县南三里。城南一里有古碑，上刻古篆，有‘汉光和五年闰四月十五日’、‘汉李膺’等字，餘不可辨。相传党锢之祸，流李膺妻子门人于此，岁于二月戊日致祭。”与吴序略同。吴氏游滇，在《一统志》未成之前。《一统志》仍有“汉光和五年闰四月十五日”字，吴氏亲观，已云剥蚀。《一统志》当仍旧文。此碑王述庵《金石萃编》、桂未谷《札朴》、《滇游续笔》皆未及。吴云潇湘江，据《一统志》，南宁县南有潇湘江，上有桥，明景泰中建。

招帖古名零丁

今之寻人招帖，登报具其形状，此在古名零丁。《太平御览》五

百九十八文部，有“零丁”一门，载戴良字文让，失父零丁曰：“敬白诸君行路者，敢告重罪，自为积恶致灾，交天困我。今月七日失阿爹，念此酷毒可痛伤，当以重币增用相赏，请为诸君说事状。我父躯体与众异，脊背伛偻卷如戴。唇吻参差不相值，此其庶形何能备。请复重陈其面目，鹄头鹄颈猎狗眼，眼泪鼻涕相追逐，吻中含纳无牙齿，食不能嚼左右蹉，似西域骆驼。请复重陈其形骸，为人虽长甚细材，面目芒苍如死灰，眼眶凹陷如米羹杯。”词古意真，长短句杂错，如《荀子·成相》、史游《急就》，以为后世莫能仿也。朱竹垞先生《曝书亭集》，为陆进士寅作零丁以访丽京先生。先生名圻，自南浔庄氏史狱赦出后，遂托为浮屠道士，遁迹不反。其子寅既举进士，往求其父。竹垞仿作云：“寅也敬白零丁尺半纸，敢告行路诸君子，有父有父，一去故乡，不知几千里，日月逾迈二十五年矣。请说躯体颜面皮，轩眉广颊丰两颐，口辅髭髯微有髭，去时壮齿尚未落，肩胛颇亦肥。平生不怒多笑嬉，目无邪视头无俱，周尺一寻长过之。请说裳衣少新制，大布宽袍泪长渍。带断续绝衫裹臂，孙孙子子虬虱萃，有时扞之掷在地。两裆敞袴双足扉，寒肌生粟暑生痒。婆留乡语听易分，间以经术词纷纶，至若说《易》尤专门，方州邵家味义根，囊中口谱可等《金匱》文，方不自秘恒活人。不昧财，不逐祸，缁衣黄冠无可，惠而能以消息闻，为德者君报者我。”此足配戴良，而雅丽过之。今之招帖，无人肯效此体也。

李竹懒记奎基法师事考

李竹懒《紫桃轩杂缀》云：“奎基法师，尉迟敬德之子，年十八，有膂力。每出以三车自随，一载醇酒清饌，一载女乐十余人，一载兵器，而自与锦袍花帽以骑从。所欲留处，纵饮至醉，拥女乐遍幸之。而后与壮士运矛挺槊，博刺自快，率以为常。玄奘法师自西域取经回，欲立贤首宗旨，而难其堪授者。一日请于唐文皇曰：‘大唐国中，

能承我法嗣者，尉迟子耳。’帝命敬德令依奘剃落，奘为开示数语，即尽弃其习，而精研宗乘。今相宗诸秘奥，皆其所披析也。然性廓落，不知有戒律，饥则恣飧，饱则鼾睡而已。一日行脚买牛肉啖之，而挂其余于锡端，至一刹，乃宣律师所住也，留三宿别去。宣律受无供，不御人间食，至是天供三日不至，奎师行，复来，宣师曰：‘日来为粗行者腥秽所触邪？’供者曰：‘我辈岳渎小神耳。两日闻来刹有大乘菩萨，四洲大力神王，色欲界主，咸在拥护，故不敢唐突。今幸其行，始得修敬。’宣律为之三叹。久之曰：‘我不能也。’而奉律益严。”竹懒言：“此段话，闻之海上老僧休如，与渠谈于龙井，不知出何藏何函典，但觉雄迈历落之气，可以壮人胆骨。”以上竹懒语。余读竹懒此记，颇留意法师之为人。考宋赞宁《高僧传》，有《京兆释窥基传》，即法师也。传以鄂国公为窥基诸父，与唐《基公塔铭》“伯父鄂国公”合，“奎”“窥”声近，竹懒作“奎”得之耳闻故也。传言：“基神悟精爽，奘师讽之出家，其父曰：‘伊类粗悍，那胜教诏？’父虽然诺，基本强拒，奋然抗声曰：‘听我三事，方誓出家，不断荤血。’奘先以欲钩牵，佯而肯焉。行驾累载前之所欲，故关辅语曰三车和尚。一云行至太原传法，三车自随。前乘经论箱帙，中乘自御，后乘家妓女仆食馔。”此休如述于竹懒所本。惟赞宁盛诋此事为妄，盖卫彼教之言。生自将家，年少骋侠，容有此事。自休如述之，更觉奕奕有神。世传《济公传》，一经附会，几于玄之又玄；如以基公事演之，其豪概固胜也。

龚定庵葛裙词

定庵诗词，言言典雅，如王谢大家子弟，咳唾顾盼，皆异流俗。吾最爱其《葛裙词》，有裨风教。凡咏事者，宜以定庵为法。世人撷取故实，皆在耳目之前，犹屎溺也。序言：“江东某大姓以祸死。宠姬十辈，挟金珠散去。一婢坚不去，尝着葛裙，人以葛裙呼之。自言

主人常以被酒一召我，我誓报之。豪家吞其屋，葛裙奉木主，卧一室坚守，力不支，绝粒毙。豪愍之，扃室，并其主瘞焉，曰还我一块土。词云：“君家花月笙歌，葛裙那许陪宵宴。啸如鲁柱，才如窦锦，遇如班扇。蓬鬓慵梳，蛾眉怕妒，天寒谁管，平生已矣。春风一度，恩歇绝，何曾怨？一夕仓黄家变，抱琵琶，倾城都散，雍门琴碎。雀台香烬，西邻墓远，块土争还，芳魂永守，秋磷如电。史家柱叔敖公，千载下，今重见。”定庵隶事之工，如右殆无一寻常语，未用柱叔敖公，表言葛裙仅承主人一幸，而报之一死，尤为确切。今检《列子·说符篇》，具载之，云：“柱厉叔事莒敖公，自谓不知己者，莒敖公有难，柱厉叔辞其友而往死之。其友曰：‘子自以为不知己故去，今往死之，是知与不知无辨也。’柱厉叔曰：‘不然，自以为不知，故去，今死，是果不知我也，吾将死之，以丑后世之人主不知其臣者也。’”此事甚僻。王渔洋《国士桥诗》，昔举此以愧豫让；今定庵之咏葛裙，于事更合。

阮梅叔

阮梅叔亨，云台太傅之从弟，以副榜贡生终。晚年好善，爱修补旧书，每至街市，从一奚奴，背布袋，内置钱物，得旧摊残本书籍，补治完好，阙卷少者，为之补全，钤以名印。乱后余见数种，有“阮亨梅叔”印，及“阮二”、“仲嘉”各印。

黄漱兰先生

漱兰先生，为余入学受知师，蒙取第一名，覆试试题“杨柳依依解送行”。时乙酉科试，先生差满将还朝，此题及考吾郡拔贡诗题“他时倘忆种花人”，皆有留连惜别之意。余诗云：“金城怜再到，霸岸惜长征。”先生密圈。先生以侍郎降补通政，旋告病，仍寓京师，犹

领袖后进，坐客恒满。甲午出为信陵书院山长，复主江宁安庆书院，皆未久辞去。当先生过芜湖时，袁爽秋官此，迎先生入署，欢宴竟日，请吕君佩芬、汪君宗沂作陪，皆先生年侄。先生每遇皖人，必极诋李文忠，吕托病不赴；汪为中江书院山长，谊无可辞。先生举酒属汪曰：“仲伊先生，请进一杯。”汪作色曰：“年伯如此称呼，不敢当，将年谊不认乎？”先生曰：“因君学问好，故尊之。”又问曰：“仲伊贵同乡李合肥为何如人？闻君客其幕府数年，必深悉其人。”袁恐先生辞厉，乱以他语，辄命进饭。先生大呼：“爽秋！君乃不许我吃酒邪？”袁窘甚。汪进言曰：“年伯校士各省，闻出试题甚佳。”先生曰：“唯唯。”汪曰：“年侄客李时，亦有一好题请教，为‘知虞公之不可谏，年已七十矣’。”先生抚掌曰：“妙！妙！”因尽欢而散。后袁谢汪曰：“非君不能解此围。”先生没后，余有谏寄仲弢编修，属告先生影堂之次。仲弢壬寅客江宁，犹向人称之，欲荐余入两湖学堂，余以业有馆辞去。今摭先生遗事，惜其父子，皆不可复作矣。

吴山尊录汪容甫诗

全椒吴述庵承志，求余撰其祖父墓志，文成寄去。述庵以书来谢，并缄吴山尊学士手录汪容甫遗诗一叶，以余好汪氏学也。诗凡七首，一《晓发三山矶》，二《宿龙江》，三《旅食》，四《客散》，五《邗沟夫差庙》，六《以园蔬奉山长作》，七《过奉申里》。检容甫遗诗刻本目录，无《晓发三山》一首。吴录容甫自跋云：“仆早工选体，又尝好为歌行长句，耳食之流，遂谓中不能为格诗。今为同舍郑健堂书此。清和洗炼，何异古人？耳食之毁誉，亦何足道？正柳仪曹所谓若病乎己者也，其亦劳甚矣。汪中书。”案：格诗，律诗也，王阮亭、卢抱经两先生有考。

全唐文版

《全唐文》编于扬州阿嵯使所，延聘者有刘金门侍郎、吴穀人祭酒、孙渊如观察、吴山尊学士、洪桐生太守等，凡二十余人。刻成版存扬州。每版厚六七分，皆刻一面。当时物力之丰，不惜巨资，成此盛业。兵燹后，此版尚存。方子箴运使请开淮南书局，曾属提调某运判，修版补印，叠经数手，将版砌于屋背廊下，层累如墙垣，余于甲辰，随蒯君光典客扬州花园巷安徽会馆，同事山阳段君朝端、合肥殷君晋龄，各有访书之癖。一日步至别室，见书版堆积，高与屋齐，取视之，《全唐文》也。亟言诸蒯，商之思新甫运司，各捐资修补，已定议矣。蒯属余等，先检原版，取其应修者，别置一处。余与两君亲查，咸腐窳，叩不成声，拉之随手辄尽，相觑叹息，白蒯而罢。计版应仍存安徽会馆，以不堪供爨，宜无人过问也。

张子开书桃花源记

合肥张子开文运，博雅工书，文章行谊，冠绝一时。余未识子开时，见子开与吾友刘君泽源书，用笔宛转，谓刘君曰：“子同县有此人，是淮肥间气所钟也。”刘以书告张，惊为非望。由是互通书疏，不异面谈。余甲辰客扬州，以素纸乞子开书，未几寄来扬州，余展卷，见所书为陶公《桃花源记》，此记“欣然亲往”，宋本皆作“规往”，余私意谓张君必不误书“亲往”。若误“亲往”，张君虽博，尚差一筹。亟收卷观之，果“规往”也。后语张君，吾辈定交，乃藉讎校异同为羔雁。如有续王丹麓《今世说》者，不且添一故事邪？

舒铁云王仲瞿

王仲瞿为舒铁云姨子。仲瞿之文，铁云之诗，皆野狐禅，败乱人纪，然当时化之，后世宗之。《烟霞万古楼文》及《瓶水斋集》，屡经翻刻，信乎人情厌古喜新。卢仝之诗，樊宗师之文，尚有注之者；王舒派自在天壤，特非正宗，如摩登迦女之淫咒摄人，阿难戒体几为之毁，幸有佛力导之，涕泪皈依耳。近世佛力较狭，年少阿难，趋向宜正，又当谨随文殊师利，参维摩诘不二法门也。

陈散原评樊易两君

陈伯严吏部，余癸卯以后旧识也。余亡友泰州袁君銜，往自天津回，矜言于余，方今能为诗古文者，义宁陈君是也。余因此识陈君，迭有酬答，见于散原诗中。陈君诗宗西江，标举兴象，莛甲新意，妙罄言诠，而不堕入南宋诚斋后村一派，在当今为药庸腐清隽上剂也。游谈所誉，造作为程，宗仰陈君者，固不易其辞也。恩施樊君云门，汉寿易君顺鼎，从实处入，与陈异辙。陈之沉思苦吟，视樊、易之速藻，亦有间焉。陈戏语实甫：“君与樊君胸中，有作诗机器。”余于江宁愚园之集，预闻此语，推为雅谑。樊、易与余，俱有一面之识。

鲁通甫自定文稿

山阳鲁通甫先生《类稿》，仍晚年自定。余闻之徐通庵先生云：“先生晚年，冬日炽炉炭取暖，命其子蕢取文稿，朗诵一过。先生默听曰可，则命存之，否则撕毁投火中，蕢力争不可。迨定本成，先生神识昏瞶，不复能核是非矣。”《类稿》刻资出汤敏斋太常修。太常求

为《文端公神道碑》，访于吴稼轩先生，吴以通甫对，文成，太常甚喜，为刻其集，并制序焉。通甫文善学东汉，雄骏驱迈，自成一队，虽曾文正亦重之。上元吴云字石公者，自矜能为古文，遇稼轩先生之子温叟于座，询其乡贯，曰：“贵乡有鲁通甫，也算能为古文。”吴愠甚，屈于座客，默不与较。后以告余，余曰：“石公可谓蚍蜉撼树不自量者也。”由今观之，人知有通甫而称石公者少；越数十年，虑石公将沦于狐貉之啖，通甫之文自凛凛有生气也。

高 鉴 之

余侨盐城，所友事者，陈君惕庵之外，有高君鉴之名镜蓉，盐城岁贡生。王逸梧先生视学淮安，鉴之试古学，据吴仁杰说，考张释之为廷尉年，列第一。茂名杨蓉浦提学，尤赏鉴之，邀入南菁书院，时以山阴甜酒及金华兰薰饷之。鉴之自伤其老，无以酬杨。攸县龙侍郎湛霖，按临江苏，值考拔贡年，鉴之列前茅，侍郎宴诸生，观其齿貌，预为选拔地。阅鉴之册籍，年几五十，已开名单，复将鉴之名圈去。鉴之郁郁，授生徒，余大儿及其门。鉴之以寒疾五日卒，年五十一，时光绪甲辰也。鉴之体如笨伯，能背诵韩集、杜诗，熟精两《汉》，说之靡靡可听。善为史论，有数篇，刻入杨溥雨提学试牍中，余从其弟求之未得。鉴之馆于镇中，假僧寺为精庐，集杜句署门云：“欲得淮王术，真随惠远游。”书规平原。鉴之没后，余过寺，见此联，戒老僧勿毁，僧守之数年。今春见之，已揭去，无复踪迹。髡徒败人兴，并此区区，不为吾友传之，吾有负鉴之矣。

陈兰甫先生冒籍弟子

番禺陈兰甫先生，为学融会贯通，不争派别。读其书，使人之意自消。粤中高材，出游四方，皆以曾事陈君，矜为标识，人敬之有加

礼焉。余于光绪己亥馆盐城，邑令有粤友来访，沈其姓而忘其名，自称为兰甫弟子，友人馆某令署，知余欲闻陈先生遗事，导之来见。余喜甚，治具假僧寺款之，尽一日欢，听其言论，多市井计簿中语。余持陈君他事质之，噤不能答。问其年，核以陈君卒时，渠不过七八龄耳。既无杨马之才，焉有孔融之对，恨为所绌。友人怪余好事，至于见诳。余冀得一真，迄不自悔，今日思之，不觉失笑。树有木居士，佛有稗沙门，此沈某者，木与稗之类也。

黄仲则诗

乾隆常州诗人，当时盛推黄仲则。仲则有朱竹君、王述庵为师，有洪稚存、孙渊如、武虚谷、戴东原、汪容甫、李南涧为友。百足之虫，至死僵，附之者多。致仲则诗，有溢美之言，非公论也。仲则诗，世所极称者，《前后观潮行》、《太白酒楼歌》。《前后观潮》参以议论，托体不高。《太白酒楼》“楼中节使文章伯”，语与题溷，惟“是时江上同云开”四句稍胜，其余未见佳处，不解吴思亭乞梁山舟书此，刊太白祠壁，岂非稚存状仲则，扬之过甚邪？仲则诗自以五古为上，七古次之。律体亦染《吴会英才集》派。《都门秋思》四首，相传毕秋帆见之以五百金资仲则者，诗亦平平无奇，惟《送张大还扬州》“春水方生君速去，大江东下我西行”，暗用《三国志》注及《北史》孝武帝语，为自然高妙，而世顾不称之，何也？余于癸未居忧里中，曾点勘仲则诗一过，故能言之如此。

黄小松摹赠武虚谷像

武虚谷魁梧卓犖，焦里堂《雕菰楼集》能言其状。钱唐黄小松，以金乡石室中汉人像有极似虚谷者，摹之以赠虚谷。今《授堂全集》前冠虚谷像，即黄所绘也。余复倩友人摹一幅，装潢悬于斋壁。

虚谷奇男子，见其像使人不敢生苟贱之心，妄自菲薄。纪文达笔记言有蓝田叔画陶渊明图，神似某君，某因乞去。与武事颇相类。

江艮庭先生不习楷书

江艮庭先生声，不习楷书，俱用小篆。曾见先生《与焦里堂书》，同《王西庄书》，合为一册。光绪癸未，在扬州□司街刘姓书店，见之索价二元，时无以应，至今日论值则数倍矣。案《吴志·张纮传》裴注引《吴书》：“纮既好文学，又善楷篆，与孔融书，自书。融遗纮书曰：‘前劳手笔，多篆书。每举篇见字，欣然独笑，如复睹其人也。’”今见先生与焦书，善效张子纲，如王高士之于顾亭林也。先生书药方亦用小篆，市人不识，改用隶书，亦不识。先生叹曰：“隶所以便徒隶者，乃亦不识邪！”先生有篆书《释名疏证》，毕秋帆制府刻之。

七品官归田故事

朱竹垞先生斥出翰林，为学士牛钮所劾，后补原官，再罢。长州韩文懿公莼谓人曰：“吾虽贵为尚书，何如秀水朱十，以七品官归田，多读数万卷书？”此语人艳称之。江阴缪艺风先生，昔在史馆，与掌院徐东海不合，投劾自免。镌一小印曰“以七品官归田”，钐于书籍之上。余叩得之，欲赋一诗，以备词林掌故。今追纪其事云：“七品归田昔所称，金风故事艺风能。弹文私幸无牛钮，物论终嫌附孝征。日下著书同轨辙，吴中读画辨淄渑。摭言嘉话皆千古，休道流传出爱憎。”案竹垞《咏古》第二首：“海内文章有定称，南来庾信北徐陵。谁知著作修文殿，物论翻归祖孝征。”隐诋高澹人，由是为其所挤。艺风在国史馆，亦有忌之者。竹垞著《日下旧闻》，艺风亦纂修《顺天府志》，于京师坊巷考定尤详。竹垞当宋牧仲开府吴中，往来苏州，辨别书画；艺风于漕阳署抚时，即为之评书估画，及为江

督，艺风且为之撰《销夏记》焉。前后略无不合。若附之定保《摭言》、韦绚《嘉话》，必不以出爱憎之见也。

药裹慵谈

责任编辑 周 骋

装帧设计 郭宝林

ISBN 7-80643-273-6



ISBN 7-80643-273-6
Z · 19 定价: 6.50 元

9 787806 432730 >